

萬有文庫

第2集七百種

王雲五主編

宋紀詩事

(三)

屬鶴曰馬瑄輯

商務印書館發行



宋詩紀事

(三)

馬鵠厲曰贊

國學基本叢書

萬有文庫

第2集7百種

王雲五  
總編纂者

商務印書館發行

# 宋詩紀事卷十一

錢唐厲鶚緝

祁門馬曰璐同緝

宋庠

庠字公序初名郊字伯庠安州安陸人徙開封之雍丘天聖二年舉進士第一入翰林爲學士歷檢校太尉平章事樞密使封莒國公以司空致仕卒贈太尉兼侍中謚元憲有集

西清詩話二宋俱爲晏元獻門下士兄弟雖甚貴顯爲文必手抄寄公求雕潤嘗見景文寄公書曰莒公兄赴鎮圃田同遊西池作詩云長楊獵罷寒熊吼太乙波閑瑞鵠飛語意警絕因作一聯云白雪久殘梁複道黃頭閑守漢樓船仍注空字于閑之旁批云二字未定更望指示晏公書其尾曰空優于閑且見雖有船不御之意又字好語健蓋前輩務求博約情實肫至蓋如此也

答葉道卿

紙尾勤勤問姓名禁林依舊玷華纓莫驚書錄題臣向便是當時劉更生

西清詩話宋郊字伯庠在翰林有指其姓名傳以他說者因請更名庠嘗移書葉道卿清臣目爲同年葉戲答云清臣宋郊榜第六人登第偏闕小錄無宋庠者不知何許人庠答詩云云

展江亭成留題

綠鴨東陂已可憐，更因雲竇注新泉。  
鑿開魚鳥忘情地，展盡江湖極目天。  
向夕舊灘都浸月，遏空新樹便留煙。  
使君直欲稱漁叟，願得閑州不記年。

西清詩話。許昌西湖展江亭成，宋元憲留題有鑿開魚鳥忘情地，展盡江湖極目天之句，皆以爲曠古未有此詩，然本于五代馬殷據潭州時，時建明月園，命幕客徐仲雅賦詩云：鑿開青帝春風圃，移下姮娥夜月樓。用古句摹擬，詞人類如此，但有勝與耳。

落花

一夜春風拂苑牆，歸來何處剩淒涼。  
漢皇佩冷臨江失，金谷樓危到地香。  
淚臉補痕煩獮體，舞臺收影費鬢腸。  
南朝樂府休賡曲，桃葉桃根盡可傷。

侯鯖錄。宋呂公兄弟少作落花詩，爲時儕笑。

莊惠后挽詞

媯幄柔明訓，堯闢保護賢。  
別居長樂寢，讓給水衡錢。  
謹疾方加膳，收神亟去仙。  
宸襟增服紀，追報煥終天。  
昔帝推嬪則吾君，賴母慈。  
陪陵漢家葬，異室闕宮祠。  
霧暗星軒隱，天愁月御移。  
翟車參享路，無復廟中期。

莊獻太后挽詞

寶慈垂母訓，一紀御璿除。  
地有古沙舊，天仍補石餘。  
軒星淪夕緯，翟輅去宸居。  
異日金縢啓，方知復辟書。  
自注。太后上仙後於巾箱中得復辟詔書。

吁戾身無憚寒暄疾有加災生織女柰魂斷濯龍車厭翠浮晨旭邊簫咽暝霞唯留長樂注刊美在皇家

以上合璧事類前集

### 季秋曉出題山光寺

旦夕人語喧汎舟北城曲十里望禪刹飄若塵外躅是日秋宇高清輝澹晨旭林風唱殘蜩澤稗下飢鵠野實迎露黃川蕪傲霜綠循涯得微徑捨楫步幽麓佛寺訝靚深僧廬互重複山氣導真想天香洗煩欲嗟余秉微尚兀壑返初服失計蹈塵躅虛名玷纓轂妄排金馬門謬草紫泥牘器偏固自傾纏短良難續何言一麾出尙參九州牧恩深無後疵顏覲有餘恧孔訓懲憚改義爻許頻復曷來清淨區冀脫泥塗辱醉象或可調藩羝悔前觸萬緣自我空至道非外勗聊謹三載期吾得事棲伏

揚州府志

宋祁

祁字子京天聖二年與兄庠同舉進士奏名第一章獻太后以爲弟不可先兄乃擢庠第一而寘祁第十時號大小宋累遷知制誥工部尙書翰林學士承旨卒謚景文有集

東軒筆錄子京博學能文章天資蘊藉好游宴以矜持自喜晚年知成都府帶唐書於本任刊修每宴罷盥漱畢開寢門垂簾燃二椽燭媵婢夾侍和墨伸紙遠近觀者皆知尙書修唐書矣望之如神仙焉多內寵後庭曳羅綺者甚衆嘗宴于錦江佛徵寒命取半臂諸婢各送一枚凡十餘枚皆至子京視之茫然恐有厚薄之嫌竟不敢服忍冷而歸

### 九日食餃

廳館輕霜拂曙袍。糗餈花飲鬪分曹。劉郎不敢題餈字。虛負詩中一世豪。

聞見後錄。劉夢得作九日詩。欲用餈字。以五經中無之。輒不復爲。宋子京以爲不然。故子京詩云云。糗餈粉餈糕類也。出周禮詩豪樂天目夢得云。

玉堂作

粉署重來憶舊遊。蟠桃開盡海山秋。寧知不是神仙骨。上到鼇山更上頭。

東軒筆錄。嘉祐中。翰林諸公皆入政府。時包拯爲三司使。宋祁守鄭州。二公久著人望。而不見用。京師謠語曰。撥隊爲參政。成羣作副樞。虧他包省主閼。殺宋尙書。明年包亦爲樞密副使。而以翰林承旨召景文。景文以詩寄梁丞相。略云。梁園賦罷相如至。宣室釐殘賈誼歸。蓋謂差除兩府足方被召也。爲承旨。又作詩云云。

清明日集西園

日日西園春思催。攜觴結客上高臺。正緣從事青州至。更許書生洛下來。早葉已成花半落。新巢未定燕千迴。芳辰物物皆堪愛。併作高陽倒載媒。時州醞既美。又命座客賦詩。故有第二聯。

中山立秋

峯雲曉影破孱顏。萬里風生結早寒。人在兜零烟外走。歲從鵠鷁口中殘。槽聲併滴添新酌。筍月兼輪掩故紝。白髮光陰誠可惜。五年搔首問長安。

八月望夜無月有感

素波涼葦淡曾城。怊悵三年此夜情。獨捲練帷成默坐。暗蟲相命作秋聲。

閏正月二十五日送客尋春集裴氏園

尋春選客共流連。雨罷春郊物物妍。黃抹柳梢初徧後。紫黏花萼未開前。朋衿自爲交驩慘。醉罷誰能辨。聖賢猶賴斜陽催跋馬。不然離恨損絲弦。

七月二十七日

客雁歸何處。寒蟬鳴不休。兼之清夜永。副以長年愁。家令有移帶。中郎餘白頭。此懷誠自感。何賴怨高秋。

十日宴江瀆亭

節去歡猶在。賓來賞更延。悠揚初短日。淒緊乍寒天。霽沼元非漲。秋花自少妍。蟻留新獻酌。蕙續不殘烟。  
□鰣衝餘藻游。龜避折蓮流。芳真可惜。從此遂凋年。以上古今歲時雜詠

過摩訶池

十頃隋家舊鑿池。池平樹盡但回隄。清塵滿道君知否。半是當年濁水泥。池邊不見帛闌船。麥壠連雲樹繞天。百歲興衰已如此。爭教東海不爲田。

余旣到郡有詔仍修唐書寄局中諸僚

一章通奏領州麾。詔許殘書得自隨。吾黨成章真小子。官中事了是癡兒。昏眸視久花爭亂。倦手搔餘雪半垂。所願弟兄皆傑筆。劉生當見汗青期。

司馬相如琴臺

故臺千古恨。猶對舊家山。半夜鸞凰去。他年駟馬還。死憂封禪晚。生愛茂陵閑。唯有飄飄氣。仍存天地間。  
一輩掀翅壓溪隅。吏事初閑此燕居。斷岸有時通略約。輕風盡日戰枒櫛。雲鴻送目揮弦後。手板看山拄  
頰餘。芟碧蒲青來更數。江人多識使君旗。

九日藥市作

陽九協嘉神。期入始多暇。五藥會廣塵。遊肩鬧相駕。靈品羅賈區。仙芬冒闔舍。攝露來山阿。廝煙去巖罅。  
係道雜提攜。盈襟更薦藉。乘時物無賤。投乏利能射。灑苓互作主。參薺交相假。曹植謹贊令韓康。無二價。  
西南歲多癘。卑溼連春夏。佳劑止刀圭。千金厚相謝。刺史主求瘼。萬室繫吾化。顧賴惡石功。捫衿重慚嗟。

將歸

遠假西南守。三逢梅柳新。衰令宦情薄。老惜歲華頻。郫釀工銷日。巴禽巧喚春。離家何所恨。雁後作歸人。

覽蜀宮故城作

國破江山老人亡。岸谷摧。鴛飛今日屋。鹿聚向時臺。故苑猶飛雪。荒池但劫灰。頽遺糊處壞。闔記數殘枚。  
恨月窺林下。悲風覓隴來。依城孤獨速。失廈驚裴回。廢社纔存樹。陰垣自上苔。有情惟杜宇。長爲故王哀。

集海雲鴻慶院

地勝祠仍古。春餘物徧華。山雲時抱石。佛雨不萎花。嶺挾樓梯峻。巖牽殿城斜。淙谿雜環佩。怪蔓走龍蛇。  
供坐僧飛鉢。香園客戲沙。吾遊眞草草。深意屬青霞。  
以上成都文類

秋夜

西風已飄上林葉。北斗直挂建章城。人間底事最堪恨。絡緯啼時無婦驚。老學庵筆記。

咏漢史

朱游示雲小字。英氣凜生風。濱死危言悟帝聰。殿檻不修旌直諫。安昌依舊漢三公。韻語陽秋。

題三泉龍洞

蚪洞聳雲峯。緣虛一棧通。雲披雙壁敞。樹補半巖空。概竹森煙蘿。飛泉曳玉虹。重蘿不肯盡。陰壑自然風。嶺斷天斜碧。崖傾日倒紅。浮丘邈難遇。留恨翠微中。

能改齋漫錄。三泉龍洞以山爲門。深數十步。復見天日。及山水之秀。蓋自然而成。非人力也。宋景文公賦詩。

蛙

越國車前矜勇甚。子陽井底太驕生。乘時不羨雲漢樂。口作儀同鼓吹聲。

蟬

撲粉曾過宋玉牆。一身生計託流芳。不須長結東風願。秋菊春蘭各有香。以上合璧事類別集。

吳中友人惠蟹

秋水江南紫蟹生。寄來千里佐吳羹。楚人欲使衷留甲。齊客何妨死願烹。下筯未休資快嚼。持螯有味散朝醒。定知不作蟛蜞悞。曾廁西都博士名。蟹略。

臘後晚望

寒日繫難定。鳴笳弄已休。凍崖初辨馬。昏谷自量牛。漢樹臨關密。胡泉入塞流。登高能賦未。風物古堯州。

送越州陸學士

梅天霞破候旗乾。鄉樹依然越絕間。挾策當年逢掖去。懷章此日繡衣還。亭餘內史浮觴水。路入仙人取箭山。牛酒盛誇先墅宴。不妨春詔得親班。

答勸農李淵宗嘉州江行見寄

嘉月嘉州路。輶峩按部船。山圍杜宇國。江入夜郎天。霽引溪流望。涼供水閣眠。愧君舟楫急。遂欲濟長川。

贈清逸魏處士

奕世依巖石。衰恩下帝庭。姓名高士傳。父子少微星。池溜遙通澗。家林近帶坰。分明詔書意。天極賜鴻冥。

瀛奎律髓此魏野之子

閑也亦能詩世其隱

長安道中悵然作

三輔古風煙。征驂悵未前。山園蓬顆外。自注賈山議。始皇侈葬言。後世不得蓬顆蔽冢。宮室黍離邊。樹老經唐日。碑殘刻漢年。便須真隕涕。不待雍門弦。

寒食假中作

九門煙樹蔽春塵。小雨初晴潑火前。草色引開盤馬地。簫聲催暖賣餳天。繁絲早絮輕無著。弄袖和風細。

可憐鼈署侍臣貪出沐珉糜珠餉愧頒宣

擬杜子美峽中意

天入虛樓倚百層四方遙謝此登臨驚風借壑爲寒籟落日容雲作暝陰峴井北拋王粲宅楚衣南逐女  
婆砧十年不識長安道九籥宸開紫氣深

春宴行樂家園

園芳初乾小雨泥飲壺游屐況親攜身輕早婕千回舞技癢新禽百種啼乘飲草茵侵坐軟畏風桃綬向  
林低陽暉自有留人意衡照高樓未遽西原注傍人去聲

把酒

歌管嘈嘈月露前且將身世付醜然漫誇鼷鼠機頭箭不識醯雞甕外天青吏有人譏巧宦黃金無術治  
流年君看醉趣兼醒趣始覺靈均更可憐

落花

墮素翻紅各自傷青樓煙雨忍相忘將飛更作迴風舞已落猶成半面妝滄海客歸珠迸淚章臺人去骨  
遺香可能無意傳雙蝶盡付芳心與蜜房以上瀛奎律髓

瀛奎律髓夏英公守安州景文兄弟以布衣游學席上各賦落花詩  
英公以爲有台輔器後元憲狀元景文甲科同榜天下以爲二宋

希夷峽

仙館三峯下。年華百歲中。夢休孤蝶往。蛻在一蟬空。葉笈微言祕。霄辰浩氣通。丹霞舐後鼎。林遺御餘風。布霧沈荒白。滄霞委暗紅。蛾眉有歸約。飛步與誰同。華嶽全集。

寄大固山嘉祐院長吉上人上人曾遊京師得宋公以下一百四十五人所書般若經建臺以貯之。  
台州府志。

句

色映堋雲爛。聲迎羽月遲。

六一詩話。天聖二年省試采侯詩。宋尙書祁最擅場。

其句云云。尤爲京師傳誦。當時舉子目公爲宋采侯。

碧雲謾有三年信。明月空爲兩地愁。

優古堂詩話。雲齋廣錄云。二宋以文章齊名天下。子京守蜀日作詩三百首。名曰猥乘。有句云。云後卒不入兩府。人以爲詩譏。予以子京用何遜與胡興安夜別詩。念此一筵笑。分爲兩地愁。廣錄之論不知所自也。

蟹美持螯日。鱸香抑鮓天。芥隱筆記。曉日侵簾押春寒。到被池候鷗錄。青帝回風還習習。黃人捧日故遲遲。困學紀聞。虺蔓相結盤。蚌稍久回曲。紛若未契繩。繁如已綸絳。咏藤。誰言漢樸學。正似楚枝官。以上暫匠金樽。

吳感

感字應之。吳郡人。天聖二年省試第一。九年又中書判拔萃科。仕至殿中丞。

如歸亭

五柳門南派水東。水邊亭上興無窮。半窗山色來雲外。一枕荷香帶雨中。繡被夜歌青翰械。綠波春牋紫  
蒸風塵。曹未竊江湖號。攜手闌干早晚同。吳江縣志。

呂造

晉江人。言子。天聖二年進士。

刺桐城

閩海雲霞繞刺桐。往年城郭爲誰封。鷗鵠啼因悲前事。荳蔻香銷減舊容。

泉南雜記。泉州築城時。環城皆植刺桐。故號桐城。呂造詩云云。

胡宿

宿字武平。常州晉陵人。天聖二年進士。歷兩浙轉運使。召修起居注。知制誥。翰林學士。拜樞密副使。罷知杭州。以太子少卿致仕。薨贈太子太傅。謚文恭。有集。

太湖石

海岱鉛松妄得名。洞庭山腳失寒瓊。漱成一朶孤雲勢。費盡千年白浪聲。誰向機邊逢織女。直疑巖下見初平。年來賞物多成病。日遶蒼苔幾徧行。

宿秀峯寺

在靈巖山

夕鐘初斷海鯨音。投宿香園半翠岑。冰簾浸牀消客夢。水簾澄月伴僧吟。雄風拂衽清涼極。珍樹交柯翠翳深。一夜漢陰機事息。草堂虛論破煩襟。

彭山贈貫之

彭山隔重湖。落日見孤塔。揚舲入空曠。煙樹散鵝鴨。山中老臞仙。萬頃纖芥納。乘風落珠唾。暝色遠相答。平生爾汝分。磁鐵契已狎。萬緣一笑空。箇處無剩法。方舟過谷隱。風雨寒霎霎。黎明帶星歸。尚及齋鼓踏。臨歧戒後會。梅熟新秧插。期我散縑楮。莫忘鷗盟歃。

送楊中允宰常熟

丹舸傍江潯。嘔啞遠艤音。新科持片玉。能政引孤琴。美進宮坊秩。榮歸里閈心。名參天下雋。歌著邑中黔。地志連香徑。家園帶武林。吳山幾屏秀。楚水一篙深。晚鼓停餘疊。秋帆臥半陰。平時接方驥。後夜望橫參。陶菊何妨醉。江毫且剩吟。悠悠河上別。千里鬱朋簪。

送顯忠上人歸吳郡

秋風隨處起。振錫不留行。卻背嵩雲去。迎看淮月生。禪通少林默。詩得杼山清。幾夕巖窗下。忘眠聽瀑聲。  
以上吳郡志

過桐廬

兩岸山花中有溪。山花紅白徧高低。靈源忽若乘槎到。仙洞還同採藥迷。二月辛夷猶未落。五更鶴臼最先啼。茶煙漁火遙堪畫。一片人家在水西。

塞上

漢家神箭定天山。煙火相望萬里間。契利請盟金七酒。將軍歸臥玉門關。雲沈老上妖氛斷。雪照回中探騎閑。五餌已行王道勝。絕無刁斗至闢顏。

飛將

曾從嫖姚立戰功。胡雛猶畏紫髯翁。雕戈夜統千廬會。緹騎秋畋五柞宮。後殿拜恩金印重。北堂開宴玉壺空。從來敵國威名大。麾下多稱黑矟公。以上瀛奎律髓

次韻朱沈春雨之什

蒼野迷雲黯不歸。遠風吹雨入巖扉。石牀潤極琴絲緩。水閣寒多酒力微。夕夢將成還滴滴。春心欲斷正霏霏。憂花惜月長如此。爭得東陽病骨肥。

淮南王

貪鑄金錢盜寫符。何曾七國戒前車。長生不待爐中藥。鴻寶誰收篋內書。碧井牀空天影在。小山人去桂叢疎。雲中雞犬無消息。麥秀漸漸徧故墟。

早夏

井轄投多思不禁。密垂珠箔晝沈沈。睡驚燕語頻移枕。病起蛛絲半在琴。雨徑亂花埋宿去月軒脩竹轉涼陰。一春酒費知多少。探盡囊中換賦金。以上宋藝圃集

芙蓉湖

小湖香<sub>去盡</sub>戰芙蓉。碧葉田田擁釣篷。嵐氣欲飛山隔岸。秋光不定水搖空。翩翻雪鳥爭投浦。潑刺霜鱗對擲風。正是滄浪濯纓日。一竿多謝紫溪翁。咸淳毘陵志

函谷關

天開函谷壯關中。萬古驚塵向此空。望氣竟能知老子。乘繻何不識終童。謾持白馬先生論。未抵鳴雞下客功。符命已歸如掌地。一丸曾誤隗生東。河南府志

津亭

津亭歌闋戒棠舟。五兩風來不暫留。西北浮雲連魏闕。東南初日滿秦樓。層城渺渺人傷別。芳草萋萋客倦遊。平樂舊懽收不得。更憑飛夢到瀛洲。

沖虛觀

五粒青松護翠苔。石門岑寂斷纖埃。水浮花片知仙路。風遞鸞聲認嘯臺。桐井曉寒千乳斂。茗園春嫩一旗開。馳煙未勒山庭字。可是英靈許再來。

淮南發運趙邢州被詔歸闕

天臺封詔紫泥馨。馬首前瞻北斗城。人在函關先望氣。帝於京兆最知名。一區東第趨晨近。數刻西廂接書榮。正是兩宮裁化日。百金雙璧拜虞卿。以上顧氏積書嚴選

憶廣福寺牡丹

十日春風隔翠岑。祇因繁朵自成陰。尊前可要人傾玉。樹底遙知地側金。花界三千春渺渺。銅槃十二夜

沈沈雕盤分篆何由得空作西州擁鼻吟常州府志

尹洙

洙字師魯河南人天聖二年進士知伊陽縣召試爲館閣校勘累遷右司諫知渭州兼領涇原路經略公事坐貶卒有河南集

聞見錄本朝古文柳開仲塗穆脩伯長首爲之倡尹洙師魯兄弟繼其後歐陽文忠早工偶儻之文及官河南始得師魯乃出韓退之文學之蓋公與師魯文雖不同公爲古文則居師魯後也

皇雅十篇

天監受命也自梁至於周兵難不息宋受命統一萬方焉

天監下民亂靡有定甚武且仁祚厥真聖仁實懷徳武以執競匪虔匪劉極我天命自昔外禪曰經曰營令以挾制政以陰傾帝初治兵志勤于征奄受神器匪謀而成淮潞弗虔卒汚叛跡戎輶戒嚴皇威有赫彼寇誑民吾勇其百殄厥渠魁貸其反側帝朝法宮左右宗公伎夫悍士以雍以容爾居爾室爾工爾農既息既養惟天子功

天監四章章八句

西師征蜀也

主用西師岷梁弗賓匪曰負固實交晉人予訓予誓念我將臣正厥有罪無庸傷民矯矯虎士載摧其壁吁嗟孟侯亦果其策迎師而降靡抗鋒鏑豈獨身謀完是宗國蜀都旣平將臣失律此衆悍驕彼民危慄

堂塗叫呶。合萬爲一。匪懷則威。帝心是恤。帝曰將臣。予嘉乃庸。廢命毒民。爾弗有終。邦典用疑。惟罪惟功。歷殛而削。協于厥中。帝曰孟侯。受封于楚。淑旂彌戈。備物異數。俾爾族姻。及乃文武。服在王庭。靡不有序。蜀民呼歌。天子威靈。保我者封。暴我者刑。匪功是私。匪弱是陵。天子惠民。疇敢不承。

西師六章 章八句

耆武受俘也。命將伐南海。平金陵。俘二王以獻。

耆武定功。惟時二方。淮服其乂。海南遂荒。孰孱而蠶。孰暴而昌。自民不惠。乃終滅亡。帝戒二俘。同卽爾誅。予惟民無辜。休息是圖。時其戢矣。寧威獨夫。帝嗟汎邦。久罹于民。或暴下以征。或敷虐以刑。予命中興。協于國經。民服德音。室家以寧。

耆武三章 二章八句 一章六句

憲古令守臣也。削其附庸。以強帝室焉。

帝懷永圖。治古是憲。四方守臣。惟屏惟翰。在昔艱難。弗惠訓典。跨都連城。高牙以建。有士有民。肆乃征繕。以息以容。終焉叛渙。凡今師臣。維厥聞見。匪革亂原。曷清多難。帝告庶邦。式是典彝。元侯顯文。戚臣宗支。正乃封圻。予一人是毗。凡曰附城。罔爾俾之。畜兵厚賦。靡爾得私。毋凶而國。作福作威。天子有命。疇敢不祇。子孫承承。惟萬世規。

憲古二章 章十六句

大鹵、王師討晉罪也。

冀州之強。粵惟大鹵。俗忮而專地。扼而固。協彼幽都。蕩搖邊圉。三乘既夷。凶威弗阻。帝御六師。百萬貔虎。翦其附庸。至于城下。鋒鏑始交。梯衝如舞。蠢爾屏王。請附降虜。我士奮揚。願究吾武。皇帝曰吁。念彼黎庶。匪鯨匪鯢。復爲王土。晉郊旣平。九區以寧。陳功太廟。告假威靈。在昔武臣。于商觀兵。惟吾藝祖。亦勤于征。匪貨晉罪。俟厥貫盈。聖作聖繼。巍巍相承。皇矣二后。功莫與京。

大鹵二章。一章二十二句。一章十四句。

帝藉脩牧典也。躬耕以勸農焉。

帝藉于郊。典儀是陳。務農以訓。供祀以勤。勤祀在誠。匪勤于人。訓農以實。匪酬以文。帝慎二物。乃躬乃親。公侯卿士。暨厥庶民。于甸有制。飭哉。惟寅。帝賚高年。式宴且喜。種種黃髮。族立而議。我生艱難。暴亂以繼耳。狃金鼓。目狎戎器。皇其我圖。親講農事。有子有孫。力田孝悌。鼓舞至仁。薰焉以醉。

帝藉二章。章十四句。

庶工任賢也。

帝咨庶工。疇其輔予。俊乂以登。厥勞乃圖。匪忘舊勳。非賢勿俞。巍巍袞台。盛德以居。任賢伊何。昌言是庸。勉吉爾猷。罔恤乃躬。豈無狷辭。拂于予衷。予不爾疵。爾無面從。始如從官。戎容揚揚。今帝左右。儒官煌煌。朝廷以尊。文物典章。得人之盛。奕世重光。

庶工三章。章八句。

帝制北方請盟也。

帝制萬方。罔有弗賓。蠻夷戎狄。羈而弗臣。盛格三方。稽顙獻琛。單于革心。願交使人。帝謀公卿。列侯庶校。咸曰彼心暴戾。陰狡旣擾我疆。復利我寶。無若厲兵。襲其還道。皇曰有衆。予實念茲。戰無必勝。矧其歸師。借曰大獲。疇能盡之。益俾餘醜。毒吾朔陲。乃愈其盟。北州以綏。在漢世宗抗威北戎。暴農算商。經用弗充。中土震騷。漢南始空。降及後世。猶稱厥功。於穆聖考。德無與偕。匪勤于兵。北人遂來。逮是三紀。遠俗以懷。生民休息。嗚呼仁哉。

帝制五章四章八句。一章十句。

皇治、慎刑也。帝仁于用刑。在位者以寬恤爲治焉。

皇底其治。欽哉惟刑。在疑而宥。罔察爲明。愛怒弗肆。孰爲重輕。毋一弗辜。惟典之平。前世理官。倚法以刻。匪彼爲讎。蓋曰任職。今之決獄。務正其辟。鑒于前人。繫我仁德。皇德在仁。寢而成風。公侯卿士。靡不率從。廢卵萌生。咸保厥終。不鄙不天。樂哉融融。

皇治二章。章八句。

太平。封祀告成功也。

噫嘻太平。無象兮。世烏得而知。惟盛德可迹兮。其封祀之儀。東岱宗兮。西汾睢。禮上靈兮。賓地祇。皇有征兮。吾民以禱。皇有祈兮。吾民是私。天敷佑兮。俾皇之釐。永世億寧兮。無疆之基。

太平一章八句。以上河南集。

易古字不疑致堯次子天聖二年進士知信州玉山縣坐法失官

題洪州僧寺

今朝才是雪泥乾。日薄雲移又作寒。家山千里何時到。溪上梅花正好看。能改齋漫錄。

謝伯初

伯初字景山。晉江人。天聖二年進士。許州法曹。

六一詩話。天聖景祐間。景山以詩知名。余謫夷陵時。景山方爲許州法曹。以長韻見寄。頗多佳句。余答云。參軍春思亂如雲。白髮題詩愁送春。蓋景山詩。有多情未老已白髮。野思到春如亂雲之句。故余以戲之也。又如自種黃花添野景。旋移高竹聽秋聲。園林換葉梅初熟。池館無人燕學飛之類。皆無媿於唐諸賢。而仕宦不偶。終以困窮而卒。

寄歐陽永叔謫夷陵

江流作險似瞿塘。滿峽猿聲斷旅腸。萬里可堪人謫宦。經年應合鬢成霜。長官衫色江波綠。學士文章蜀錦張。異域化爲儒雅俗。遠民爭識校讎郎。才如夢得多爲累。情似安仁久悼亡。下國難留金馬客。新詩傳與竹枝娘。典辭懸待修青史。諫草當來集阜囊。莫謂明時暫遷謫。便將纓足濯滄浪。六一詩話。

許昌公宇書懷呈歐陽永叔韓子華王介甫

十年趨競浪求營。因得閑曹減宦情。亂種黃花看野景。旋移高竹聽秋聲。驅馳賤事猶干祿。約勒清狂爲近名。早晚持竿釣鱸鰷。雙溪煙雨一舟橫。宋文鑑。

句

移家尙恐青山淺隱几唯知白日長劉諷都官致仕古今詩話

葉清臣

清臣字道卿長洲人天聖二年進士歷翰林侍讀學士權三司使出知河陽卒贈諫議大夫有集

遊攝山棲霞寺

仙峯多靈草近在東北維僧紹昔捨宅總持嘗作碑高風一編邈廢宇亦陵遲清泉漱白石霏霧蒙紫芝松蘿日蕭寂猿鳥自追隨遊人渺或詣隱者誰與期支郎篤清尙千里孤雲飛覽古玩青簡尋幽窮翠微顧予荷載守出宿簡書達憑師訪陳迹臘作攝山詩景定建康志

大慈寺在天台縣寺門巽隅號佛隴爲智顥法師宴坐處

佛隴山沈茂草平林間猶作誦經聲一心三觀休分別秋靜山高海月明天台山志

先照寺

一徑涼颯響萬松青霞紫霧祕靈蹤寒生列洞前溪雨聲到諸天午夜鐘山頂月高猶駕鶴潭陰雲起舊降龍出塵境界無多遠已上金庭第七重四朝詩

余  
靖

靖字安道韶州曲江人天聖二年進士累除右正言知制誥出知吉州經略廣西南路安撫使僕

山寺獨宿

柴車走縣封，窮途秋耿耿。急雨帶溪聲，殘燈背窗影。驅馳下士身，淒涼旅人景。山寒夢不成，愁多知夜永。

留題澄虛亭

湖光湛寒碧，簾影拂莓苔。魚戲應同樂，鷗閑亦自來。雨餘輕鶯合，竹外雜花開。久欲留詩去，慚無綺靡才。

晚至松門僧舍懷寄李太祝

日暮倦行役，解鞍初息肩。霧昏臨水寺，風勁欲霜天。蓼浦初聞雁，人家半在船。思君已惆悵，黃葉更翩翩。

馬當呼鷗不至偶成呈同時諸官

昔年曾汎馬當灣，團飯喚鷗篙櫓閒。今日江邊飛不下，應知人世足機關。

送靈谷山人

萬樹秋風一路蟬，渡頭重檣木蘭船。自慚蹙頰非奇骨，擬問清朝躍馬年。以上武溪集

曾公亮

公亮字明仲，會子。天聖二年進士。嘉祐中，拜吏部侍郎，同中書門下平章事。熙寧二年，進昭文館大學士。累封魯國公。旋以太保改仕，卒贈太師中書令。謚宣靖。

宿甘露僧舍

枕中雲氣千峯近，牀底松聲萬壑哀。要看銀山拍天浪，開窗放入大江來。鎮江府志

黃孝先

宋詩紀事 卷十一

孝先字子思。浦城人。天聖二年進士。爲宿州司理。以薦遷大理丞。知咸陽縣。終太常博士。余嘗守官咸陽縣。廨之後臨渭河。汀嶼中連歲中有孤雁來棲於葭葦中。今歲冬深不復至矣。或已在矰弋。或去而之他。皆不可知也。感而爲詩題亭壁。

天寒霜落雁來棲。歲晚川空雁不歸。江海一身多少事。清風明月我需衣。侯鯖錄

弔宿州妓張溫卿

人生第一莫多情。眼看仙花結不成。爲報兩京才子道。好將詩句弔溫卿。

句

恩同花上露。留得不多時。

能改齊漫錄。宿州妓張玉姐。字溫卿。色藝冠一時。沈子山爲獄掾。最所鍾愛。罷官途次南京。念之不忘。爲剔銀燈一闋云。一夜隋河風勁。霜混水天如鏡。古柳長堤。寒煙不起。波上月無流影。那堪嬾聽疎星外。離鴻相應。須信道情多足病。酒未到愁腸還醒。數疊蘭衾。餘香未滅。甚時枕鶯重並。教伊須更將盟誓後言約定。其後明道中。張子野黃子思相繼爲掾。尤賞之。偶陳師之求古以光祿卿來掌榷酤。溫卿遂托其家。僅二年而亡。才十九歲。子思以詩弔之云云。先是子思有愛姬。宜哥。客死舟中。遺言葬堤下。冀他日過此得一見。以慰孤魂。子思從之。

作詩納棺中。其斷章云云。二人皆葬宿州之東。

日者未知裴令貴。世人爭笑禡生狂。詠懷風簾燕引五六子。露井榴開三四花。春明退朝錄

孫甫

甫字之翰。陽翟人。舉進士。歷右正言。臺天章閣待制。可比轉重吏。有集。

成都通司園亭詩和章質夫

小亭

蕭森玉谿南。小亭屹相向。使華雙輶車。禪境二方丈。固將物理齊。室隘志自廣。松竹周四簷。足以備幽賞。

西園

小閣連雪峯。憑闌憇幽玩。紅接海棠洲。綠對篔簾岸。有時開尊罍。波影浸几案。何須架長虹。然後沖雲漢。  
成都文類

句

衰病自憐無酒趣。塵容猶賴有詩情。乞茶歷代吟譜。

周元明

同胡武平遊南園

爛漫花時錦繡張。無端下馬繫垂楊。山亭水閣笙歌地。合與行人作醉鄉。  
吳郡志

張方平

方平字安道。宋城人。舉茂才異等。爲校書郎。英宗朝。累遷禮部尚書。出知鄆州。神宗卽位。拜參知政事。致仕。薨贈司空。謚文定。有樂全先生集。

冷齋夜話。張文定慶歷中嘗爲滁州遊琊琊山藏院。俛仰久之。呼左右取梯升梁。得經函發之。得楞伽經。餘半卷未寫。忽悟前身蓋知藏僧也。寫楞伽經未畢而化。因續書殘軸。筆蹟宛然如昔。因號二生經。後以此經授東坡爲序。其事代寫此經刻于浮

玉山龍遊寺

吳江道中寄王君貺侍郎

畫船浮震澤。煙水接秋空。一霎過雲雨。滿帆開岸風。酒旗蓮蕩裏。僧刹橘洲中。何似并州路。塵高馬隊雄。

蘇子瞻寄鐵藤杖

隨書初見一枝藤。入手方知鍛鍊精遠寄。只緣憐我老。閑攜常似共君行。靜軒獨倚身同瘦。小圃頻遊腳爲輕。何日歸舟上新洛。拄來河岸笑相迎。

題歌風臺

落魄劉郎作帝歸。樽前感慨大風詩。淮陰反接英彭族。更欲多求猛士爲。

題沛縣漢高祖廟

中酒疎狂不治生。中陽有土不歸耕。偶因世亂成功業。更向翁前與仲爭。以上樂全先生集

石林詩話。安道未第時貧甚。衣食殆不給。然意氣豪邁。未嘗少貶。與劉潛。李冠。石曼卿。往來山東諸郡。任氣使酒。見者皆傾下之。沛縣有漢高祖廟。并歌風臺。前後題詩甚多。無不推功頌德。獨安道詩云云。蓋自少已不凡矣。

送蘇子由監筠州酒稅

可憐萍梗飄蓬客。自歎匏瓜老病身。從此空齋挂塵楊。不知重掃待何人。

苕溪漁隱落話。東坡言元豐三年。家弟子由謫官筠州。安道自此時爲別。已而涕下。安道平生未嘗出涕向人也。

王琪

字君玉。華陽人。徙舒。舉進士。調江都主簿。歷官知制誥。加樞密直學士。

耆舊續聞。翰林學士彭乘。不訓其子文學。參軍范宗翰學士責之曰。王氏之琪。珪玷琰器。盡璠璵。韓氏之綜絳縝維。才皆經緯。非蔭而得。由學而然。紺素雜記西清詩話。言王君玉謂人曰。詩家不妨間用俗語。尤見工夫。雪止未消者。俗謂之待伴。嘗有雪詩。待伴不禁鴛瓦冷。羞明常怯玉鉤斜。待伴羞明皆俗語。而採拾入句了無痕類。此點瓦礫爲黃金手也。

鍾山語錄。或歌王琪詩句。荆公曰。  
琪詩時有奇句。然雕鎔不自在。

石林詩話。晏元獻守南都。王君玉時已館閣校勘。公特請於朝。以爲府僉判。朝廷不得已。使帶館職從公。外官帶館職。自君玉始。賓主相得。日以賦詩飲酒爲樂。佳時勝日。未嘗輒廢也。嘗遇中秋陰晦。齋廚夙爲備。公適無命。旣至夜。君玉嘗使人伺公。曰已寢矣。君玉亟爲詩以入。曰。只在浮雲最深處。試憑弦管一吹開。公枕上得詩大喜。即索衣起。逕召客。治具大合樂。至夜分。果月出。遂樂飲達旦。前輩風流固不凡。然幕府有佳客。亦自如人意也。

堯山堂外紀。王琪張亢同在晏元獻幕。張肥大。王以太牢目之。王瘦小。張以獮猴目之。一日有米綱至八百里村。水淺當剝載。張往督。王曰。所謂八百里駁也。張曰。未若三千年精矣。琪嘗嘲亢曰。張亢觸藩成八字。亢應聲曰。王琪望月叫三聲。

### 題揚州九曲池

越調誰家曲。當年亦九成。哀音已亡國。廢沼尙留名。儀鳳終沈影。鳴蛙祇沸聲。淒涼不可問。落日背蕪城。

復齋謾錄晏元獻赴杭州道過維揚憩大明寺暝目徐行使侍史誦壁間詩戒其勿言姓名終篇者無幾又誦一詩云云問之乃江都尉王琪所作召至同飲又同步池上時春晚已有落花晏云每得句或彌年未嘗強對且如無可奈何花落去至今未能也王應聲曰何不云似曾相識

燕歸來晏大喜由此薦爲館職

著溪漁隱叢話昭陵諸臣傳元

獻未知杭州復齋所記誤也

### 金陵賞心亭

千里秦淮在玉壺江山清麗壯吳都昔人已化遼天鶴舊畫難尋臥雪圖冉冉流年去京國蕭蕭華髮老江湖殘蟬不會登臨意又噪西風入座隅

湘山野錄賞心亭丁晉公出鎮日重建秦淮絕致清在軒檻取所寶周昉袁安臥雪圖張子亨之屏凡經十四守雖極愛而不敢輒覩偶一帥竊去以布畫鴈掩之君玉復守是郡登亭留詩云云詩與江山相表裏爲貿畫者之蕭斧也

### 題招隱寺

蒼崖何蟠回嘗爲隱君宅宋戴顥善琴隱居此山孰謂人琴亡松風正蕭瑟花閑雪英舞衛公玉夔詩在焉鹿去嵐泉冽山有鹿跑泉唐蔣防爲之銘經聲草堂迴天香中夜發月落山氣深清猿嘯亦絕如何人外迹輕爲世網別玉夔辨證

### 聞盜紅梅種遺晏同叔

館娃宮北發精神粉瘦瓊寒露葉新園吏無端偷折去鳳城從此有雙身

石湖梅譜承平時紅梅獨盛於姑蘇晏元獻公始移植西岡圃中一日貴遊賂園吏得一枝分接由是都下有二本王君玉時守吳郡聞益花種事以詩遺公當時罕得如此

秋日白鷺亭向夕有感一作向夕風晦有作

白鷺敞西軒檐宇窮爽塏千峯若連環翠色不可解是時天宇曠六幕無纖靄金斗熨秋江素練橫衣帶乾坤清且斂氣象朝昏改蘆花作雪風飛舞來滄海九霄汀鷺起萬里檣鳥快月上三山頭鳥沒橫塘外蒼茫洲渚寒錯落星斗大開樽屏絲竹披襟五簫籟余生本江湖偃蹇欣所會清興雖自發苦嗜亦吾累魚龍憑夜濤四面忽滂湃安得然犀燈煌煌發水怪

清輝殿觀唐明皇山水石字歌

皇家四葉恢聖功天臨日燭清華戎漢條靜治洽柔教老心稽古開神聰有唐英主稱好文仙毫灑落驅風雲壯哉山水有奇字煥乎八法存翠珉自從棄置咸陽道蘚駁煙滋委宮草天開神贊會休辰甄收再作皇居寶如何淪棄三百春迎逢睿鑒來紫宸奎鉤粲粲光華動羣玉森森氣象新丹籞春妍瑞靄深文梁藻棟結芳林鴻翔鳳翥徑方丈杯流泉涌蒙親臨鰽臣榮幸從金輿鉤婉魂驚拭目初多慚攬筆非清藻唯慶千齡際帝圖

答永叔問月

斑斑疎雨寒無定皎皎圓蟾望欲闌應在浮雲儘深處更憑絲竹一催看以上宋文鑑

絕句

香溪春老誤尋芳。只有愁雲映夕陽。今日重來已如此。何須更問海生桑。  
正月初弦二月賒。小園春事已如麻。強誇力健因移石。不減公忙爲種花。

後村詩話

句

疾風甚雨青春老。瘦馬疲牛綠雨深。  
優古堂詩話

隴鴈半驚秋似水。征人相顧月如霜。

聞角

西清詩話

露槿東西照。風荷向背愁。

余良肱

涼吹易成團扇恨。夕陽偏結小窗愁。

後村詩話

良肱字康臣。洪州分寧人。天聖四年進士。調荊南司理參軍。歷三司判官。光祿卿。知宣州。提舉玉隆觀。  
曰潞按汴京遺蹟志載宋登科記天聖三年四年停貢舉而余良肱史作四年進士未知孰是

和蔣穎叔涇溪

畫舸夷猶紫翠閒。暮雲如埽月如環。三山六刺須臾過。恰似嚴陵七里灘。

寧國府志

韓琦

琦字穉圭。安陽人。天聖中進士第二。歷同中書門下平章事。集賢殿大學士。累封魏國公。薨贈尚書令。謚忠獻。徽宗論定策勳。贈魏郡王。有安陽集。

迂叟詩話。韓魏公罷相守北京。新進多凌侮之。魏公鬱鬱不得志。嘗爲詩云。風定曉枝蝴蝶鬧。雨匀春圃桔槔閑。時人稱其微婉。

皇朝類苑。韓魏公知定州。因作閱古堂。自爲記刻于石。後人又畫魏公像于堂上。宋子京知定州。作樂歌十闋。其一曰。聽說中山好。韓家閱古堂。畫圖真宰相。刻石好文章。魏公聞之不喜。

### 和邃卿學士雪霽登祕閣

曉來延閣步層梯。春色周圍一望低。殘雪半留珠殿冷。非煙長護綺窗西。幽情自逐歸鴻斷。芳意還應遠。樹迷金匱有書猶未見。祕封香篆鎖芝泥。

### 九日水閣

池館驟摧古榭荒。此延嘉客會重陽。雖慚老圃秋容淡。且看黃花晚節香。酒味已醇新過熱。蟹螯先實不須霜。年來飲興衰難強。漫有高吟力尙狂。

皇朝類苑。魏公在北門。重陽宴諸曹于後園。有詩一聯云。不羞老圃秋容淡。且看黃花晚節香。公居常謂。保初節易。保晚節難。故晚節事尤著。所立特完。又作喜雪詩一聯云。危石蓋深鹽虎陷。老枝擎重玉龍寒。人謂公身雖在外。自任以天下之重如此。

### 和御製賞花釣魚詩

花簇香亭萬朵開。瑤輿高自九天來。輕陰閣雨留天仗。寒色凝春送壽杯。仙吹徹雲終縹緲。恩魚逢餌幾徘徊。曾參二十年前會。今備台司得再陪。

李壁王荊文公詩注。公旣進詩。或言於上曰。韓琦譏切陛下。上愕然問之。對曰。琦二十年而得一再侍宴。此正譏陛下飲宴無度也。上大笑。

### 和春卿學士柳枝詞

章臺風曉起新眠。寒食輕陰未雨天。無限青絲拂遊騎。一生芳意負金鞭。以上安陽集

早夏

脫幘吏休後。凭軒風快餘。瀑泉增瀨急。新葉補林疎。

暑初天未熱。觀閣進新涼。果熟愁枝重。荷生覺渚香。

十里溪源注北塘。貯成寬碧澹泱泱。新蒲弱荇參差綠。去鷺來鳧斷續。行一攬輕波搖鷁舸。滿簪斜日曬魚梁。使君思拙無清夢。高柳陰成草自長。

吳禮部詩話韓魏公手書早夏三詩備蕭散閑適之趣安陽集所無

包拯

拯字希亡。廬州合肥人。天聖五年進士。歷官龍圖閣直學士。御史中丞。知開封府。權三司使。樞密副使。遷禮部侍郎。辭不受。卒謚孝肅。

書端州郡齋壁

清心爲治本。直道是身謀。秀幹終成棟。精鋼不作鉤。倉充鼠雀喜。草盡兔狐愁。史冊有遺訓。毋貽來者羞。廬州府志

吳奎

奎字長文。羅州北海人。第進士。神宗朝歷官樞密副使。參知政事。以資政殿大學士出知青州。卒

贈兵部尙書謚文肅

雲門留運上人房

雲門入雲深。樹密山轉幽。溪亭脩竹裏。激激玉泉流。仁智所遐想。古今爲勝遊。我乘休沐至。窮覽浩難周。金碧樓殿午。寒香松桂秋。清風連高興。飄越不可收。禪師索題詩。投筆事冥搜。欲速馳思遠。頃刻歷九州。象外有真物。惝恍難爲求。徒勞陳熟言。羞澀爲爾留。

汎五雲溪由鑑湖歸

樵風漾歸舟。飄然一葉輕。曲岸超忽遠。四山回抱明。幽禽淡容與。荷芰相低傾。田野多收穫。村叟時逢迎。歡言無物役。得我遊覽情。日腳暮雲起。湖面寒煙生。秋光湛空碧。彷彿見重城。候吏津亭外。稍聞笳鼓聲。

以上雲門集

句

奚車一牛駕。朝馬兩人騎。使北 詩話總龜

趙

抃字閱道。衢州西安人。進士及第。歷官龍圖閣直學士。知成都。神宗朝擢參知政事。以資政殿大學士出知外郡。加太子少保致政。卒贈太子少師。謚清獻。有集。

石林詩話。趙清獻以清德服一世。平生蓄雷氏琴一張。鶴與白龜各一所向。與之俱始除帥成都。蜀風素侈。公單車就道。以琴鶴龜自隨。蜀人安其政治。聲籍甚。元豐閒。既罷政事。守越。再移蜀。公時老矣。過泗州渡淮。前已放鶴。至是復以龜投淮中。乃入

見先帝問云。聞卿前以匹馬入蜀。所攜獨琴鶴廉者。固如是乎。公頓首謝。故其詩有馬尋舊路。知歸去。龜送長淮不再來。自紀其實也。

暖風

薄袂歌雲散。輕雲舞袖低。簾疎蕩樓閣。塵暗逐輪蹄。絮亂垂楊道。香流種藥畦。春窗惱春思。一枕杜鵑啼。

芳草

翠密馴文雉。叢深隱畫輪。離披金谷曉。寂寞茂陵春。古渡班荆客。長隄走馬人。芊芊似袍綠。一雨一番新。

杜鵑

響亂書窗外。人驚夢枕中。江城啼曉月。澤國憩春風。柳道盤滄綠。桃園蹀躞紅。年年來此地。留恨任西東。

寒食郊園卽事

城郭青煙散。郊園麗日長。鬪雞紅錦翅。遊騎紫絲轂。有蝶俱含粉。無人不惜芳。儘拚花下飲。歸去醉成鄉。

和何節判觀水

澄江抵練長。極目路蒼茫。煙芷差差綠。風荷柄柄香。西流終古恨。南浦鎮時忙。擬待傳辭意。離人在楚鄉。

題戲綵堂

我憩堂中樂可知。優游踰月竟忘歸。老萊不及吾兒少。且著朱衣勝綵衣。以上趙清獻公集。

蓉塘詩話。宋趙帆倅溫州時。其父清獻公致仕。家居。帆迎以就養。作堂名戲綵公。題詩堂中云。

寄張山人時再領成都

不同參政初時入。謂呂餘慶也學尙書兩次來。謂張乖崖。到日先生應笑我。白頭猶自走塵埃。

灤水燕談治平初。龍圖閣直學士趙公抃鎮成都。有張山人者數至李道士舍。一日語李曰。龍圖公促治裝行當入觀。且參大政矣。趙聞而異之。未幾果應召命。乃參政柄及鎮青社。熙寧五年。張遺書云。當來相見。公大喜。久之無驗。至秋公奉詔再領成都。方悟曰。山人言來乃吾當往也。將行先寄張云云。

### 王陶

陶字樂道。京兆萬年人。天聖五年進士。神宗朝歷簽書樞密。宣撫陝西。還爲侍讀學士。知蔡州。卒贈吏部尙書。謚文恪。

### 有竇復者世居鎮戎能道邊事

君不見鎮戎德順弓箭手。耕種官田自防守。相團置堡禦蕃軍。下視賊庭殊不有。殺羊取骨然艾炙。試卜賊兵知入寇。都校招呼入堡居。堡外重圍百里餘。牆低城小不難破。賊箭如棚城上過。堡中不及數十人。且鬪且罵且欣欣。登陴斫門謂平取。應弦死傷已無數。窗閒走箭射酋豪。一箭已聞哭聲舉。爭將錦囊裹賊屍。鳴金收衆唯恐遲。不唯城堡依然固。吾衆不傷毫與釐。自從干戈動西鄙。覆軍殺將曾無恥。朝廷未省遺邊功。何事此勳不能紀。安得天兵百萬衆。盡如此輩堅且勇。宋文鑑。

### 龔宗元

宗元字會之。崑山人。天聖五年進士。歷都官員外郎。有武丘居士遺稿。

吳郡志中隱堂在大酒巷。都官員外郎分司南京龔宗元所居。取樂天詩大隱住朝市。小隱入丘樊。不如作中隱。隱在留司間。乃作中隱堂與屯田員外郎程適。太子中允陳之奇遊從。極文酒之樂。皆耆德碩儒挂冠而歸者。吳人謂之三老。

六月吟

曦輪獵野枯杉松。火焚泰華雲如峯。天地爐中赤煙起。江湖煦沫烹魚龍。生綈渴獸唇焦斷。峻翮翻無聲落晴漢。飢民逃生不逃熱。血迸背皮流若汗。玉宇清宮徹羅綺。渴喝冰壺森貝齒。炎風隔斷真珠簾。池口金龍吐寒水。象牀珍簟凝流波。瓊樓待月微酣歌。王孫晝夜縱娛樂。不知苦熱還如何。

夜宴作

兔魄侵階夜三刻。蜀錦堆香花院窄。風動簾旌玳瑁寒。露垂蟲網珍珠白。美人正席羅弦管。綺幄雲屏爐麝煖。只恐金壺漏水空。不怕鸞觴琥珀滿。勸君莫負秉燭遊。曾見古人傷晝短。

贈處士林逋

高蹈遺塵蛻。含華傲素園。璜溪須下釣。蕙帳不驚猿。養浩時清肅。忘機只寓言。幾回生蟬翅。明月在西軒。  
送陳君子之四明

短亭祖帳接平川。柳拂回波繫畫船。漸向落暉分繡袖。忍聽離曲怨鶯弦。雲連稽嶺應懷古。路近光源好訪仙。那更憑高望天際。江堤煙重草綿綿。

星游耿耿寒煙浮。白龍銜月臨霜樓。誰家砧弄細腰杵。一聲擣破江城秋。雙桐老翠墮金井。高低冷逐西風緊。靜如秋籟暗穿雲。天末驚鴻斷斜影。哀音散落愁人耳。何處離情先喚起。長信宮中葉滿堦。洞庭湖上波平水萬里。征夫眠未成。搖風擣月何丁丁。楚關秦嶺有歸客。一枕夜長無限情。以上中吳紀聞

丘濬

濬字道源。黟縣人。天聖五年進士。爲句容令。歷官至殿中丞。後在池州。一起盥沐。索筆爲詩。端坐而逝。衆謂尸解。有洛陽貴尙錄。

古今詩話。丘濬十歲謁陳州太守。令對弱

柳絲絲搓綠線。對云春雲片片揭新綿。

翰府名談。丘寺丞失意。徧遊諸郡。至山陽。郡守屢召之夜飲。翌日作詩曰。醜卻天下美人面。正得世間男子心。郡守它日再爲文字之飲。以謝之。又至五羊。贈太守詩云。塔上腥臊堆蠍子。口中濃血吐檳榔。又云。風腥蠻市合。日上瘴雲紅。守見之不懼。

淵聖皇帝要錄。靖康中。金人圍京城。朝廷急於命將。有郭京者。自云。用六甲法。可以擒敵。朝廷錫以金帛。使自募兵。有賣線兒。京授以將命。又有劉無忌。乃賣藥道人。常倒植泥中。乞錢。亦作統制官。蓋取丘濬詩有郭京楊式劉無忌。皆在東南臥白雲之譏。郭京出前軍。爲金兵一掃而空城遂陷。

寺中聞射因成十歲時作。

殿宇時聞燕雀鳴。虛庭盡日少人行。孤吟獨坐情何限。時喜風傳中鵠聲。古今詩話。

至儀真太守召看牡丹

何事化工情愈重，偏教此卉太妖妍。  
王孫欲種無餘地，顏巷安貧欠買錢。  
曉檻競開香世界，夜闌誰結醉因緣。  
須知村落桑麻處，田叟飢耕婦不眠。

贈五羊太守

碧睛蠻婢頭蒙布，黑面胡兒耳帶環。  
幾處樓臺皆枕水，四周城郭半圍山。  
以上翰府名談

秩滿寄茅山道友

鳴鳳相邀覽德輝，松蘿從此與心違。  
孤峯萬仞月正照，古屋數間人未歸。  
欲助唐虞開有道，深慚巢許勸忘機。  
明朝又引輕帆去，紫朮年年空自肥。  
新安志

詠錢塘

南屏高瞰府城西，畫舸千艘共醉迷。  
四柱臺邊煙是幕，百花橋畔葑連隄。  
龍檀咽路迎輦隼，綺繡登山汙粉題。  
幕色沈沈郛郭閑，寶燈輝映梵天低。  
咸淳臨安志

吳育

育字春卿，建安人。天聖五年進士。累官樞密副使、參知政事。尋以資政殿大學士、尚書左丞、知河中府，徙河南，卒。贈吏部尚書，謚正肅。有集。

題峴山石幢

羊公千載得清吟，芳跡雖遙契告心。  
更與峴山爲故事，凜然風格照來今。  
襄陽府志

王舍章

舍章處州守。

題仙都山

三年爲郡仰靈蹤，咫尺無因到此中。  
長是徘徊看圖畫，果然嶠崿在虛空。  
雲歸湖頂塵雖染，鶴立松梢路莫通。  
春過碧溪人玩少，古壇牢落雨濛濛。仙都山志

孫 扌

抃字夢得，眉山人。天聖中進士，累遷知制誥、翰林學士承旨，拜參知政事，謚文懿。有集。

郡齋讀書志。孫抃六世祖長孺喜

藏書貯以樓。蜀人號書樓孫家。

端午日皇后閣帖子詞

蟠桃映砌晨烟薄，紫桂凌霄晝露晞。  
窈窕漢宮三十六，齊將綵縷祝坤闈。

萬功寶笈千齡藥，又賜金盤五色瓜。  
從此仙源昇福遠，綿綿不獨頌周家。  
古今歲時雜詠。

彭應求

應求，廬陵人。渠陽推官思永之父。

宿崇聖院

公程無暇日，暫得宿清幽。  
始覺空門客，不生浮世愁。  
溫泉喧古洞，晚磬度危樓。  
徹曉都忘寐，心疑在沃洲。

濂溪先生集附.

宋詩紀事

卷十一

二九八

# 宋詩紀事卷十二

錢唐厲鶚緝

祁門馬曰璐同緝

阮逸

逸字天隱建陽人安定先生胡瑗之門人天聖五年進士爲鎮江軍節度推官皇祐中與瑗同典樂事遷尚書屯田員外郎

隱居詩話至和中阮逸爲王宮記室王能詩與逸唱和有句曰易立  
太山石難枯上林柳有言其事者朝廷方治之會逸坐他事因廢棄

題竹閣在嚴州能仁寺之南

僧閣倚寒竹幽襟聊一開清風曾未足明月可重來曉意烟垂草秋姿露滴苔佳賓何以竚雲瑟與霞杯  
嚴州府志

張維

維烏程人子野之父仁宗朝衛尉寺丞贈尚書刑部侍郎子野取父平生所自愛詩寫之縑素號十詠圖

聞砧

宋詩紀事卷十二

遙野空林砧杵聲。淺沙棲雁自相鳴。西風送響暝色靜。久客感秋愁思生。何處征人移寒帳。卽時新月落江城。不知今夜擣衣曲。欲寫秋闌多少情。

庭鶴

戢翼盤桓傍小庭。不無清夜夢烟汀。靜翹月色一團素。閑啄苔錢數點青。終日稻梁聊自足。滿前雞鷺漫相形。已隨秋意歸詩筆。更與幽棲上畫屏。

玉蝴蝶花

雪朶中間蓓蕾齊。驟開尤覺繡工遲。品高多說瓊花似。曲妙誰將玉笛吹。散舞不休零晚樹。團飛無定撼風枝。漆園如有須爲夢。若在藍田種更宜。

孤帆

江心雲破處。遙見去帆孤。浪闊疑升漢。風高若泛湖。依微過遠嶼。彷彿落平蕪。莫問乘舟客。利名同一途。

太守馬大卿會六老于南園

賢侯美化行南國。華髮欣欣奉宴娛。政績已聞同水薤。恩輝遂喜及桑榆。休言身外榮名好。但恐人間此會無他日。定知傳好事。丹青寧羨洛中圖。

歸燕

社燕春秋歸何處。鄉羣雖老稻青黃。猶能時暫棲庭樹。漸學稀疎度苑牆。已任風庭下簾幕。卻隨烟艇過瀟湘。前春認得安巢所。應免差池揀杏梁。

宿後陳莊

臘凍初開茗水清。烟村遠郭漫吟行。  
灘頭斜日鳬鷺隊。枕上西風鼓角聲。  
一棹寒燈隨夜釣。滿犧晉雨趁春耕。  
誰言五福仍須富。九十年餘樂太平。

送丁遜秀才赴舉

鵬去天池鳳翼隨。風雲高處約先飛。  
青袍賜宴出關近。帶取瓊林春色歸。

貧女

蒿簪掠鬢布裁衣。水鑑雖明亦嬾窺。  
數畝秋禾滿家食。一機官帛幾梭絲。  
物爲貴寶天應與。花有秋香春不知。  
多少年來豪族女。總教時樣畫蛾眉。

句其五宿清江小舍破損僅存一句

菰葉青青綠荇齊

齊東野語孫莘老十詠圖序云張維吳興人少年學書貧不能卒業去而躬耕以爲養善教其子至于有成平居好詩以吟詠自娛浮遊閭里上下于溪湖山谷之間遇物發興率爾成章不事雕琢之巧采繪之華而雅意自得徜徉閑肆往往與異時處士能詩者爲輩公不出仕而以子封至四品行年九十有一公卒十八年公子尚書都官郎中先亦致仕家居取公生平所自愛詩十首寫之繅素號十詠圖傳示子孫

唐詢

詢字彥猷錢唐人天聖中賜進士及第除工部員外郎擢起居注知制誥出知杭蘇青三州拜翰

林學士卒贈禮部侍郎有集

皇宋書錄唐彥猷弟詔彥範俱擅一時才雅之譽彥猷知書好古彥範文  
章氣格高簡不屈竦秀比六朝人物尤精翰墨遺一小札亦必華戇妙管

爲杭州日送客舟中

山雨霏微不滿空。畫船來往疾輕鴻。  
誰知獨臥珠簾裏。一榻無塵四面風。  
咸淳臨安志。

顧亭林

平林標大道。曾是野王居。舊里風烟變。荒原草樹疎。  
湖波空上下。里閈已丘墟。往事將誰語。淒涼六代餘。  
柘湖

世歷亡秦遠。湖連大海濱。柘山標觀望。玉女見威神。  
渺渺旁無地。滔滔孰問津。何年化魚鼈。鬢鬚歷陽人。  
以上松江府志

王拱辰

拱辰字君貺。咸平人。天聖八年進士第一。元名拱壽。仁宗賜今名。歷官翰林學士。武安軍節度使。  
哲宗立。加檢校太師。卒贈開府儀同三司。謚懿恪。

耆英會年七十一

西都山水天下奇。神嵩景室環清伊。  
自注上古太室山爲景室山。甫申閒氣秀不絕。生賢會聖昌明時。  
衣冠數盛文雅台。符鄉月光離離。魏京雄奧壓幽朔。遊宮御府嚴天威。  
膏田千里翳桑柘。犀甲萬旅馴熊羆。公

當緩帶名三鎮懸亦繼軫承保釐追推契遇最深舊加復雍孟交旌麾仁皇一莊龍虎榜桂堂先後攀高枝宦遊出處五十載鸞臺驛路俱騰夷三公極位固遼隔五年以長猶肩隨公今復主鳳門鑰僕亦再撫銅臺圻二京相望阻河廣三徑不克陪遊嬉忽聞幹步踵門至投我十二耆英詩整冠肅貌諷章句若坐寶肆羅珠璣爲言自傳有高躅九君結社真可師欲令千載著風迹亟就僧館圖神姿詞宗端殿序篇目滂灑大筆何淋漓眷言履道靡克訥菟裘近邑將營歸取云繪素得精筆願列霜壁如唐規退居舊相國元老十年還政灑之涯康寧富貴備五福靈寶盛氣如虹霓昔年大對繼晁董登科賜第一期自注皆天聖八年紫垣步武旣通接金沙里閈還鄰比探禪論道劇訓對摩軋太古窮天機二賢勳業冠朝省爵齒官學誰依稀今將圖畫表來世詎可下客聯纓綏旣蒙月品定人物不敢循避違風期況承開閣厚賓客富有景物佳園池銅駝坊西福善宅修竹萬箇籠清漪天光臺高未百尺下眺林嶺如屏帷花王千品盡殊勝風光繡畫三春暉六相街中潞公第碧瓦萬木煙參差左隅廟室本經禮右閣宸翰尊星奎婆娑青鳳舞松柏煥爛素錦薰醺釀石渠飛溜漱寒玉晝夜竽瑟鳴堦墀伊予陋宇治窮僻姑喜地廣爲環溪樓名多景可曠望臺號風月延清暉四時花薦不外假拏舟傲幘聊嬉怡懷歸撫事若飢渴恨無羽翼西南飛人生交舊貴倫輩情親意接心相知豈無晚秀負才蘊高談大笑拘禮儀洛中故事名義燕二毛第一年相推灑冠登仕荷天寵尊君報國當百爲旣嗟大耋盍知止納祿謝事皆所宜顧方北道倚煩劇未許解紱披荷衣長篇不令負花約自注公貽莫負花前約之句爲指風什歌式微如羹甘露爽心骨似柄玉塵親

顏眉蘭叢雖未長羅宅菊英似亦思陶籬子山已著小園賦彥倫猶媿鍾山移聊據短引謝招隱肯使猿

鶴常驚啼 司馬光洛中耆英會詩

史院席上奉和首吳相公原韻

累聖千春統 編年四紀餘  
官歸柱史筆 經約魯麟書  
班馬才長矣 仁英道偉歟  
恩招宴東觀 醉酒荷盈車  
揮麈後錄

挽老蘇先生

氣得岷峨秀 才推賈馬優  
未承宣室問 空有茂陵求  
玩易窮三聖論 書正九疇欲知歆向學  
二子繼弓裘

歐陽脩

脩字永叔廬陵人 天聖八年省元中進士甲科  
累擢知制誥翰林學士歷樞密副使參知政事  
神宗朝遷兵部尚書以太子少師致仕卒贈太子太師  
謚文忠晚號六一居士有六一居士集  
孔平仲談苑慶歷中西師未解晏元獻爲樞密使大雪置酒西園歐陽永叔賦詩云須憐鐵甲冷徹骨  
四十餘萬屯邊兵晏曰昔韓愈亦能作言語赴裴度會但云園林窮勝事鍾鼓樂清時不會如此合闢

石林詩話歐公矯覲  
體專以氣格爲主

詩林廣記歐陽永叔詩如春服既  
成春酒既醞登山臨水竟日忘歸

雪浪齋日記或疑六一居士詩以爲未盡妙以質于子和子和云六一詩只欲平易耳西風酒旗市細雨菊花天豈不佳晚煙寒橘柚秋色老梧桐豈不似少陵

優古堂詩話韓子蒼言歐陽文忠寄荆公詩云翰林風月三千首吏部文章二百年吏部蓋謂北史謝朓于宋明帝時爲尚書吏部郎長五言詩沈約嘗云二百年來無此作也文忠之意直使謝朓事而荆公答之曰他日若能窺孟子終身安敢望韓公

則荆公之意竟指  
吏部爲退之矣

則荆公之意竟指  
吏部爲退之矣

放陶孫詩評歐公如四

瑚八璉止可施之宗廟

能改齋漫錄歐陽文忠公詩云拂面蜘蛛占喜事入簾蝴蝶報佳人自注云李賀詩東家蝴蝶西家飛

白騎少年今日歸蓋用李淳風占怪書云蛻忽入人宅舍及帳幕內者主行人卽返又云生貴子吉

### 廬山高贈同年劉凝之歸南康

廬山高哉幾千仞兮根盤幾百里巒然屹立乎長江長江西來走其下是爲揚瀾左蠡兮洪濤巨浪日夕相春撞雲消風止水鏡淨泊舟登岸而遠望兮上摩雲霄之掩靄下壓后土之鴻龐試往造乎其間兮攀緣石磴窺空巆千巖萬壑響松檜懸崖巨石飛流淙水聲聒聒亂人語六月飛雪灑石矼仙翁釋子亦往往而逢兮吾嘗惡其學幻而言唵但見丹霞翠壁遠近映樓閣晨鍾暮鼓杳靄羅幡幢幽花野草不知其名兮風吹露溼香澗谷時有白鶴飛來雙幽尋遠兮不可極便欲絕世遺紛厖羨君買田築室老其下插

秧盈疇兮有酒盈缸欲令浮嵐暝翠千萬狀坐臥常對乎軒窗君懷磊砢有至寶世俗不辨珉與玒策名爲吏二十載青山白首困一邦寵榮聲利不可以苟屈兮自非青雲白石有深趣其氣兀肆何由降丈夫壯節似君少嗟我欲說安得巨筆如長杠

王直方詩話郭功父少時喜誦文忠公詩一日過梅聖俞曰近得承叔書方作廬山高詩送劉同年自以爲得意恨未見此詩功父爲誦之聖俞擊節歎賞曰使吾更作詩三十年亦不能道其中一句功父再誦不覺心醉遂置酒又再誦酒數行凡誦十數偏不交一談而罷梅聖俞贈郭功父詩其略曰一

誦廬山高萬景不得藏設令古畫師極意未能詳

明妃曲和王介甫作

胡人以鞍馬爲家射獵爲俗泉甘草美無常處鳥驚獸駭爭馳逐誰將漢女嫁胡兒風沙無情面如玉身行不遇中國人馬上自作思歸曲推手爲琵卻手琶胡人共聽亦咨嗟玉顏流落死天涯琵琶卻傳來漢家漢家爭按新聲譜遺恨已深聲更苦纖纖女手生洞房學得琵琶不下堂不識黃雲出塞路豈知此聲能斷腸

漢宮有佳人天子初未識一朝隨漢使遠嫁單于國絕色天下無一失難再得雖能殺畫工于事竟何益耳目所及尙如此萬里安能制夷狄漢計誠已拙女色難自誇明妃去時淚灑向枝上花狂風日暮起飄泊落誰家紅顏勝人多薄命莫怨春風當自嗟

石林詩話前輩詩文各有平日得意不過數篇然他人未必能盡知也昆陵正素處士張子厚善書余嘗于其家見歐陽公子榮以烏絲闌絹一軸求子厚書文忠公明妃曲兩篇廬山高一篇略云先公平生未嘗矜大所爲文一爲被酒語柴曰吾詩廬

山高今人莫能爲，唯李太白能之。明妃曲後篇太白不能爲，雖杜子美能之，至于前篇則子美亦不能爲，唯吾能之也。因欲別錄此三篇藏之，以誌公意。余在汝陰見渠問之亦然。今閱公詩者，蓋未嘗獨異此三篇也。

### 禮部貢院閱進士試

紫案焚香暖吹輕，廣庭清曉席羣英。  
無譁戰士銜枚勇，下筆春蠶食葉聲。  
鄉里獻賢先德行，朝廷列爵待公卿。  
自慙衰病心神耗，賴有羣公鑑識精。

石林詩話：至和嘉祐間，場屋舉子爲文尚奇澀，讀或不成句。歐公力欲革其弊，既知貢舉，凡文涉雕刻者皆黜之。時范景仁、王禹玉、梅公儀、韓子華同事，而梅聖俞爲參詳官，未引試前，唱酬詩極多。歐公有無譁戰士銜枚勇，下筆春蠶食葉聲；聖俞有萬蟻戰酣春晝永，五星明處夜堂深。亦爲諸公所稱。及放榜，平時有聲如劉暉輩，皆不預選。士論頗洶洶，未幾詩傳，遂闕然以爲主司。唯唱酬不暇詳考，且言以五星自比，而待我輩爲蠶蟻，因造爲醜語。自是禮闈不復作詩。終元豐末幾三十年，元祐初，稍稍爲之，要不如前日之盛。然是榜得蘇子瞻爲第二人，子由與曾子固皆在選中，亦不可謂不得人矣。

### 夢中作

夜涼吹笛千山月，路暗迷人百種花。  
墓罷不知人換世，酒闌無柰客思家。

東坡題跋：南嶽李苗老好睡，衆人飽食下墓。苗老輒就枕，數局一展轉云：「我始一局，君幾局矣？」東坡曰：「李苗老常用四腳墓盤，只著一色黑子。昔與邊韶敵手，今被陳搏爭先，著時似有輸贏，著了並無一物。歐陽公夢中作詩云云，殆是謂也。」

### 批謝判官紙尾

淺深紅白宜相間，先後仍須次第栽。  
我欲四時攜酒去，莫教一日不花開。

西清詩話歐公守滁陽築醒心醉翁兩亭于鄉郊幽谷且命幕客謝某者雜植花卉其間謝以狀問名品公卽題紙尾云云其清放如此

唐崇徽公主手痕

故鄉飛鳥尚啁啾何況悲笳出塞愁青冢埋魂知不返翠崖遺迹爲誰留玉顏自古爲身累肉食何曾與國謀行路至今空歎息巖花野草自春秋

朱文公語錄玉顏自古爲身累肉食何人與國謀以詩言之第一等詩以議論言之第一等議論也

早朝感事

疎星牢落曉光微殘月蒼龍闕角西玉勒爭門隨仗入牙牌當殿報班齊羽儀雖接駕兼鶯野性終存鹿與麝笑報汝陰常處士十年騎馬聽朝雞

寄許道人昌齡

石唐仙室紫雲深穎陽真人此算心真人已去升寥廓歲歲岳花自開落我昔曾爲洛陽客偶向岳前坐磐石四字丹書萬仞崖神清之洞鎖樓臺雲深路絕無人到鸞鶴今應待我來以上居士集

西清詩話穎陽石唐山絕頂有石室邢和璞算心處治平中許昌齡早得仙術杖策來居焉歐陽文忠公守亳州聞之要致郡齋與語豁然有悟一日公問道許告以公屋宅已壞難復語此但明了前境猶庶幾耳且道昔遊嵩山日暮于絕壁上見苔蘚成文云神清之洞語祕不傳後公歸汝陰臨薨以詩寄之云云

寄韓子華

人事從來無處定。世塗多故踐言難。誰知潁水閑居士。十頃西湖一釣竿。

墨莊漫錄。歐陽公與韓子華、吳長文、王禹玉同直玉堂。嘗約五十八歲卽致仕。子華書于柱上。後過限七年方踐前志。作詩寄子華曰。俗諺云。也賣弄得過裏。

劉原父再昏以二絕戲之

平生志業有誰先。落筆文章海內傳。明日都城應紙貴。開簾卻扇見新篇。

仙家千載一何長。浮世空驚日月忙。洞裏桃花莫相笑。劉郎今是老劉郎。西清詩話。

顏太初

太初字醇之。徐州人。顏子四十七代孫。第進士官國子監直講。出爲臨晉簿。掌南京學。卒有鳬繹先生集。

許希并序

蘇東坡序略云。昔吾先君適京師。與士大夫遊。歸語軾曰。自今以往。文章其日工而道將散矣。士慕遠而忽近。貴華而賤實。吾已見其兆矣。以魯人鳩繹先生之詩文十餘篇示軾曰。小子識之。後十餘年。天下無復爲斯文者也。

鍼工許希。下蔡人。住梁門西市三十年。及天聖中。皇躬違豫。有內戚達其姓名。上召見。三進鍼而疾平。面授尙藥奉御。其賜予不可勝紀。謝恩畢。西向而拜。上詢其故。奏曰。臣拜本師扁鵲也。上惜其用心不忘本。給錢五十萬爲立祠。封曰靈應侯。或曰。人生乎世。慎乎習。希失其習者也。使希不習醫而習儒。其

遇主之日不忘先師明矣若然則讀書爲儒乘時取富貴高冠長劍昂昂廟堂之上自負自得不知素王之力者許希之罪人也因爲詩云

京城名利塗車馬相奔馳其間取富貴往往輸巫醫前後十數輩身沒名已墮獨有許希者蘊蓄何瑰奇始自下蔡來所處尤喧卑西市三十年汨汨無人知一朝仗至藝驟登文石墀三鍼愈上疾神速不移時酬以六尚官著籍通端闈旌以三品服佩紫垂金龜于時稱謝畢西向復陳儀當廳驚且問歷歷宣其辭臣傳扁鵲術遇主今得施特此一展謝臣心不自私主上惜其意繫賞爲噓唏仍給水衡錢國西命立祠復加靈應號金額照華棟自此輦轂下求禱何祁祁我過慶成坊見之心且悲秦醫術雖妙五藏及四肢所習得其人千齡祀不虧魯聖術至大帝道與民彝所習非其人一朝反相持小吏師苟況竊爲辨說資作相勸焚書詐云愚蚩蚩後之爲儒者其心皆李斯昔在布衣日勤守先王規朝談十二經夕誦三百詩依憑稽古力榮進無他歧及居廟堂上長劍冠峩巍自謂天所賦焉知有宣尼宣尼斷襲封十經寒暑移他姓爲邑官鄉老皆驚疑上章寢不報九重遭面欺諫官不舉失御史不言非盡爲許希笑得路忘先師

宋史文苑傳天聖中文宣公孔聖祐卒無子除襲封且十年是時有醫許希以鍼愈仁宗疾拜賜已西向拜扁鵲曰不敢忘師也帝爲封扁鵲神應侯立祠城西太初作許希詩指聖祐事以諷在位又致書參政蔡齊齊爲言于上遂以聖祐弟襲封

### 東州逸黨

天之有常度地之有常理人之有常道高下遵軌儀三才各定位萬古永不移二儀設有變修德可以祈人道或反常其亂何由支昔在典午朝國祚向陵夷日向中夜出赫赫來東陲

地向太極裂中有蒼鵝飛高厚災且異人妖亦繁滋始有竹林民怪誕名不羈次有夷甫輩高談慕無爲沈湎多越禮阮籍兼輔之虛名能飾詐光逸與王尼何曾有先見不能救其衰張華徒竭力無以扶其危至今西晉書讀之堪涕洟爾來歷千年炎宋運重熙東州有逸黨尊大自相推號曰方外交蕩然絕四維六籍被詆訶三皇遭毀訾阮儒愚黔首快哉秦李斯與世立憲度迂哉魯先師流宕終忘反惡聞有民彝或爲童牧飲垂髫以相嬉或作概量歌無非市井辭或作薤露唱發聲令人悲或稱重氣義金帛不爲貲或曰外形骸頂踵了無私塵聚復獲雜何者爲尊卑遙聞風波民未見如調飢偶逢紳帶士相對如拘磨不知二紀來此風肇自誰都緣極顯地多用寧馨兒斯人之一唱翕然天下隨斯人之一趨靡然天下馳鄉老爲品狀不以逸爲嗤宗伯主計偕不以逸爲非私庭訓子弟多以逸爲宜公朝論人物翻以逸爲奇家國盡爲逸禮法從何施我常病其事中夜起思惟平地三尺限空車登無歧重載歷百仞所來因陵遲萬一染成俗雖悔何由追衆人皆若夢焉能分其糜衆人皆若醉不知啜其醨天下皆病痿俾誰就魯醫天下皆病狂何暇灸其眉幸有名教黨可與決雄雌所嗟九品賤不得立文墀賈誼惟慟哭梁鴻空五噫終削南山竹冒死指其疵願乘九廟靈感悟宸心知赫爾奮獨斷去邪在勿疑分捕復大索檢人無子遺大者肆朝市其徒竄海渭殺一以戒萬是曰政之基千奴共一膽膽破衆自隱無使永嘉風敗亂昇平時

以上宋文鑑

宋史文苑傳山東人范諷石延年劉潛之徒豪放劇飲不循禮法後進多慕之太初作東州逸黨詩

章 傘

如歸亭在吳江之東天聖中趙令球建

吳江江上客亭幽地占姑蘇最上游萬頃重湖朝夕浪幾聲殘櫓往來舟涼生領袖蘋風晚冷射杯盤桂魄秋東道正閑時倒屣笙歌誰惜一遲留吳江縣志

葉 綱

如歸亭

拍天烟浪接滄溟識盡歸舟是此亭風遞秋香來橘社水資春味驗茶經捲簾江樹差差綠入坐湖山隱隱青魯望幽居在何處白鷗無主滿閑汀吳江縣志

何永錫

如歸亭

獨臨朱檻愛平波安穩歸舟兩兩過數島雲霞栽橘社一汀烟月採菱歌湖心定施青黛砌下風恬展碧羅好寫仙源槎閣主便教從此上銀河吳江縣志

陶伯宗

如歸亭

吾家本住洞庭西烟雨生涯接釣磯今日吳江亭上望水光山色卻如歸吳江縣志

梅 摯

摯，字公儀，成都新繁人。天聖中進士。擢殿中侍御史。戶部副使。出知蘇州。進龍圖閣學士。知杭州。遷右諫議大夫。徙江寧河中卒。

自和寒食韻

龜蝶春遊土著賒。青青踏去冒烟華。翠停舴艋客尋寺。紅卸羃離人上車。亭落五重沽卓酒。敘行十二步。  
潘花乘歡盡醉高陽侶。倒載歸來不認家。成都文類

琵琶亭

陶令歸來爲逸賦。樂天謫宦起悲歌。有弦應被無弦笑。何況臨弦泣更多。中山詩話

新橘

千頭霜熟摘來新。包貢虔修望紫宸。他日功成許高退。社中還結素封人。

五日公宴

虎符新合晚芳天。良會難并樂與賢。心媿白公求治切。下車三月始開筵。自注：白公旬宴詩云：下車已三月，開筵始今辰。

過白頭橋在蘇州盤門運河上。

白頭橋柰白頭何。自注：唐牧白公建，因得名。近歲伯純修之，人呼孫老橋。舊德如存故老歌。不特輿梁起遺愛。大都才美服人多。

北軒欹枕

苦無勤瘁補臺綱。西院西頭冷峭房。今日鈴齋一欹枕。清風不敢傲羲皇。以上吳郡志。

歸雁亭歐陽公建在滑州。

東風楊柳杏花飛。曾伴先生酒一卮。前輩風流那復見。小亭烟雨漫相思。城邊春草路南北。山下河梁人別離。一尺短書□水闊。年年愁絕雁歸時。

偶書小詩寄永叔內翰知滑州時作。

酒戶某兵孰與儕。月宵曾過六天街。南燕到後懷君遠。時入樓東畫舫齋。以上大名府志。

句

涼深荔浦月冷熨桂江秋。昭州月 哲匠金桴。

富

弼

弼字彥國。河南人。天聖八年舉茂材異等。累擢知制誥。歷同中書門下平章事。封鄭國公。進昭文殿大學士。監修國史。進司徒。薨贈太尉。謚文忠。

玉蓮詩話或傳富鄭公奉使遼國。遼使者云。蚤登雞子之峯。危如累卵。答曰。夜宿丈人之館。安若泰山。又云。酒如線。因針乃見。富答曰。餅如月。遇食則缺。

謝邵堯夫見訪

先生自衛客西畿。樂道安閑絕世機。再命初筵終不起。獨甘窮巷寂無依。貫穿百代嘗探古。吟詠千篇亦造微。珍重相知忽相訪。醉和風雨夜深歸。

聞見前錄公築第與康節天津隱居相適公自此可時相招矣康節曰某冬夏不出春秋時間過親舊間公相招未必來不召或自至一日過之作詩云云

伏承留府太尉相公就敝居爲耆年之會承命賦詩謹錄上呈伏惟采覽時公年九十九  
西洛古帝都衣冠走集地豈惟名利場驟爲耆德會大尹吾舊相曠懷輕富貴日與退老遊臺閣并省寺  
予慙最衰老亦許預其次遂欲省儀容爛然形繪事閨嶠訪精筆鮫紝布絕藝今復崇宴衍聊以示慈惠  
幽居近銅駝荒弊仍湫底塞路移君庖盈車載春醴獻酬互相趣觀處不知止商嶺有四翁晉林惟七子  
較我集諸賢盛衰何遠邇並事實可矜傳之爲千祀

弼竊覽長篇斷章有十二人中第二人之句又賦一絕上呈

顧我年齡雖第一在公勳德自無雙不推行業終難敵富貴康寧亦可降以上司馬光洛中耆英會詩

涵虛閣在南昌東湖北宋國子博士李寅致政居此建

畫閣高連百雉城涵虛應不媿標名門前柳色兼旗色座上琴聲雜佩聲肯羨五湖歸范蠡未饒三徑隱  
淵明我來恰直初晴後山影波光分外清南昌府志

資政范公以黃素小字韓文公伯夷頌寄才翁壬申正月才翁按察因跋

夷清韓頌古皆無更得高平小楷書舊相嘉篇題卷後蘇家能事復何如鐵網珊瑚

文彥博

彥博字寬夫介休人舉進士歷樞密副使參知政事拜同中書門下平章事封潞國公以太師致

仕紹聖中降太子少保卒預元祐黨籍後追復太師謚忠烈有集

蘇東坡云潞公長

律無一字無考據

邵氏聞見前錄文潞公自兗州通判代歸呂文靖一見奇之間潞公曰有兗州墨搢以來明日潞公進墨文靖熟視之蓋欲相潞公手也遂薦爲殿中侍御史

閑齋有作

鼓吹盡私蛙蒿蓬蔣徑斜梧高惟待鳳柳密只容鴉度暑巾裁縠迎涼帳卷紗茂陵無柰渴猶有鎮心瓜  
蘅臯

衡薄頻牽望陽林久駐鑣香囊徒叩叩雲月自蒼蒼翠佩傳情密曾波託意遙翩鴻漸高逝翻恨隔神霄  
見山樓

雲淡天迷楚樓高地占秦哀箏兩行雁小字數鉤銀巷陌三條月池塘十步春府門初夜閉多少夜遊人

閱史有感

縹帙青箱次第開慨然英氣轉難裁莫言每事俱長往須有清風屬後來彈鋏始知皆瑣旅枕戈方信是雄才平生自信真非薄只是休容鳩鳥媒以上文潞公集

同甲會詩

四人三百十二歲況是同生丙午年招得梁園爲賦日合成商嶺采芝仙清談亹亹風盈席素髮飄飄雪

滿肩此會從來誠未有洛中應作畫圖傳。

夢溪筆談文潞公保洛日年七十八同時有中散大夫程珦朝議大夫司馬旦司封郎中致仕席汝言皆年七十八嘗爲同甲會各賦詩一首

耆英會詩時公年七十五

九老舊賢形繪事元豐今勝會昌春垂肩素髮皆時彥揮塵清談盡席珍染翰不停詩思健飛觴無算酒行頻蘭亭雅集誇修禊洛社英遊賞序賓自媿空疎陪几杖更容款密奉簪紳當筵尚齒尤多幸十二人中第二人

澠水燕談云富韓公熙寧四年以司空歸洛時年六十八是年司馬端明不拜樞密副使求判西臺時年五十三二公安居沖默不交世務後十一年當元豐五年文潞公留守西京慕唐白樂天九老會于是悉聚洛中大夫賢而老自逸者韓公置酒相樂凡十二人又命鄭奐圖形妙覺僕舍各賦詩時人呼之曰洛陽耆英會而司馬公爲之序其相聚也用洛中舊俗敍齒不尙官韓公年七十九潞公與司封席汝言字君從皆年七十七朝議大夫王尙恭字安之七十六太常卿趙丙字南正祕書監劉几字伯壽衛州防禦使馮行已字肅之皆七十五天章閣待制楚建中字正叔七十三朝議大夫王慎言字不疑七十二大夫張問字昌言龍圖閣直學士張燾字景元皆七十司馬公六十四故潞公詩云當年尙齒尤多幸十二人中第二人韓公贈潞公詩云顧我年齡雖第一在公勳德自無雙潞公再贈韓公詩云惟公福祿并功德合是人間第一人是時宣徽使王公拱宸字君貺年七十留守大名貽書二公預其數凡十三人

彥博代簡上君貺宣猷

勿愛大名名遂忘西洛樂銅駝本自佳金鳳亦不惡二月三月春融融千花萬花紅灼灼公乎早歸來莫負花前約同賞狀元紅對酒劉師閣自注花雖舊房其豔維新

彥博伏覩公詩有第一無雙之句輒成二十八字上呈

洛下衣冠今最盛當筵尙齒禮容優惟公福壽并勳德合是人間第一流

以上司馬光洛中耆英會詩

贈李戡

昌元建邑幾經春百里封疆秀氣新鴨子池邊登第客老鴉山下著某人

方輿勝覽昌元縣南有老鴉山有李勘李戡兄弟善某會廢宋某戰于國朝詔求天下善奕者蜀帥以勘應詔廢望風知畏不敢措手譙南薰昌元人登皇祐五年進士第文潞公詩云云

題榆次縣鼓樓

置向譙樓一任撾多撾少不知他如今幸有黃紬被努出頭來放早衙

合璧事類前集世傳太祖謂一縣令曰勿于黃紬被裏放衙潞公詩云云

雙泉

長劍並彈霜氣豪白虹半折秋雲高濯纓洗耳更何處世人回看輕鴻毛河南府志

溟水在孟縣西北春秋會于溟梁即此

潺湲北山水繚繞南城阜晴灘錦石亂擊觸春湍高誰謂溟梁大不能容鯀鯤臨流自縮手揭厲應徒勞

宿少林寺

六六仙峯繞佛居，俗塵至此暫銷除。  
西來未會禪師意，北去應馳使者車。

予方受命移守北都，五品封槐今

尚在九年面壁昔何如，心知一宿猶難覺。  
花藏重尋貝葉書，嵩陽石刻集記。

席汝言

汝言字君從官尚書司封郎中致仕

耆英會年七十七

繫國安危唐上宰，功成身退漢留侯。  
二公閑暇開高宴，九老雍容奉勝流。  
共接雅歡恩意洽，不矜崇貴禮容優。  
賞心樂事人間盛，豈謂今稀古莫儔。

壯歲塵埃祿事牽，老歸重到舊林泉。  
曾無勳業書青史，偶向康寧養老年。  
自分杜門居陋巷，敢期序齒預公筵。  
司馬光洛中耆英會詩

王尙恭

尙恭字安之官朝議大夫致仕

耆英會年七十六

端朝風望兩台星，珪組參差又十人。  
八百喬年餘總數，一千熙運遇良辰。  
席間韻語皆非俗，圖上形容盡得真。  
勝事主盟開府盛，誤容衰薄混清塵。  
服許便衣更野逸，坐從齒列似天倫。  
二公笑指增和氣，夜久盤

花旋發春自注燭下盤花開公卽指目焉 司馬光洛中耆英會詩

劉几

几字伯壽洛陽人第進士神宗朝官祕書監致仕上柱國通議大夫

風月堂詩話劉伯壽洛陽九老之一也築室嵩山玉華峯下號玉華菴主有妾名萱草芳草皆秀麗善音律伯壽出入乘牛吹鐵笛二草以簞笛和之聲滿山谷出門不言所之牛行卽行牛止卽止其止也必命壺觴盡醉而歸嵩前人以爲地仙云

耆英會年七十五

司徒碩德今無比太尉殊勳固絕倫偶以暮年陪盛宴喜將白髮照青春八公有穢山空著四皓當衰心且伸元老相望疎迹在不應此會媿會人

制舉省元推二相龍頭昔日屬宣猷人間盛事并遐算一席幾盈九百籌 自注十二老共八百九十二歲 司馬光洛中耆英會詩

馮行巳

行巳字肅之官衛州防禦使致仕

耆英會年七十五

書稱五福壽爲先有德人方得壽延自媿櫟樗非遠器誰應齒髮亦遐年立身官未三公貴推老名陪二相賢喜把衰容模梵宇慙無纖效勒燕然當時遭遇承陶冶今日光榮預燕筵從此洛城增勝槩又新重作畫圖傳司馬光洛中耆英會詩

趙丙

丙字南正太常卿致仕

耆英會年七十五

新春鼎洛燕英髦。主禮雍容下庶僚。二相比肩官一品。十人華髮事三朝。星階並列瞻台曜。尊酒時行挹斗杓。東潁庸夫最無狀。也將顏面趁嘉招。司馬光洛中耆英會詩

王謹言

謹言字不疑。官朝議大夫。司農少卿致仕。

耆英會年七十二

相印貂冠粲六符。華顛高會侍臣俱。不將官職誇鄉里。唯尙年齡入畫圖。履道清歡追故事。站瞻陰德見訏謨。叨陪几席真榮觀。珪璧叢中問珷玞。司馬光洛中耆英會詩

楚建中

建中字正叔。洛陽人。第進士。官中奉大夫。天章閣待制。提舉崇福宮。

耆英會年七十二

自顧頽齡七十餘。久慙頑鈍費洪鑪。歸逢大老耆年會。衰朽形骸愧畫圖。

二相謀猷爛史編。諸公才業過前賢。好圖儀像傳來世。何事頑疎亦比肩。司馬光洛中耆英會詩

張瀛

宋詩紀事 卷十二

三二一

燾字景元漢陽人第進士神宗朝歷龍圖閣直學士知成都府通議大夫提舉崇福宮

耆英會年七十

洛城今昔衣冠盛韓國園林景物全功在三朝尊二相數逾九老萃羣賢當時鄉社爲高會此日居留□  
款延多幸不才陪履舄更慙七十是新年

司馬光洛中耆英會詩

挽老蘇先生

本朝文物盛西州獨得宗公薦冕旒稷嗣草儀書未奏茂陵辭客病無瘳一門欲向傳家學二子機雲並  
雋遊守蜀無因奠尊酒素車應滿古原頭

蘇集附錄

張問

問字昌言襄陽人進士起家累官祕書監給事中終太中大夫提舉嵩山崇福宮入元祐黨籍

耆英會年七十

槐庭二老樂堯仁盛集高年洛水濱華袞具瞻雖禮絕白頭序齒卻情親清閑几席同禪院山野巾裘似  
隱淪尊酒椒香纔過節池塘草色已催春白公酣暢吟哦內衛武康強笑語頻豈獨丹青傳不朽潛欣風  
俗欲還淳芝田鶴戲調形健蓮葉龜遊納息勻商皓寂寥拘小隱漢疏局促止家人莫因氣貌疑丹竈自  
有光陰寄大椿復得兼謨爲重客

自注司馬光未七十恐遺元爽在編民神仙可學今方信道術相忘久益

真滿座交歡祝眉壽羣生五福託鴻鈞

司馬光洛中耆英會詩

槩，字孟節，青州壽光人。少師种放，隱于青州之南治源山。富鄭公爲築室以居，范文正公文潞公皆優禮之，欲薦之朝，懇辭不就。

溫公續詩話：槩喜爲詩，慷慨有氣節。舉進士及第，爲幕僚一任，不得志。棄官隱居治源山，去人境四十里。好遊山，常獨挈飯一罋，窮探幽險，無所不至。夜則宿於巖石之下，或累日乃返。不畏虎豹蛇虺。富丞相甚禮重之。

府舍西軒作

昔年曾作瀟湘客，憔悴東秦歸未得。西軒忽見好溪山，如何尙有楚鄉憶。讀書誤人四十年，有時醉把闌干拍。閑居詩話。

張望

句

庭下郎君爲宰相，門前故吏作將軍。

邵氏聞見前錄：張金部名方，爲白波三門發運使。文潞公父令公，異爲屬官。金部召去，薦令公爲子弟讀書于孔目官張望家。望嘗爲舉子，頗知書。後隸軍籍。潞公少年好遊，令公怪責之。潞公久不敢歸。張望白令公曰：郎君在某家學問益勤苦，不復遊矣。因出潞公文數十篇，令公爲之喜。後潞公出入將相，望尙無恙。公判河南日，母申國太夫人生日，望自河清獻齋有詩云：云望以子通籍封將軍云。

劉沆

沆，字沖之，吉州永新人。天聖八年進士第二，至和中拜同中書門下平章事，集賢殿大學士，出知

應天府徙陳州卒贈左僕射兼侍中

小孤山

擎天有八柱此一柱仍存石聳千尋勢波流四面痕江湖中作鎮風浪裏盤根平地安然者饒他五岳尊

青箱雜記

送鄉人尹鑑登第歸

少年相款老相逢鄉舉雖同遇不同我已位塵三事後君方身列五科中榮登莫計名高下宦達須由善始終若到鄉關人見問爲言歸思滿秋風

青箱雜記尹劉少同場屋劉已登第大拜

皇祐中尹以恩榜始登第劉以詩送之

陳希亮

希亮字公弼青神人天聖八年進士歷官提點江東刑獄入判三司戶部勾院請補外爲京東轉運使移知鳳翔致仕卒第四子慥字季常與蘇軾遊

和范公希文懷慶朔堂

弱柳奇花遞閒栽紅芳綠翠對時開主人當日孤真賞魂夢還應屢到來  
饒州府志

魏兼

兼官度支員外

和范公希文懷慶朔堂

使君去後堪思處。慶朔堂前獨到來。桃李無言爭不怨。滿園紅白爲誰開。饒州府志

畢京

京官職方員外。

和范公希文懷慶朔堂

花木還依舊。逕栽春園不惜爲誰開。幾多民俗熙熙樂。似到老聃臺上來。饒州府志

曹經

經官同提點江東刑獄。

和范公希文懷慶朔堂

池館名公舊日栽。幾番零落又春開。誰人解識紅芳意。猶有多情五馬來。饒州府志

曰：裕按范公詩自懷慶朔堂栽花作讀四和詩可以辨西溪  
叢語眷憶樂籍之誣并卻埽編春風爲道士名亦近附會矣。

陸

軫

軫山陰人官兵部郎。

七歲作

昔時家住海三山。日月宮中屢往還。無事引來天女笑。謫來爲吏在人間。

耆舊續聞。陸太傅軫神采秀異。七歲猶不能語。一日乳廻掘往後園。俄而吟詩云。後仕至兵部郎官歸老稽山。宋元憲杜祁公皆有詩送行。篇中多及神仙事。蓋公雅志也。

魯

交

交字叔達。梓州人。仕至虞部員外郎。有三江集。

經戰地

西邊用兵地。黯慘無人耕。戰士報國死。塞草迎春生。沙飛賊風起。晝黑陣雲橫。夜半烽臺望。旄頭星尚明。

宋文鑑

遊華山張超谷

太華鎮深谷。我來真景分。有苗皆是藥。無石不生雲。急瀑和煙瀉。清猿帶雨聞。幽棲未忍別。峯半日將曛。

江樓晴望

江干一雨收。霽色染新愁。遠水碧千里。夕陽紅半樓。笛寒漁浦晚。山翠海門秋。更待牛津月。袁宏欲泛舟。

清夜吟

露華清八極。吟上小樓東。月色水鋪地。雁聲秋滿空。明河欲瀉浪。瘦竹自生風。坐久心骨爽。此懷誰與同。

有寄

思君又是東風起。樓倚浮雲目千里。芳草不知人斷腸。帶煙帶雨連春水。以上前賢小集拾遺。

齊唐

唐字祖之，廓弟。天聖八年進士。嘗試制科，辟杭州料院，仕至職方員外郎致仕，有少微集。

會稽志：唐有家園在鑑湖，有山小而近湖。唐分司東歸，命名少微山，遂家焉。引流爲沼，藝花爲圃。山之上，有芳華亭、修竹巖、真珠泉、石室、嘉遯亭、樵風亭、禹穴閣、應星亭、東山亭、釣閣，盡湖山之勝。自爲家山十詠，陶寫景物，語尤閑遠。今詩不存。

玉洞在劍浦山。

白石洞間路，吾家在其中。琴窗與書閣，一半是雲封。會稽志

仙茅

仙方上品誇靈種，忽怪靈芝拆紫苞。玉澤返嬰看驗術，少微山是小三茅。刻錄

觀潮

何意滔天苦作威，狂驅海若走馮夷。因看平地波翻起，知是滄浪鼎沸時。初似長平萬瓦震，忽如員嶠六鼈移。直應待得澄如練，會有安流往濟時。瀛奎律髓

張先

先字子野，烏程人。天聖八年進士。嘗知吳江縣，仕至都官郎中。有安陸集。

東坡趣跋：張先子野善戲謔，有風味。見杭妓有彈琴者，忽撫掌曰：「異哉此箏！」不見許時，乃爾黑瘦耳。

過庭錄：張先子野，郎中叢花詞云：沈思細恨，不如桃杏猶解嫁東風。一時盛傳，歐永叔尤愛之。恨未識其人，子野家南地，以故至都謁永叔，闢者以通永叔倒屣迎之曰：「此乃桃杏嫁東風郎中！」東坡守杭，子野尚在，嘗預宴席，有南鄉子詞，末句云：問道

賢人聚吳分試問也應傍  
有老人星蓋年八十餘矣

吳江

春後銀魚霜下鱸。遠人曾到合思吳。  
欲圖江色不上筆。靜覓鳥聲深在蘆。  
落日未昏聞市散。青天都淨見山孤。  
橋南水漲虹垂影。清夜澄光合太湖。中吳紀聞

往歲吳興守。滕子京席上見小妓兜娘子。京賞其佳色。後十年再見于京口。絕非向時容態。感之作

詩

十載芳洲撫白蘋。移舟弄水賞青春。  
當時自倚青春力。不信東風解誤人。侯鯖錄

營妓張溫卿黃子思愛姬宜哥皆葬宿州城東過而題詩

好物難留古亦嗟。人生無物不塵沙。  
何時種樹連雙冢。結就人間並蒂花。能改齋漫錄

題西溪無相院

積水涵虛上下清。幾家門靜岸痕平。  
浮萍破處見山影。小艇歸時聞草聲。  
入郭僧尋塵裏去。過橋人似鑑中行。  
已憑暫雨添秋色。莫放修蘆礙月生。合璧事類前集

和元居中風水洞上祖龍圖韻

水色風光近使君。浥塵輕雨逐車輪。  
暫來不宿宜無恨。多少行春不到人。咸淳臨安志

愁似鯢魚知夜永，嬾同蝴蝶爲春忙。

石林詩話張先郎中能爲詩及樂府至老不衰居錢唐蘇子瞻作倅時先年已八十餘視聽尙精強家猶畜聲妓子瞻嘗贈以詩云詩人老去鶯鶯在公子歸來燕燕忙蓋全用張氏故事戲之先和云云極爲子瞻所賞俚俗多喜傳詠先樂府遂掩其詩聲識者皆以爲恨云

湖山隱後居空在煙雨詞亡草自青。

藝苑雌黃張子野過和靖隱居一聯自註云先生嘗著春草曲有滿地和煙雨之句

李之才

之才字挺之青州人天聖八年進士師穆修受易修受之种放放受之陳搏源流甚遠邵雍傳其學官至殿中丞簽書澤州判官

鳳州絕句

去年三月洛城遊今日尋春到鳳州欲把雙魚附歸信嘉陵江水不東流

西溪叢話時韓中令宣撫河東委之才以秦鳳鑄鐵錢事在鳳州有作

孫復

復、字明復。平陽人。居泰山深于春秋。石介以次皆師事之。以薦除國子監直講。卒有睢陽小集。

八月十四夜月

銀漢無聲露欲垂。玉蟾初上欲圓時。清尊素瑟宜先賞。明夜陰晴未可知。孫明復小集

石介

介，字守道。奉符人。天聖八年進士。歷嘉州判官。居憂躬耕徂徠山下。魯人號徂徠先生。後遷直集賢院。出判濮州。卒有徂徠集。

燕脂板浣花牋寄合州徐文職方

合州太守鬢將絲。聞說歡情尙不衰。板與歌娘拍新調。牋供狎客寫芳辭。木成文理差差動。花映溪光瑟瑟奇。名得只從嘉郡樹。自注：燕脂木，嘉州出。樣傳仍自薛濤時。自注：有薛濤牋。奇章磊磊馳聲價。江令翩翩落酒卮。幾首詩成卷魚子。自注：有魚子牋。誰人唱罷泣燕脂。紅牙管好同牀置。紫竹笙宜一處施。願助風流向尊席。杏花況是未離披。

慶歷聖德詩

於惟慶歷三年三月。皇帝龍興。徐出闈闈。晨坐太極。晝開閭闔。躬攬英才。手鋤姦孽。大聲颯颯。震搖六合。如乾之動。如雷之發。昆蟲躡躅。怪妖藏滅。同明道初。天地嘉吉。初聞皇帝。戚然言曰。予祖予父。付予大業。予恐失墜。實賴輔弼。汝得象殊。慎重微密。君相予久。予嘉乃績。君仍相予。笙鏞斯協。昌期儒者。學問該洽。與予論政。博以經術。汝貳二相。庶績咸秩。惟汝仲淹。汝誠予察。太后垂簾。湯沸火熱。汝時小臣。危言嚴義。

爲予司諫。正子門闈爲予京兆。聖予讒說。賊叛于夏。汝往式遏。六月酷日。大冬積雪。汝寒汝暑。同于士卒。予聞辛酸。汝不告乏。予晚得弼。予心慰悅。弼每見予。無有私謁。以道輔予。弼言深切。予不堯舜。弼自笞罰。陳官一年。奏疏滿篋。侍從周歲。忠力僅竭。契丹忘義。構杌齷齪。敢侮大國。其辭慢悖。弼將予命。不畏不懾。卒復舊好。民得食褐。沙磧萬里。死生一節。視弼之虜。霜剝膚裂。觀弼之心。煉金煅鐵。寵名大官。以酬勞竭。弼辭不受。其志莫奪。惟仲淹弼。一夔一高天。實賚予。予其敢忽。並來弼予。民無差札。曰衍汝來。予之黃髮。事予二紀。毛禿齒豁。心如一兮。率履不越。遂長樞府。兵政毋躉。予早識琦。琦有奇骨。其器魁樞。豈視居楔。其人渾樸。不施剞劂。可屬大事。敦厚如勃。琦汝副衍。知人予哲。惟修惟靖。立朝獻言。論礮研忠誠。特達祿微身賤。其志不怯。嘗詆文臣。亟遭卑黜。萬里歸來。剛氣不折。屢進直言。以補予闕。素相之後。含忠履潔。昔爲御史。幾叩予榻。至今諫疏。在予箱匣。裏雖小官。名聞予徹。亦嘗獻言。箴予之失。剛守粹慤。尙修儔匹。並爲諫官。正色在列。予遏汝言。汝無鉗舌。皇帝明聖。忠邪辨別。舉擢俊良。埽除妖魅。衆賢之進。如茅斯拔。大姦之去。如距斯脫。上倚輔弼。司予調燮。下賴諫諍。維予紀結。左右正人。無有邪孽。予望太平。日不逾浹。皇帝在位。二十二年。神武不殺。其默如淵。聖神不測。其動如天。賞罰在手。不失其權。恭已南面。退姦進賢。知賢弗易。非明弗得。去邪惟冀。惟斷乃克。明則不惑。斷則不忒。既明且斷。惟帝之德。羣下踴躍。重足屏息。交相語曰。惟正惟直。毋作側僻。皇帝汝殛。諸侯危栗。墮玉失鳥。交相告語。皇帝神明。四時朝覲。謹修臣職。四夷走馬。墜鐙遺策。交相告語。皇帝神武。解兵修貢。永爲屬國。皇帝一舉。羣臣懾焉。諸侯畏焉。四夷服焉。臣願皇帝壽千萬年。以上徂徠集

東都事略石介爲國子直講。是時兵討元昊，久無功。海內重困。仁宗奮然思欲振起威德。宰相呂夷簡以疾罷歸第。夏竦罷樞密使。章德象晏殊爲相。賈昌朝參知政事。用杜衍爲樞密使。范仲淹韓琦富弼樞密副使。王素歐陽修余靖同爲諫官。介躍然曰。此盛德事也。雅頌吾職其可已。乃作慶歷聖德詩。詩出孫復謂介曰。子福始于此矣。夏竦見而衡之。介旣卒。竦欲以奇讐中富弼。指介以起事。謂其詐死北走契丹。請發棺。仁宗察其誣。得不發。

# 宋詩紀事卷十三

錢塘厲鶚緝

祁門馬曰璐同緝

元絳

絳字厚之。錢唐人。天聖八年進士。神宗朝累官翰林學士。拜參知政事。出知亳州。改潁州致仕。卒贈太子少師。謚章簡。有玉堂集。

石林詩話。元厚之知荆南。夢至仙府。三人者聯名書。旁有告之曰。君三人蓋兄弟也。覺而思之。莫知所謂。未幾入爲學士。韓持國。楊元素。繪先已在院。一日書名。三人名皆從絞絲。始悟夢兄弟之意。已而持國元素外補。厚之京尹。後三年復與元素還職。而鄧文約。綰相繼爲直院。則三人之名又皆從絞絲。許大夫選作四翰林。

詩紀其事。厚之和云。聯名適似三株樹。傳玩驚看五朵雲。亦一時之異也。

詔修兩朝國史開局日賜筵史院和首相吳公席上韻

殿帷昕對罷。省戶雨陰餘。詔賜堯尊酒。人探禹穴書。夔龍方客右。班馬蓋徒歟。徑醉俄歸弁。雲西見日車。  
揮麈後錄

郡守章公帖。五日開宴會九老於廣化寺次韻

五日佳辰郡政閑。延賓談笑豁幽關。閨門歌舞尊罍上。林屋烟霞指顧閒。德應華星臨潁尾。年拘皓髮下。

商顏昌花美酒疎鐘永坐見斜暉隱半山。

中吳紀聞徐師閔字聖徒仕至朝議大夫退老于家日治園亭以文酒自娛樂時太子少保元公絳正議大夫程公師孟朝議大夫閔丘公孝終亦以安居歸老因相與繼會昌洛中故事作九老會章岵爲郡守大置酒合樂會諸老于廣化寺又有朝請

大夫王珫承議郎通判蘇溫與焉王賦

詩爲倡諸公屬而和之以爲吳門盛事

### 題鼓山元公亭

誰書吾姓揭亭額棟宇飛騰氣象完谷口秋風吹鬢髮海東朝日上闌干地高頓覺羣山小天近須知六合寬三到巖扉殊不厭異時長向畫圖看淳熙三山志

在禁林時有懷荆南舊遊

去年曾醉海棠叢聞說新枝發舊紅昨夜夢回花下飲不知身在玉堂中海棠譜

### 趙潛叔殉節詩

轉戰譙門日欲晡空拳猶自把戈鉄身垂虎口方安坐命在鴻毛更疾呼柱下吳卿存斷節袴中杵臼得遺孤空餘三尺英雄氣不媿山西士大夫

後村詩話皇祐中饑賊犯康州閩郡潰去惟守臣趙師旦死之妻方產子棄之草間亂後訪之尚呱呱然元公挽之云云

元豐辛酉冬予解組歸吳明年過故同年宋光祿舊居周覽園榭感事作詩以詒伯原

白頭重到故人家。境是人非起歎嗟。三徑未荒陶令菊。四時長放庾郎花。林風光動藏鶯葉。溪浪痕生宿鷺沙。肯構有材移病久。會憑詩酒傲烟霞。蘇州府志

句

仙驥簾雲穿仗下。佛花吹雨布天流。

石林詩話。元豐中久旱。裕陵禁中齋禱甚力。一夕夢有僧乘馬馳空中。口吐雲霧。覺而大雨。翌日命中貴人物色於相國寺。五百羅漢中至第十三尊。略彷彿卽迎入內觀之。正所夢也。元參政厚之喜雨句云云。蓋記此事。

刁約

約字景純。潤州人。衍之子。天聖八年進士。嘉祐中以兵部員外郎集賢校理。知越州。

使契丹戲作

押燕移離畢。看房賀跋支。餞行三匹裂。密賜十貔狸。

夢溪筆談。刁景純使契丹戲作云云。移離畢官名。如中國執政賀跋支如執衣防閣。匹裂小

木犀以色綾木爲之。如黃漆貔狸形如鼠而大。穴居食穀。梁北人爲珍膳。味如豚肉而脆。

遊五洩山

西源窮盡到東源。直注層崖五磴泉。真境無由追汗漫。勝游聊得弄潺湲。風生虎嘯層崖底。月上猿啼古木巔。只待歸來林下去。好同靈一此安禪。諸暨縣志

朱公綽

公綽吳人天聖八年進士曾爲鹽官令

與宋子京唱酬牡丹詩

仁帥安全蜀祥葩育至和地寒開旣晚春曙力終多翠帯遮蜂蝶朱闌隔綺羅殷勤憑驛使光景易蹉跎

成都文類

句

諫草焚來應見史橐金盡散只留詩

劉諷都官致仕

古今詩話

蔡襄

襄字君謨其先自光州固始入閩家仙遊又遷莆田遂爲莆田人天聖八年進士累官龍圖閣學士知開封府徙知泉州召爲翰林學士乞爲杭州拜端明殿學士以往治平四年卒乾道中謚忠惠有集

苦溪漁隱叢話余觀東坡荔枝歎注謂大小龍茶始于晉公而成于蔡君謨歐陽永叔聞君謨進小龍團歎曰君謨士人也何至作此事今年閩中監司乞進鬪茶許之故其詩云武夷溪邊栗粒芽前丁後蔡相籠加爭新買籠各出意今年鬪品充官茶

四賢一不肖詩

中朝鸞鵠何儀儀慷慨大體能者誰之人起家用儒業馳騁古今無所遺當年得從諫官列天庭一露胸中奇失身受責甘如薺沃然華實相葳蕤漢文不見賈生久詔書曉落東南涯歸來俯首文石陛尹以京兆天子毗名都翼翼郡國首里區百萬多占辭豪宗貴倖矜意氣半言主上承其願昂昂孤立中不倚傳

經決訟無牽羈老姦黠吏束其手衆口和附歌且怡日朝黃幄邇天問帝前大畫當今宜文陳疏舉時密啓此語多祕世莫知傳者籍籍十得一者已足爲良醫一麾出守蕃君國惜此智慮無所施吾君睿明廣視聽四招俊乂隆邦基廷臣諫列復籍口安得長喙號丹墀晝歌夕寢心如疚咄哉汝憂非汝爲右范仲淹

南方之強君子居卓然安道襟韻孤詞科判等屢得雋呀然鼓焰天地爐三年待詔處京邑斗粟不足榮妻孥耳聞心慮朝家事螭頭北奏帝曰都校書計課當序進麗賦集仙來顯塗誥墨未乾尋已奪不奪不爲君子儒前日希文坐言事手題敕教東南趨希文鯁亮素少與失勢誰復能相扶嶄然安道生頭角氣虹萬丈橫天衢臣靖胸中有至語舉喙不避蕭斧誅使臣仲淹在廷列日獻陛下之嘉謨刺史榮官雖重任奈何一郡卷不舒言非由位固當罪隨漕扁舟盡室俱炎陬此去數千里橐中狼藉唯蠹書高冠長佩叢闕下千百其羣訶爾愚吾知萬世更萬世懷懷英風激懦夫右余靖

君子道合久以成小人利合久以傾世道下衰交以利遂使周雅稱嚙鳴煌煌大都足軒冕綽有風采爲名卿高名重位蓋當世退朝歸舍賓已盈脣肩詔笑不知病指天報遇如要盟一朝勢奪德未改萬鈞已與毫釐輕畏威諛上亦隨毀矧復鼓舌加其誣逶迤陰拱質氣厚兩耳塞豆心無營嗚呼古人不可見今人誰與明章章節義尹師魯飭躬佩道爲華榮希文被寵激人怒君獨欣慕如平生抗書轂下自論効惟善與惡宜彙征削官竄逐惟適楚一語不挂離騷經當年亦有大臣逐朋邪隱縮無主名希文若果事姦險何此吉士同其聲高堂本欲悟人主豈獨區區交友情右尹洙

先民至論推天常補衰扶世爲儒方圜冠博帶不知本樗櫟安可施青黃帝圖日盛人世出今吾永叔誠有希望虛心學古貴適用異端莫得窺其牆子年五月范京兆服天子命臨鄱陽二賢拜疏贖其寵勢若止沸反揚湯敕令百執無越位諫垣何以敢封囊哀求激憤亦復奮強食不得下喉吭位卑無路自聞道日視雲闕高蒼茫裁書數幅責司諫落筆驟驥騰康莊刃迎縷析解統要其間大意可得詳書曰希文有本末學古通今氣果剛始從理官來祕閣不五六歲爲天章上心倚若左右手日備顧問鄰清光苟爾希文實邪佞曷不開口賦否臧陰觀被遣始醜詆擢枯拉朽奚爲強倘曰希文實賢士因言被責庸何傷漢殺王章與長倩當時豈曰誅賢良惟時諫官亦結舌不曰可諫曰罪當遂令百世覽前史往往心憤涕泗滂斯言感切固已重讀者不得令激昂肯圖反我爲怨府袖書乞憐天子旁謫官一邑固分耳恨不剖腹呈琳琅我嗟時輩識君淺但推藻翰高文場斯人滿腹有儒術使之得地能弛張皇家太平幾百歲正當鑑古修紀綱賢才進用忠言錄祖述聖德垂無疆右歐陽修

人稟天地中和生氣之正者爲誠明誠明所鍾皆賢傑從容中道無欹傾嘉言讜論范京兆激姦糾謬揚王庭積羽沈舟毀銷骨正人無徒姦者朋主知膠固未遐棄兩轔五馬猶專城歐陽祕閣官職卑欲雪忠良無路歧累幅長書抉幽憤一責司諫心無疑人謂高君如撻市出見搢紳無面皮高君構書奏天子游言容色仍怡怡反謂希文謀疎闊投彼南方誠爲宜永叔忤意竄西蜀不免一中讒巧辭汲黯嘗糾公孫詐弘于上前多謝之上待公孫禮益厚當時史館猶刺譏司諫不能自引咎復將已過揚當時四公稱賢爾不肖讒言易入天難欺朝家若有觀風使此語請與風人詩右高若訥

灤水燕談，景祐中，范文正公知開封，左右言公朋黨，黜知饒州。余靖安道論救，坐貶尹師魯，洙言：臣與仲淹義兼師友，當從坐。貶監郢州稅。歐陽永叔移書責司諫高若訥，若訥怒繳其書，降授夷陵縣。蔡君謨作四賢一不肖詩：四賢謂希文、安道、師魯、永叔，不肖謂若訥也。布在都下人爭傳寫，鬻書者市之，頗獲厚利。

### 游鼓山題靈源祠

郡樓瞻東方，嵐光瑩人目。乘舟逐早潮，十里登南麓。雲深翳前路，樹暗迷幽谷。朝雞亂木魚，晏日明金屋。靈泉注石竇，清吹出篁竹。飛毫剗峭壁，勢力忽驚觸。捫蘿躋上峯，太空延眺矚。孤青浮海山，長白挂天瀑。況逢肥遜人性，尙自幽獨。西景復向城，淹留未云足。

### 上元應制

高列千峯寶炬森，端門方喜翠華臨。宸遊不爲三元夜，樂事還同萬衆心。天上清光留此夕，人間和氣閣春陰。要知盡慶華封祝，四十餘年惠愛深。

### 夢中作

天際烏雲含雨重，樓前紅日照山明。嵩陽居士今何在，青眼看人萬里情。

### 書小閣壁上

綽約新嬌生眼底，侵尋舊事上眉尖。問君別後愁多少，得似春潮夜夜添。

### 嘉禾郡偶書

盡道瑤池瓊樹新。仙源尋到不逢人。陳王也作驚鴻賦。未必當時見洛神。

宿漁梁驛

庭樹疎疎河漢低。瓦溝霜白月平西。寒鴉不奈單棲苦。落泊驚飛到曉啼。

留別舊居花檻

別意起中夕。出門風吹衣。側月光。黯薄餘花香氣微。清尊歲相向。欲去心有違。殘葩勿盡放。主人行亦歸。

寒食遊西湖

知福州作

山前雨氣曉才收。水際風光翠欲流。盡處旌旗停曲岸。滿潭鉦鼓競飛舟。浮來烟島疑相就。引去沙禽好自由。歸騎不令歌吹歇。萬枝燈燭度花樓。淳熙三山志

王素

素，字仲儀。旦季子賜進士出身。擢知諫院。出知成都府。復尹開封。熙寧初。入爲通進銀臺司。轉工部尚書。卒謚懿敏。

述夢

似去華胥國裏來。雲霞深處見樓臺。月光冷射雞窗急。驚覺遊仙夢一迴。

詩話總龜公任御史日嘗夢中至玉京黃闕殿上有紺服翠冠者曰吾東門侍郎公則西門侍郎也昔以奏牘玉帝前語傷鯁計遂謫于世公夢迴題此

彭思永

思永字季長廬陵人舉進士累擢天章閣待制河北都轉運使治平中召爲御史中丞熙寧中以戶部侍郎致仕卒

絕句

爭利爭名日日新滿城冠蓋九達塵一聲雞唱千門曉誰是高眠無事人

過庭錄

趙師民

師民字周翰青州臨淄人第進士官天平軍節度推官歷天章閣待講刑部郎中判宗正丞有集

張耒明道雜志先君嘗從趙周翰授易與周翰稍密先君嘗與客語周翰作詩極有風味是溫飛卿韓致光之流而世以朴儒處之非也

向來

向來情思已陳陳旅恨無端不及春潘子形容傷白髮沈郎文字暗丹唇

明道雜志

露臺枉惜千金費卻把銅山賜幸臣

風月堂詩話趙周翰詠漢文帝云云可與

李義山不問蒼生問鬼神之句並驅爭先

麥天晨氣潤槐夏午風清委地露花啼曉恨拂隄烟柳弄春容

歷代吟譜霜女遺靈長著素玉妃餘恨結

成酸梅 明道雜志

范師道

師道字貫之長洲人仲淹姪天聖九年進士知廣德縣擢侍御史以論事忤宰相劉沆出知常州復召爲起居舍人同知諫院出知福州復入爲三司鹽鐵副使終直龍圖閣知明州有集曰裕按宋登科記天聖九年停貢舉拔萃四人師道當是中拔萃科

題隱圃贈蔣希魯

勇退人難事明公識慮長波濤濟舟楫霜雪見松篁林下開前圃花間出亞檜二疏良宴會老杜好篇章道向清來勝機于靜處忘當除印如斗試一較閑忙中吳紀聞

天平山

天地萬物間或有奇勝迹見賞能幾人不知今與昔吳門多好山天平爲峻極旦暮常白雲表裏皆珍石烟嵐十里光松桂四時色我因一縱遊煩襟爲開釋感古懷君子翻然長太息樂天賞雲泉詩章何歷歷垂今數百年繼者漠然寂閒遇希文來雙旌守鄉國行春三讓原吟哦盡所得子美天與才尋幽多採摭賦詩五十言平地黃金擲三賢固有名山資亦輝赫此去還幾年不逢好事客吳郡志

勝涉

涉天聖中諫議大夫

游泰山靈巖寺

山半舊招提。捫蘿躡石梯。佳名標四絕。勝境出三齊。殿古烟霞窟。庭深檜柏蹊。嶽靈分地界。雲險接天倪。香篆清風裏。松廊翠巘低。飛塵無路入。幽鳥隔巖啼。破夢泉聲急。飄涼竹韻淒。微陽生頂上。殘月落峯西。暫到猶塵慮。長居信覺迷。致君功業就。向此卜幽棲。靈巖詩集

孔道輔

道輔字原魯。宣聖四十五世孫。舉進士。天聖間爲右正言。累官御史中丞。出知鄆州。卒贈尚書。

闕里夫子廟

楚火自焚寧害聖。金絲堂壁闕家書。典墳啓發皆天意。非謂共王好治居。山東通志

唐介

介字子方。江陵人。擢進士第。爲殿中侍御史。劾宰相文彥博。貶春州別駕。神宗朝。拜參知政事。與王安石爭論不勝。憤疽發背卒。贈禮部尚書。謚質肅。

謫官渡淮風欲覆舟而作

聖宋非狂楚。清淮異汨羅。平生仗忠信。今日任風波。舟楫顛危甚。鼈鼈出沒多。斜陽幸無事。沽酒聽漁歌。  
合璧事類前集

碧落洞

余生本孤拙。所志在雲石。薄宦偶纏鎖。未遂林泉適。邇來備臺選。幸一當言責。狂愚抵罪辜。遽從邊徼謫。區區數千里。車馬倦行役。湊陽頗善地。解轡喜安席。官散無所事。度日多閑隙。太守蘇宣甫。邀我訪奇跡。

西山有石室，疑是靈仙窟。翛然烟徑入，舒若天門闢。中瀉一溪清，傍映千峯碧。萬穴滴瑤乳，兩崖張翠帘。爽氣來先秋，昏嵐生未夕。不知造化意，何爲置窮僻。周生說到難，斯文不虛摭。怪容誠莫狀，勝蹟今始獲。暫已瑩耳目，久覺生虛白。拂拭纓上塵，回頭謝朝客。雖非吾土樂，聊以慰奇隻。聖恩未放還，屢遊君莫惜。

廣東通志

李師中

師中，字誠之，應天府楚丘人。舉進士。神宗朝歷官天章閣待制、河東都轉運使、知泰州。貶和州團練副使，安置徙單州。復分司南京，提舉太極觀。卒有集。

贈御史唐介貶英州別駕進退格

孤忠自許衆不與，特立敢言人所難。去國一身輕似葉，高名千古重如山。並遊英俊顏何厚，未死姦諛骨已寒。天爲吾皇扶社稷，肯教夫子不生還。

東軒筆錄：唐介始彈張堯佐，諫官皆上疏，及彈文彥博，則吳奎畏縮不前。當時謂拽動陣腳。及唐爭論于上前，遂并及奎之背約執政，又黜奎而文潞公益不自安。遂罷政事。時李師中送介詩有並遊英俊顏何厚，未死姦諛骨已寒之句，爲奎發也。

韓魏公席上作

願得貔貅十萬兵，西戎巢穴一時平。歸來不用封侯印，只問君王乞愛卿。

后山詩話：魏公爲陝西安撫，開府長安。李

侍制師中過之，席間使爲官妓賈愛卿賦。

燕子知時節還從舊宇歸。新人方按曲不許傍簾飛。

東臯雜錄李誠之才致高妙守邊有威信熙寧初荆公用事議論不合退居汶上題詩云云

客有寫真者見予因以詩贈之

嗟予少也賤到老尙無功方寸浮名外流年兩鬢中對鏡猶慙愧圖寫若爲容聲畫集

詠松

半依嵒岫倚雲端獨上亭亭耐歲寒一事頗爲清節累秦時曾作大夫官鶴林玉露

麥積山在天水縣東狀如麥積爲秦地林泉之冠有隗囂避暑宮魏乙弗后墓

路入青松翠靄閒斜陽倒影下溪灣此中猿鶴休相顧謝傅東歸自有山

方輿勝覽

和李明叔理定道中

幽居日日數歸程已寫華嚴兩帙經門外初寒江氣白嶺頭多雨燒痕青曾逢飯顆嘲山笠應載鴟夷笑  
井餅客土相思多引望天涯風景似新亭

桂林府志

魏瓘

瓘字用之歙州婺源人父羽奏補校書郎累官集賢院學士廣東安撫使進龍圖閣直學士吏部侍郎致仕卒

感懷

羸羸霜髮一衰翁。蹤跡年來類斷蓬。萬里遠歸雙闕下。一身閑在衆人中。螭頭賜對恩雖厚。雉堞論功事已空。淮上有山歸未得。獨揮清涕灑春風。

湘山野錄 魏璣侍郎知廣州日 大築子城 儂智高亂 民逃于中 瘦生者衆 朝廷嘉之 自以論功久不報 故作是詩 文潞公采詩進呈 加龍圖閣學士 尹天府

句

誰言嶺外無霜雪。何事秋來亦滿頭。五羊書事 湘山野錄

熊知至

知至字意誠 建陽人 天聖中五舉不第 歸隱鼈峯有集

贈王山人

閑注瘦筇枝。衣冠半異時。入城人不識。賣藥俗長疑。飲酒難逢醉。餐松自止飢。華峯千嶂裏。常與白雲期。  
翰墨大全

句

樓臺上 下火照火 車馬往來人看人  
觀燈 萬姓統譜

趙槩

槩字叔平 南京虞城人 第進士 累擢龍圖閣學士 知鄆州 拜參知政事熙寧初轉吏部尚書 以太

子少師致仕薨贈太子太師謚康靖。

澠水燕談歐文忠公與趙少師槩同在中書及告老趙自南京訪文忠于穎上所居之西堂曰會老仍賦詩以志盛事時翰林呂學士公著方牧頌特置酒于堂宴二公文忠親作口號有金馬玉堂三學士清風明月兩閑人之句

挽老蘇先生

侍從推詞伯君王問子虛早通金匱學晚就曲臺書露泣時難駐琴亡韻亦疎臧孫知有後里間待高車

蘇集附錄

郭

稹

稹字仲微開封祥符人舉進士歷龍圖閣學士權知開封府康定中嘗與王堯臣張觀李若谷宋庠等修崇文總目

和樞密侍郎因看海棠憶禁苑此花最盛

朱闌明媚照橫塘芳樹交加枕短牆傳得東君深意態染成西蜀好風光破紅枝上仍施粉繁翠陰中旋撲香應爲無詩怨工部至今含淚作紅妝海棠譜

陸

經

經字子履越州人仁宗朝集賢殿修撰有寓山集

孔仲平談苑陸經多與人寫碑銘頗得濡潤人有問子履近日所寫幾何對曰近日所寫甚少總在街上喝道行裏

魏道輔續東軒筆錄。陸經學士坐謫流落。歐陽文忠公憐其貧。每與人作碑誌。必先約令陸子履書。欲以濡潤助之也。由是子履書名亦自此而盛。周平原序云。公與歐陽文忠公周旋館閣。詩文往復。相與至厚。惜不幸陷于朋黨。屢起屢仆。晚遇裕陵。方嚮于用。則已老矣。

贈丁元珍中允宰剡

塵土官曹幾處閑。君今作邑好開顏。落帆直上剡溪口。入境先登天姥山。魚鳥半和風俗處。雲霞多雜簿書閒。雪晴須去尋安道。莫作經宵興盡還。剡錄

晚泛秀水

落日進扁舟。沿迴碧玉流。未能追白鳥。貪共數游鯈。翠壁玲瓏倒。青天表裏浮。誰湔世間熱。灑出洞庭秋。  
袁州府志

句

薄有田園歸去好。苦無官況莫來休。爲山陽令作。青瑣高議。

周

鏞

仁宗時人。

五洩山

路入蒼烟九過溪。細穿嵒曲到招提。天分五溜寒傾北。地秀諸峯翠插西。鑿徑破崖來木杪。駕泉鳴竹落。

棲題當年老默無消息猶有祠堂一杖藜  
葛詠

曾 謌

謗諸暨令

五洩山

五洩高寒插太清銀河垂地落天聲玉虹貫日晴空見驄馬翻瓢白晝傾作賦曾聞謗鴈蕩乘槎應可到蓬瀛何當一叱乖龍起手挽商霖洗甲兵越詠

郭 兮

五洩山

不到此山三十年重來風物自依然兩源秋色排千嶂五級泉聲落半天絕唱傳聞諸老句幽棲猶想默師禪迴頭迴與塵寰別何必蓬萊始是仙越詠

張唐卿

唐卿景祐元年進士第一

句

一舉首登龍虎榜十年身到鳳凰池

古今詩話張唐卿進士第一人登科期集興國寺題句于壁有人續云君看姚曄并梁固不得朝官未可知後果終于京官

楊察

察字隱甫。成都人。景祐元年進士。歷官知制誥。翰林學士。權御史中丞。端明殿學士。戶部侍郎。三司使。卒贈禮部尚書。有集。

別信州席上作

十二天辰數。今宵席客盈。位如星占野。人若月分卿。極醉巫山側。聯吟嶰管清。他年爲舜牧。協力濟蒼生。

東軒筆錄。楊侍郎謫信州。及召還。有士子十二人送于境上。

察卽席賦詩。皆用十二事。而引諭精切。士子無能屬和者。

鄭伯玉

伯玉字寶臣。莆田人。景祐元年進士。撫州觀察推官。韓魏公薦爲殿中侍御史。有錦囊集。

和王太傅游國清塘

寒日一觀眺。四天雲色稀。水風迎棹起。沙鳥背人飛。玉縷鱸新膾。金膏蟹正肥。斜陽促歸旆。那得戀漁磯。

莆陽文獻

何 鄣

鄆字聖從。成都人。景祐元年進士。累遷殿中侍御史。歷龍圖閣學士。出知外郡。熙寧中。以尚書右

邵氏聞見錄。文潞公知成都。喜行樂。有飛語至京師。御史何鄆字聖從蜀人。上遣察之。張少愚謂公曰。無足慮。因迎謁聖從于漢州。有妓善舞。聖從喜之間。其姓曰楊。聖從曰。所謂楊臺柳也。少愚取妓。帕題詩云。蜀國佳人號細腰。東臺御史惜妖嬈。從今

喚作楊柳舞盡春風萬萬條日聖從至成都頗嚴重潞公  
一日宴聖從迎妓歌前詞以勸酒聖從每爲之醉竟無所問

### 益州學聖訓堂詩

益爲藩捍西南隅物衆地大稱名都擇守來頌茲土政治人頗與他邦殊差跌一有戾條教便宜皆得行  
黜誅羣姦帖息不敢動無復弄兵艷穿窬任威或謂一時事立政恐非長世圖豈無達識究是否重在改  
作徒嗟呼仲翁文翁字裔孫有偉度敢決不以常文拘當官勇欲除弊法伊憂內惻仁心孚視人無異遠  
方意威行惠政還相須始時歲荒力賑救坐使餓殍成完膚既而爲俗思根本其在立學陳師謨大開儒  
庠務誨導秀民聳慕紛來趨遂言謂署鴻生職使演經傳傳諸徒奏函一上聞法座詔劄卽日來諧愈詔  
云信汝辦治蜀緩任威罰先文儒公心感激侈上賜刻在金石尊神謨覆之大廈榜美稱日久傳著期無  
渝邦人乘風爲盛事觀者填道來于于吁嗟多士其聽命勿卽邪徑安夷塗師無訛聖生率教信尙姬孔  
尊唐虞施之鄉邦勵雅俗仁誼得以相持扶漢皇初始盛文學起自蜀國行中區本朝教化視三代建元  
安可爲齊驅吾君訓辭諭萬里義均盤誥茲宣敷吾守教本樹一國學盛洙泗相涵濡臣謀君從協大義  
聖哲倡和眞同符欲歌盛節示萬古才不逮志嗟其愚成都文類

### 程師孟

師孟字公闢吳人景祐元年進士累官知廣州召爲給事中充直賢殿修撰判都水監出知越州  
青州授光祿大夫致仕

寒食遊九仙烏石二山

城中無事喜尋山。千里提封並海寬。賓客相從筵既冷。士民同出食猶寒。芳園病葉堆何限。古院閑花落幾般。誰道異鄉多感慨。登臨遲卻十年官。淳熙三山志

楓橋寺

門對雲山畫不如。師今一念六年居。邇來寺好尤瀟灑。張繼留題內翰書。自注今禹玉王內翰丁太夫人憂親寫是詩故不題名

遊楓橋偶成

晚泊橋邊寺。迎風坐一軒。好山平隔岸。流水漫過門。朱舫朝天路。青林對郭村。主人頭似雪。怪我到多番。  
以上吳郡志

遊玉尺山寺

永日清陰喜獨來。野僧題石作吟臺。無詩可比顏光祿。每憶登臨卻自回。福州府志

次韻元厚之少保留題朱伯原祕校園亭

碧瓦春城十萬家。可憐夫子獨堪嗟。園林猶有前朝木。冠蓋難尋故主花。園乃錢氏所創亭瞰夕陽鄰古刹。池通野水見晴沙。天然操尙無塵滓。合住蓬萊弄綵霞。蘇州府志

丁寶臣

寶臣，字元珍，常州晉陵人。景祐元年進士。歷祕閣校理、同知太常禮院，出倅永州。

和永叔新晴獨游東山

芳辰百五前，選勝到林泉。萬樹綠初染，羣花紅未然。陰巖猶貯雪，暖谷自生烟。婦汲溪頭水，人耕草際田。

日中林影直，風靜鳥聲圓。健令多情甚，尋春最占先。瀛奎律髓

五洩山

路緣蘿鳥蔭杉松，翠碧丹崖不計重。天作錦屏環十里，僧開珠屋面千峯。花間越鳥鉤轔語，溪外秦人彷彿。逢早晚車騎到林下，籃輿暇日待追從。越詠

題翠麓亭

諦看軒窗面翠微，暫來登此已忘機。地連佛寺樓臺古，泉落山田稻蟹肥。曉徑忽穿清氣入，夜船多載白雲歸。世人誰識紅塵外，終老功名未拂衣。惠山古今考

柳永

永字耆卿，初名三變，崇安人。景祐元年進士，爲屯田員外郎。以樂章擅名，有兄三復、三接，皆工文。號柳氏三絕。

藝苑雌黃：柳三變喜作小詞，薄於操行。當時有薦其才者，上曰：「得非填詞柳三變乎？」曰：「然。」上曰：「且去填詞，由是不得志。」日與儇子縱遊倡館酒樓間，無復檢率。自稱云「奉聖旨填詞柳三變」。

獨醒雜志：柳耆卿風流俊邁，聞于一時。既死，葬于棗陽縣花山。遠近之人，每遇清明日，多載酒肴飲于耆卿墓側，謂之弔柳會。

方輿勝覽范蜀公嘗曰仁宗四十二年太平鎮在翰苑十餘載不能出一語歌詠乃于書卿詞見之仁宗嘗曰此人任從風前月下淺斟低唱豈可令仕宦遂流落不偶卒于襄陽死之日家無餘財羣妓合金葬之于南門外每春月上冢謂之弔柳七

贈內臣孫可久

故侯幽隱直城東草樹扶蘇一畝宮曾珥貂璫爲近侍卻餘條褐作閑翁高吟擁鼻詩懷壯雅論盱衡道氣充厭盡繁華天上樂始將蹤蹟學冥鴻青箱雜記

中峯寺

攀蘿躡石落崔嵬千萬峯中梵室開僧向半空爲世界眼看平地起風雷猿偷曉果升松去竹逼清流入檻來旬月經遊殊不厭欲歸回首更遲迴建寧府志

鬻海歌爲曉峯鹽場官作

鬻海歌憫亭戶也

鬻海之民何所營婦無蠶織夫無耕衣食之源太寥落牢盆鬻就汝輸征年年春夏潮盈浦潮退刮泥成島嶼風乾日曝鹹味加始灌潮波墻成滷滷濃鹹淡未得閑採樵深入無窮山豹蹤虎跡不敢避朝陽出去夕陽還船載肩擎未遑歇投入巨竈炎炎熱晨暮爍堆積高才得波濤變成雪自從瀦滷至飛霜無非假貸充餓糧秤入官中得微直一緡往往十緡償周而復始無休息官租未了私租逼驅妻逐子課工程雖作人形俱菜色鬻海之民何苦辛安得母富子不貧本朝一物不失所願廣皇仁到海濱甲兵淨洗征輸輶君有餘財罷鹽鐵太平相業爾惟鹽化作夏商周時節大德昌國州志

句

分得天一角織成山四圍題會景亭會稽志

馬 遼

遼字仲塗樂平人景祐元年進士由臺諫轉吏部員外郎直龍圖閣卒

隱居詩話馬遼謫守宣州及其去也郡僚軍民爭欲駐留至以鐵鎖絕江遼于餞筵倚醉令官妓剥榧實而食眷眷若留連狀夜使人絕鎖解舟以水沃櫓牙使之不鳴逮曉舟去遠矣

再入臺作

連蹇多年心欲灰厭爲俗吏走塵埃豈知黃紙新書下還送青氈舊物來武騎強爲終不意河南難問媿無才一麾早晚江湖去相與持螯共酒杯饒州府志

呂 璣

璣字季玉晉江人景祐元年進士歷官光祿卿

威惠廟

陳元光父子有功于閩而史闕焉

當年平賊立殊勳時不旌賢事忍聞唐史無人修列傳漳江有廟祀將軍清源文獻

仲 訥

訥字樸翁定陶人景祐元年進士歷尙書屯田員外郎有集

負暄閑眠

茅簷晴日暖於春。一枕鈞天樂事新。滿眼繁華皆得意。午眠安穩卻無人。宋文鑑

送唐子方

力犯雷霆衆共危。遠投魑魅獨爲宜。忠州學業真無負。高廟神靈固有知。自倚聖明容直道。未甘憔悴死荒陲。滿朝卿相多公議。莫把文章作楚辭。事類文聚前集

楊謌

謌梓州人。景祐元年進士。

和燕龍圖海棠

西漢欺盧橘。東陽愛海棠。許昌奇此遇。子美欠先揚。杜宇三春節。蠶叢一國香。燕脂點亂雨。生色麗斜陽。富豔東君主。暄妍白帝方。錦樓移水色。玉壘換山光。風格林檎細。腰支郁李長。天生笑容質。時樣舞衣裳。少吐深深染。全開淡淡妝。烟媒護綠蒂。風陣損朱房。旋失因臨水。閑飄弗過牆。佩亡愁殺甫。簪脫卽連姜。蝶舞菱花照。鶯啼罨畫堂。仙如弄玉少。墜似綠珠常。不見還成悔。相思幾欲狂。春深濯錦水。日晚浣紗坊。臥對移簾押。吟看近筆牀。池清滿園倒。鳥起一枝昂。紫燕銜泥急。黃蜂趁蜜忙。化工真用意。銷得與攜觴。海棠譜

句

願前明主席。一問洛陽人。省試宣室受釐題驪山中山詩話。草不驚皇轍。山能護帝輿。省試蒲車溫公詩話

吳中復

中復，字仲庶，興國永興人。進士及第，累官殿中侍御史，歷龍圖閣直學士，出知成都。

遊海雲寺唱和詩并序

成都風俗歲以三月二十一日遊城東海雲寺，摸石於池中，以爲求子之祥。太守出郊，建高旗，鳴笳鼓，作馳騎之戲。大讌賓從，以主民樂觀者夾道百重，飛蓋蔽山野，謹謌嬉笑之聲，雖田野間如市井，其盛如此。渤海吳公下車期月，簡肅無事，從俗高會于海雲，酒旣中顧，謂寮屬曰：「一觴一詠，古人之樂事也。」首作七言詩以寫勝賞，席客亦有以詩獻者，更相酬和，得一十三篇，乃命幕下吏會稽王霽爲之序。

錦里風光勝別州，海雲寺枕碧江頭。連郊瑞麥青黃秀，遠路鳴泉深淺流。彩石池邊成故事，茂林坡上憶前遊。自注：予昔陪樞密田公遊此。綠樽好伴衰翁醉，十日殘春不少留。

歲華紀麗譜三月二十一日出大東門宴海雲山鴻慶寺，登衆春閣觀摸石蓋開元二十三年靈智禪師以是日歸寂，邦人敬之，入山遊禮，因而成俗。山有小池，土女探石其中，以占求子之祥。

成都西園十詠存三首

西樓

信美他鄉地，登臨有故樓。清風破大暑，明月轉高秋。朝暮岷山秀，東西錦水流。賓朋逢好景，把酒爲遲留。

方物亭

草木蟲魚部，披尋自古無。飛沈天產異，生植土風殊。物色隨心匠，形容記績圖。虛亭玩真意，浩思滿江湖。

流杯亭

結客乘公暇。流觴逐浩歌。亂峯晴倒影。曲水宛迴波。小海逢元已。蘭亭記永和。西州行樂事。應比晉賢多。

以上成都文類

江左謂海棠爲川紅

靚妝濃淡藁蒙茸。高下池臺細細風。卻恨韶華偏蜀土。更無顏色似川紅。尋香只恐三春暮。把酒欣逢一笑同。子美詩才猶閣筆。至今寂寞錦城中。海棠譜

寄題錢公輔衆樂亭

賢侯新葺水雲鄉。虛閣嶧嶧綠渺茫。波面長橋步明月。人家疎影帶殘陽。風中白鳥侵烟去。雨後紅蕖擁袖香。從此郡圖添故事。歲時遺愛似甘棠。延祐四明志

覽齊山陳鴻斷碑

翠琰何年沈朽壤。羨師尋訪得其餘。應同湘水斷碑字。難辨韓陵片石書。汨沒身名真夢幻。變遷時序易丘墟。收藏且作山中物。莫問陳鴻紀事初。齊山詩集

陳薦

薦字彥升。邢州沙河人。舉進士。神宗朝累官龍圖閣直學士。河北都轉運使。進資政殿學士。提舉崇福宮。卒贈光祿大夫。

子房廟

博浪沙頭觸副車。潛游東夏識真符。風雲知略移秦鼎。星斗功名啓漢圖。商老已來寧少海。赤松還約訪仙都。雍容進退全天道。凜凜高風萬古無。

燕子樓

僕射新阡狐兔遊。侍兒猶住水邊樓。風清玉簟慵欹枕。月好珠簾媚上鉤。寒夢覺來滄海闊。新詩吟罷紫蘭秋。樂天才思如春雨。斷送殘花一夕休。

桐江詩話陳舍人彥升有彭城八詠爲人所稱多以燕子樓爲絕倡殊不知子房廟詩最爲警絕彥升高祖廟詩云靜山川狂鹿走雷驚天地老龍飛范增墓詩云忿失壯圖撞玉斗豈知天命與金刀皆佳句也八詠今不傳于世惜哉

劉述

述字孝叔湖州人景祐三年進士歷荊州湖南北京西路轉運使神宗立召爲侍御史忤王安石謫江州提舉崇禧觀卒紹興初贈祕閣修撰

仙巖洞禱雨令諸暨時作

英英洞口雲觸石纔一縷須臾徧空山濡然作霖雨會稽志

五洩山

翠屏千疊水潺湲一簇青鵝杳靄閒惜是晚年逢此景悔將前眼看他山瀑飛蘿磴終難畫龍蟄嵒雲只暫閑薄宦勞人無計住明朝歸去又塵寰越詠

題竹閣

竹閣寒相倚。雲窗晚共開。閑身方外去。幽鳥靜中來。聲響風隨籜。陰移石上苔。遲留更清夜。待月露盈杯。

嚴州府志

葛密

密字子發江陰人宮弟官太常博士

近造浮屠之悟空者覩君謨省主給事留題詩板列楣棟間粲然可誦因摭方袍之意成拙句以寄  
昔年詩板著蓮宮筆力雄豪墨彩豐不日三階平國政山僧應待碧紗籠

蔡忠惠公集附

元積中

積中錢唐人景祐初黃巖令熙寧初爲司封郎中直史館知桂州軍有江湖堂詩集

題桐柏觀

九峯巍絕亂雲屯石室瓊臺舊址存山險密盤之字徑洞深高闢丙方門碧桃花爛春溪暖紫玉簫沈月  
榭昏未覺仙家光景晚人間歸去見來孫

赤城志

董淵

長樂令

靈峯院龍龕山和蔡君謨

礧硌彌沙界豁古洞天門鄰金布地橋枕玉鳴泉庭鶴歸迷主龕龍去失年掃雲嫌俗駕題壁詫詩仙  
勝景無今古居人有後先不知遊者馭誰見海爲田

蔡忠惠公集附

劉嗣隆

嗣隆、仁宗朝以尙書職方員外郎知袁州。

宜春臺

一族亭臺畫亦難。公餘到此幾盤桓。山高不似城中景。樹密尤宜雨後看。風送江聲穿郡郭。日推雲影下峯巒。當時吏部曾遊否。何事無文石上刊。袁州府志



# 宋詩紀事卷十四

蘇舜欽

舜欽字子美。其先梓州人。家開封易簡孫。耆子舜元弟。景祐中進士。累遷集賢校理。監進奏院。坐用故紙錢除名。居蘇州。買水石作滄浪亭。以自適。終湖州長史。卒有滄浪集。

舊舊續聞。蘇子美監奏邸。舊例鬻故官券。以賽神因而宴客。獨李定不預。遂摭其事。言于中丞王拱辰御史劉元瑜。迎合時宰之意。興奏邸之獄。一時英雋斥逐殆盡。有一網打盡之語。故梅聖俞有詩云。一客不得食。覆鼎傷衆賓。蓋指李定也。

王直方詩話。子美嘗作春睡詩云。身如蟬蛻一榻上夢似楊花千里飛。歐公見之驚曰。子美可念。未幾果卒。

## 淮中晚泊牘頭

春陰垂野草青青。時有幽花一樹明。晚泊孤舟古祠下。滿川風雨看潮生。

## 夏意

別院深深夏簟清。石榴開偏透簾明。樹陰滿地日卓午。夢覺流鶯時一聲。

錢唐厲鶚  
祁門馬曰璐  
同緝

王直方詩話黃山谷最愛此二詩累書之或真草或大字

送人歸吳江

江雲春重雨垂垂索莫情懷送客歸不慣東流促迴棹羨他雙燕逆風飛。

天平山

吳會括衆山戢戢不可數其間號天平突兀爲之主傑然鎮西南羣嶺爭拱輔吾知造物意必以屏大府清溪至峯前仰視勢飛舞偉石如長人肅立欲言路捫蘿緣險磴爛漫松石古中腰有危亭前對翠峯舉石竇迸玉泉泠泠四時雨源生白雲間顏色若粉乳早年或播灑潤可足九土柰何但澄澈未爲應龍取予方棄塵中巖壑素自許盤桓擇勝處至此快心脅養內聊自清終勝甘於虎

過蘇州

東出盤門刮眼明蕭蕭疎雨更陰晴綠楊白鶯俱自得近水遠山皆有情萬物盛衰天意在一身羈苦俗人輕無窮好景無緣住旅櫂區區暮亦行

獨步滄浪亭

花枝低欹草生迷不可騎入步是宜時時攜酒只獨往醉倒惟有春風知

石林詩話姑蘇州學之南積水彌數十頃傍有小山高下曲折相望蓋錢氏時廣陵王所作既積土爲山因以爲池灌水焉瑞光寺卽其宅而此其別圃也廢歷間子美謫廢以四十千得之爲居傍水作亭曰滄浪歐陽公詩所謂清風明月本無價可惜

只賣四萬錢者是也。子美既死，其孤不能保，遂廢易主矣。

苦溪漁隱叢話此詩真能道幽獨閑放之趣。

### 長橋觀魚

曙光東向欲朧明。漁艇縱橫映遠汀。濤面白烟昏落月。嶺頭殘燒混疎星。鳴榔莫觸蛟龍睡。舉網時聞魚鼈腥。我實宦遊無況者。擬來隨爾帶竿簫。

苦溪漁隱叢話元次山集自釋云帶答箸而畫船注云上郎丁下桑荒切竹器也故唐書音訓云讀作郎桑見結本集音訓又音上力丁下息拯切取魚籠也然廣韻集韻于庚清青三韻皆不收此箸字並于上聲迥字韻中收之蘇子美黃魯直秦少游皆于青字韻中押真誤也。

### 秋日登閭門

年光冉冉催人老。雲物涓涓又變秋。家在鳳凰城闕下。江山何事苦相留。以上滄浪集

古今詩話子美自書此詩旁云江山留人也人留江山也卒不用亦詩之識。

南園南園吳越廣陵王元璵之舊圃也歲久摧圯至元豐中猶有流杯四照百花樂堂惹雲風月等處

西施臺下見名園。百草千花特地繁。欲問吳王當日事。後來桃李若爲言。

吳郡志

句

玉帳夜嚴冰似水。茅齋春靜草如烟。窮居和長安帥葉清臣見寄

西清詩話

江休復

休復、字鄰幾。開封陳留人。舉進士。充集賢校理。坐與蘇舜欽祠神會飲。謫監蔡州稅。久之復官。歷刑部郎中。修起居注。卒有集。

詩話總龜江鄰幾善爲詩。清淡有古風。蘇子美坐進奏院事謫官後死吳中。江作詩云。郡邸獄冤誰與辨。皇橋客死世同悲。用事精當。嘗有古詩云。五十踐衰境。如我在明年。江天資淳雅。喜飲酒。鼓琴。園葵人以酒召之。未嘗不醉。或不能歸。卽宿人家。商度風韻。陶靖節之比云。江嘗通判廬州。有酒官善琴。以坐職不得出。江旦旦就之。郡中沙門道士。及里畝能某者數人。呼與同往。郡人見之習熟。因畫爲圖。前列趨道一人騎馬青蓋。其後沙門道士褐衣數人。葛巾芒履。累累相尋。意思蕭散。惜時無名手。此畫不足傳後。何減稽阮也。

秋懷

歐陽公序云。鄰幾學問通博文。詞雅正。詩尤清淡。閑肆可喜。

西風萬里至。曠然天地秋。暮雨生夕涼。百蟲鳴啾啾。楚山曉蒼蒼。楚水亦悠悠。騷人試登臨。感物增離憂。

所思在遐方。欲往路阻修。香草有蕙茝。嘉樹有梧楸。白露委芳馨。彫零使我愁。窮年倦羈窶。江湖思舊遊。

級蘭製芰荷。飄泛一葉舟。肆情雲水間。意適何所求。

同持國宿太學官舍

翳翳雲月薄。泠泠雪風清。學省夜岑寂。天街斷人行。廣庭層閣陰。尋廊步餘明。松篠遞遙響。如聞弦誦聲。悠悠子佩詩。講座塵埃生。迴就直舍休。亹亹談道精。心會境物融。泯然遺世營。寒眠屢展轉。寤言寫素誠。以上宋文鑑。

王官谷司空侍郎故居

首陽采薇士。商代緬以遐。唐季有夫子。遯世肥且嘉。拔迹離污險。抗志凌青霞。剝運扇頽風。姦雄比回邪。不然隨波流。橫噬猰㺄牙。吁哉土德衰。嗟乖鬼盈車。英英夫子賢。顯晦吾所嗟。相見棲隱情。遺文攀菁華。山藏白駒谷。水遶騷人家。躊躇碧峯前。寒日忽以斜。王官谷集。

李絢

絢字見素。邛州依政人。第進士。仕爲太子中允。宰相杜衍拔真臺省。坐讒出知潤州。累遷起居舍

人。權判吏部流內銓卒。

送天柱馮先生

閑馳風馭恣飄飄。因失仙班幾度朝。紫閣舊鄰秦樹老。赤城新別海山遙。飛鳧又說春經嶽。叱橘曾令夜探潮。不是桃源不歸去。故人多半在烟霄。洞霄詩集

句

收得桑榆歸物外。種成桃李滿人間。和杜相歷代吟譜。

王益柔

益柔，字勝之，曙子。仁宗朝用蔭至殿中丞，除集賢校理。坐蘇舜欽奏邸獄，黜監復州酒，累遷知制誥，兼直學士院，以祕書監出知外郡。

遙題錢公輔衆樂亭

四明舊說南湖好，歲久灝厓變涂潦。建旗一日得賢侯，千里山川真再造。偃月隄成車馬道，湖光如截天如抱。鴛鴦瓦影亂鳴鶯，綠柳環隄花映島。珠宮貝闕競來還，泉客鮫人爭獻寶。春風浩蕩波濤起，鬢髮仙人騎赤鯉。金盤下箸飽鱸魚，塵事茫茫隔烟水。都人士女從如雲，絲竹清音兩岸聞。飲酣落筆歌綠水，爛漫天葩飄遠芬。延祐四明志。

張羣

羣，仁宗朝太常少卿。

謫袁州道中寄蘇子美

憶昨共繫吳門舟，我獨千里君獨留。江花粲爾不同醉，野月娟然增此愁。談笑還令舌本強，詩篇頓覺筆鋒柔。滄浪書信無消息，鴻雁來時數舉頭。袁州府志

鮮于侁

侁，字子駿，閩中人。景祐中進士乙科。慶歷中遷祕書丞。神宗朝爲利州路轉運使。元祐初拜左諫議大夫。出知陳州。卒。紹聖間與黨籍有諫議集。

郡齋讀書志。侁治經術有法論。著多出新意。

晚年爲詩與楚詞尤工人以爲有屈宋風。

新堂夜坐月色皎然由連理亭信步庭中徘徊久之因爲五言一首

秋風動微涼。天雨新霽後。閑齋獨隱几。明月在高柳。振衣步庭下。顥氣入襟袖。天空雲漢明。隱約辨列宿。蒼蒼松檜上。零露霏欲溜。脫葉滿閑園。繁華迨衰朽。清宵望蟾彩。宜付一杯酒。多病謝尊罍。城頭轉寒漏。

宋文鑑。

### 舜祠

道歷山兮透蛇。思古人兮感慨。並儲胥兮肅止。仰魯雲兮掩曖。獸何鳴兮林中。鳥何悲兮山上。木何爲兮不翦。草何爲兮茂暢。帝之神兮在天。帝之德兮在人物。具兮四海。心精兮一純。采秀實兮山間。摘其毛兮澗底。玉醴湛兮瓊茅。肴脩雜兮蘭茝。樂備兮九奏。鳳舞兮儀韶。人駿奔兮如在。君卒享兮神交。兗州府志

### 和文與可洋州園池

千峯起華陽。一水連天漢。初月正沈鉤。隱然飛兩岸。

湖橋

城上望南園。園深知幾許。啼鳥聞閒關。遊人不知處。

南園

琴躋積翠外。繩結穹窿間。軒楹最佳處。四顧唯江山。

二樂樹

春歸閨風家巧入天匠手能將五色雲點綴當戶牖

披錦亭 陝西通志

呂 漆

漆字濟叔揚州人寶元元年進士第一累擢知制誥知杭州拜翰林學士神宗朝官至樞密直學士提舉醴泉觀卒贈禮部侍郎

米芾書呂漆事云漆爲人簡倨每接賓客不過數言時人目爲七字舍人

句

九霄離海嶠一夕過天池試鯤化爲鵬

東都事略仁宗見此句曰此當作狀元升爲第一

范 鎮

鎮字景仁華陽人居洛陽寶元元年舉進士爲禮部第一累知制誥英宗立遷翰林學士神宗朝歷端明殿學士提舉崇福宮封蜀郡公卒謚忠文有集

東都事略鎮爲文清麗簡遠少時嘗賦長嘯卻胡騎流傳契丹謂鎮爲長嘯公

迂叟詩話范景仁喜爲詩年六十三致仕一朝思鄉里遂輕行入蜀故人呂才元大臨知梓州景仁枉道過之歸至成都日與鄉人樂飲散財于親舊之貧者遂遊峨嵋青城山下巫峽出荆門凡期歲乃還京師在道作詩凡三百五篇其一聯云不學鄉

人誇駒馬，未餓吾祖泛扁舟。此二事他人所不用也。

仲遠龍圖見邀學射之遊先寄五十六言

幾年魂夢寄西州。春晚歸逢學射遊。十里香風塵不動。半山晴日雨初收。指撝武弁呈飛騎。次第紅妝數勝籌。夾道綺羅瞻望處。管弦旌旆擁遨頭。

送羅勝卿同年提舉玉局觀

匹馬西歸去。知君得意偏。人情重鄉里。官職更神仙。曉後無衙喏。旬頭有俸錢。何須駕白鶴。辛苦上青天。  
以上成都文類。

送張職方守筠州

職方名正子公紀亦守衢州

南國一麾守。知公安此行。家山雖萬里。子舍只鄰城。驛問中宵至。風謠接畛聲。定應持課最。同命到天京。  
方輿勝覽。

七夕

翠幙瑤梯百尺樓。樓前星斗自悠悠。天家仙會能多少。未到平明已別愁。  
合璧事類前集

再至史局

史局逾年別。重來已涕零。先書未絕筆。又欲汙新青。

合璧事類後集范蜀公少與柳耆卿同年愛其才美聞作樂章嘗歎曰繆其用心謝事之後親舊

間盛唱柳詞復歎曰仁廟四十二年太平吾身爲史官二十年不能贊述而耆卿能盡形容之

黃葵

開時閑淡斂時愁。蘭菊應容預勝流。剩欲持杯相領略。一庭風露不禁秋。

合壁事類別集

韓太丞同守成都

春色草將深。春寒柳未陰。青天指行棧。綠水蕩離襟。後乘何爲託。前旌喻此心。南枝倦飛翼。憑爲寄歸音。

雞鳴臺在靈寶縣南齊田文客許雞鳴度關處今人築臺

古人惟恃衆心城。何事秦皇苦好兵。本設函關禁姦詐。不知夜半有雞鳴。

河南通志

和王都尉

慣乘霄漢鶴。翻說淤泥蓮。可惜玉臺處。等閑闌幾年。

式古堂書考王晉卿跋云公不喜釋氏故有是句亦可一笑也又云余前年恩移清潁道出許昌前途小阻留西湖之別館者  
幾一月常與韓持國范景仁泛舟嘯詠使人輒忘去國流離之恨也韓公德性溫厚風度高雅固已可愛范公雖老而精神不衰議論純正白須紅面動輒酣醉時余有所賦詠公卽取紅蓮葉命筆疾書初不經思佳詞麗句頃刻而成坐客莫不驚歎也比聞朝廷就除端明殿學士以寵之因思方今進任者成如公者若再起之亦足以厚風俗耳

蘇 級

穀字宣甫。晉江人。紳從弟。寶元元年進士。知邕州。儂寇至。嬰城以守。城陷自焚死。贈奉國軍節度使。謚忠勇。

英德碧落洞

此洞誰開鑿。難窮造化原。地幽疑窟室。巖透若天闕。蘚石高低路。樵聲裏外村。雲嵐青欲滴。烟壁翠堪捫。  
一帶谿泉急。千枝石乳繁。鼠飛猶白晝。虎嘯近黃昏。老木吟風韻。枯崖滲雨痕。碧瀾秋寸寸。寧負羽皇言。

清源文獻

司馬光

光字君實。陝州夏縣人。以父池任入官。寶元初進士甲科。累除知制誥。改天章閣待制。知諫院。英宗朝除龍圖閣直學士。改右諫議大夫。神宗卽位。擢翰林學士。判西京留司御史臺。拜資政殿學士。哲宗卽位。拜左僕射。兼門下侍郎。薨于位。贈太師。溫國公。謚文正。有傳家集。

灑水燕談。司馬文正公高才全德。大得中外之望。公之退十有餘年。天下日冀其復用。故子瞻獨樂園詩曰。先生獨何事。四海望陶冶。兒童誦君實。走卒知司馬。蓋紀實也。

孤臣泣血錄。金人入汴。駐青城。索監書藏經。如資治通鑑。蘇黃文集之屬。皆指名取索。當時朝廷行下諸路。盡毀坡谷著作。姦黨博會。至欲焚資治通鑑。賴有神宗御製序文。不敢毀。而敵國之敬重顧如此。

侯鷗錄。司馬文正公言行俱高。然亦每有譖語。嘗作詩云。由來獄吏少和氣。臯陶之狀如削瓜。

困學紀聞。司馬公早朝詩。太白明如李。出漢天文志。熒惑歲星居其東北半寸所。如連李。又卽事云。雨不成遊布路歸。出左傳。自朝布路而罷。今集皆注云。恐誤。蓋不考也。

謝孫興宗惠草蟲扇

吳僧畫團扇，點綴成微蟲。  
秋毫宛皆具，獨竊天地功。  
細者及蛛蝥，大者纔阜螽。  
枯枝擁寒蜩，黃葉黏飛蜂。  
翾然得生意，上下相追從。  
徒觀飛動姿，寧覩筆墨蹤。  
兒曹取眞物，細校無不同。  
恐其遂躍去，亟取藏箱中。  
乃知藝無小，意精神可通。  
不與誤圖蠅，能感紫髯翁。  
子猷狀蟬雀，藏本傳河東。  
不知古何如，此畫今人雄。  
僧亡已云久，其徒頗能工。  
舊法存百一，要足超凡庸。  
友人幸爲賜，物薄意何隆。  
玩之不替手，愛重心無窮。  
常如對君子，穆穆來清風。

送張兵部中庸知遂州

劍嶺橫天古棧微，相如重駕傳車歸。  
雙親倚門望已久，千騎踏雪行如飛。  
人間富貴非不有，似君榮耀世亦稀。  
聞道西州遺像在，使我涕泗空霑衣。先人知小溪縣，正版籍均賦役。聞邑人誦之，畫像猶存。

衆樂亭在鄞縣西湖中，錢公倚所建。

橫橋通廢島，華宇出荒榛。  
風月逢知己，湖山得主人。  
使君如獨樂，衆庶必深顰。  
何以知家給，笙歌滿水濱。  
送章伯鎮知湖州

江外饒佳郡，吳興天下稀。  
蓴羹紫絲滑，鱸膾玉花肥。  
星斗寒相照，烟波碧四圍。  
柳侯還作牧，草樹轉清輝。

皇后閣春帖子

慶壽風烟接未央，飛樓複道鬱相望。  
春來無以消長日，閑取經書教小王。

夫人閣春帖子

聖主終朝視萬機，燕居專事養希夷。  
千門永晝春岑寂，不用車前插竹枝。以上傳家集

詩林廣記司馬公此  
帖亦皆寓諷勸之意。

### 始至洛中言懷

三十餘年西復東，勞生薄宦等飛蓬。  
所存舊業唯清白，不負君恩有樸忠。  
早避喧煩真得策，未逢危辱好收功。  
太平觸處農桑滿，贏取閭閻鶴髮翁。

石林詩話溫公熙寧間自  
長安得請留臺而歸作

### 過堯夫天津居

草輶波清沙路微，手攜筇杖著深衣。  
白鷗不信忘機久，見我猶穿柳岸飛。

聞見前錄公判西京留司御史臺遂居洛買園子尊賢坊以獨樂名之嘗謂康節曰光陝人先生衛人今同居洛卽鄉人也有如先生道學之尊當以年德爲貴官職不足道也一日著深衣自崇德寺書局散步洛水隄上因過天津之居謁曰程秀才云

旣見溫公也問其故笑曰

司馬出程伯休父故曰程

### 耆英會

洛下衣冠愛惜春，相從小飲任天真。  
隨家所有自可樂，爲具雖微誰笑貧。  
不待珍羞方下筯，只將佳景便

娛賓庾公此興知非淺。藜藿終難作主人。

作真率會伯康君從七十八歲安之七十七歲正叔七十四歲不疑七十三歲叔達七十歲光五歲合五百一十歲口號成詩用安之前韻。

七人五百有餘歲同醉花前今古稀走馬鬪雞非我事紵衣絲髮且相輝經春無事連翩醉彼此往來能幾家切莫辭斟十分酒儘從他笑滿頭花以上洛中耆英會詩

和景仁卜居許下景仁頃見許居洛今而倍之故詩頗致其怨

壯齒相知約歲寒索居今日鬢俱斑拂衣已解虞卿印築室何須謝傅山許下田園雖有素洛中花卉足供閑他年決意歸何處便見交情厚薄間合璧事類別集

次韻謝杜祁公借觀五老圖

脫遺軒冕就安閑笑傲丘園縱倒冠白髮憂民雖種種丹心許國尙桓桓鴻冥得路高難慕松老無風韻自寒聞說優遊多唱和新篇何惜畫圖看鐵網珊瑚

句

烟曲香尋篆杯深酒過花明道雜志

石揚休

揚休字昌言眉山人舉進士歷刑部員外郎知制誥同判太常寺遷工部郎中卒鶚按司馬溫公詩自

注云釋褐昌言除同州推官光華州判官是與溫公同年也

東都事略。揚休喜閑放。平居養猿鶴。  
收圖書以自適。工于詩什。世稱其才。

謝文瑩師攜琴見訪

鄭衛澯俗耳。正聲追不回。誰傳廣陵操。老盡嶧陽材。古意爲師復。清風尋我來。幽陰竹軒下。重約月明開。

湘山野錄。皇祐間館中詩  
筆石揚休最得唐人風格

海棠

開盡妖桃落盡梨。淺萼深萼照華池。都緣西蜀盤根遠。豈是東君屬意遲。烟慘別容醺宿酒。露凝啼臉溼  
臙脂。須知賈相風流甚。曾許神仙品格奇。海棠譜

呂公著

公著字晦叔。夷簡子。舉進士。累遷殿中丞。神宗朝官資政殿大學士。哲宗卽位。拜右僕射兼中書侍郎。元祐三年。拜司空同平章軍國事。薨贈太師。中國公。謚正獻。入黨籍。有集。

分題得瘦木壺

天地產衆材。任材謂之智。棟桷與楹杙。小大無有棄。方者以矩度。圓者中規制。嗟爾木之瘦。何異肉有贅。生成擁腫姿。賦象難取類。彊括所不施。鉤繩爲爾廢。大匠睨而往。惻然乃有意。孰非造化功。而終朽不器。剗剔虛其中。朱漆爲之僞。勳獎挹酒醴。施用惟其利。犧象非不珍。金罍非不貴。設之于楹階。十目肯注視。

幸因左右容及見爲奇異人之于才性夫豈遠于是性雖有不善在教之猱勵才亡不可用由上所措置飾陋就其長皆得爲良士執一以廢百衆功何由備是惟聖人心能通天下志宋文鑑

風月堂詩話歐公居潁上申公呂晦叔作太守聚星堂燕集賦詩分韻公得松字申公得雪字劉原父得風字魏廣得春字焦千之得石字王回得酒字徐無逸得寒字又賦室中物公得鸚鵡螺杯申公得瘦木壺劉原父得張越琴魏廣得澄心紙焦千之得金星硯王回得方竹杖徐無逸得月硯屏風又賦席間果公得橄欖申公得紅蕉子劉原父得溫柑魏廣得鳳棲焦千之得金橘王回得荔枝徐無逸得楊梅又賦壁間畫像公得杜甫申公得李文饒劉原父得韓退之魏廣得謝安石焦千之得諸葛孔明王回得李白徐無逸得魏鄭公詩編成一集流行于世當時四方能文之士及館閣諸公皆以不與此會爲恨

南窗紀談歐公稱賞  
此詩以爲有宰相器

### 呂公弼

公弼字賓臣夷簡仲子賜進士出身歷樞密直學士知成都府神宗朝進樞密使出知外郡爲西太一宮使薨贈太尉謚惠穆

### 琴臺

煙樹重城側琴臺千古餘早爲梁苑客晚向茂陵居賦給尚書筆歸乘使者車清風覲舊隱長自聳鄉閭

卜肆垂簾地，依然門徑開。沈冥時已往，思慕客猶來。烏啄虛簷壞，狐穿古井摧。空餘舊磯石，歲歲長春苔。  
以上成都文類。

趙衆

衆官龍州簽判與司馬溫公同時。

題倅廳吏隱堂

滿耳江聲滿目山。此身疑不在人寰。民舍古意村。村靜吏束刑書日日閑。方輿勝覽

張徵

徵字百常。陳留人。寶元元年進士甲科。

自然亭

久雨妨漁復滯樵。自然亭上一逍遙。萬緣不是閑中起。百事唯于睡裏消。老去自知如蠟燭。病來誰悟似芭蕉。愛名之世忘名客。幸有山林舊市朝。瀛奎律髓

書故三司副使陳公亞之詩軸後

款題元豐三年

破錦囊開玉振金。舍人胸次右丞心。爲時黼藻衣冠藪。與國丹青翰墨林。慷慨似誰雙舞劍。風流隨處一歌琴。燕貽苦志追先烈。子夏何須論淺深。鐵網珊瑚

吳充

充字沖卿。建安浦城人。育弟寶元元年進士。熙寧中累遷檢校太傅樞密使。代王安石爲中書門

下平章事監修國史罷爲觀文殿大學士西太一宮使卒贈司空兼侍中謚正獻。

聽讀詩義感事

時修撰經義所初進二南有旨資政殿進讀

雪銷鳩鵠御溝融燕見殊恩綴上公晝日乍驚三接寵正風獲聽二南終解頤共仰天顏喜牆面才容聖域通午漏漸長知禹惜侍臣何術補堯聰王荊文公詩自注

史院席上作

蘭臺開史局玉屏賜君餘賓友求三事規摹本八書汗青裁倣此衰白盍歸歟詔許從容會何妨醉上車

揮塵後錄神宗朝詔修仁英兩朝國史開局日詔史院賜筵時

吳沖卿爲首相提舉二府及修史官就席上成詩沖卿唱首

送張君宰吳江

全吳風景好之子去弦歌夜犬驚胥少秋鱸餉客多縣樓疑海蜃銜鼓答江鼉遙想晨鳧下長橋正綠波

明道雜志

題招提院靜照堂

人說招提好師從靜照來親攜玉堂句徐叩華門開好事能如此題詩豈易哉明年得東守繫舸一裴回至元嘉禾志

遙贈錢公輔

使君新自四明歸邀我同爲衆樂詩山川可愛惜未見晝想夕思心爲罷恍然神遇若有得齋身乃在天

之涯漲海連空四無岸。天吳卻坐鯀人觀。以手揮弄日月丹。能令桑田變瀰漫。海邊偶到山城中。山城二月多春風。牛羊閑暇夕陽晚。樓閣參差朝霧濃。一泓山溜佛頭綠。環以翠屏風六曲。人烟擾擾事嬉遊。落花啼鳥滿汀洲。中爲臺榭闢十二。上有藻井排文楸。旁人指點此何許。云是四明行樂處。此樂爲民非爲身。始知集賢錢使君。使君風韻誰之比。政事次公詩短李。醉憑熊軾勸耕疇。狂取螺杯翻舞袂。儂愛使君君勿歸。詔書奪去何如爲。閑侍玉皇香案側。銀臺深阻無消息。意迷卻悟坐空齋。忽省君詩昨日來。疊紙爲君書所見。不知衆樂誠然哉。延祐四明志

宋敏求

敏求字次道。綏子。賜進士第。爲館閣校勘。治平中。知制誥。神宗朝。忤王安石。以右諫議大夫奉朝請。尋除史館修撰。集賢院學士。加龍圖閣學士。卒贈禮部侍郎。有書闈前後集。西垣制辭文集。

史院席上奉和首相吳公元韻

二聖垂鴻烈。天臨四紀餘。元台來率屬。賜會寵刊書。世業叨榮甚。君恩可報歟。袞衣相照爛。歸擁鹿鳴車。  
揮麈後錄

題招提院靜照堂

叢林起新構。燕坐水雲鄉。本自禪心靜。能令世累忘。幡花圍晝永。鐘梵度宵長。歸械新篇富。籠紗映寶坊。  
至元嘉禾志

薛利和

利和字天益興化人寶元元年進士歷知春潮惠三州遷屯田員外郎

謝王介甫

一路生靈陡頓貧廟堂康濟豈無人君侯若問茶租日請把茶租乞與人

莆陽文獻熙寧二年王安石議榷茶欲擢利和提舉廣東茶

事利和作詩謝之云云遂就常調通判廣州茶法卒不行

柳應辰

應辰武陵人寶元元年進士仕至尚書都官員外郎永州通判

刻活溪石上

活溪石上大江邊心記閑將此地鐫自有後人來屈指四千六百甲寅年

容齋五筆活溪石上有大押字題云押字起于心心之所記人不能知大宋熙寧十年甲寅歲武陵柳應辰仍有詩云云閬中陳思跋云柳都官欲以怪取名者所至留押字益丈莫知其何爲押字古人書名之草者施于文記以自識別耳今鐫刻廣博如許已可怪矣好事者謂能祐遂不祥真大可笑

邵必

必字不疑丹陽人亢從父寶元元年進士官龍圖閣直學士知成都

題錢公輔衆樂亭

海邊民物鮮歡娛。太守經營與衆俱。闢圃新陰多杞柳。池塘生意足魚蒲。長空不礙高飛鵠。淺水兼容短脛鳧。此樂有誰知。我趣歸來紅旆日西晡。延祐四明志

裴若訥

若訥、常州江陰人。寶元元年進士。

江陰絕句

紫蓴江上是吾家。一葉扁舟一釣車。何必陶公種魚法。雨汀烟渚盡生涯。錦繡萬花谷



# 宋詩紀事卷十五

錢唐厲鶚緝

祁門馬曰璐同緝

李大臨

大臨字才元成都華陽人寶元元年進士累官祕閣校理神宗朝除知制誥天章閣待制

西園辨蘭亭和韻

沙石香叢葉葉青卻因聲誤得蟬名騷人佩處唯荆渚識者知來徧蜀城消得作亭滋九畹便當入室異羣英非逢至鑒分明說汨沒人間過此生成都文類

題招提院靜照堂

地勝常新構僧閑晝杜門山林誰樂靜城市亦非喧客引空彈指風來不動幡祇應常宴坐對境一無言至元嘉禾志

謁濂溪周處部

簾前翠靄逼廬山門掩寒流盡日閑我亦忘機澹榮利喜君高躅到松關廬山志

周孟陽

孟陽字春卿其先成都人徙海陵第進士英宗朝累官集賢殿修撰同判太常寺神宗立拜天章



張宗永

宗永、華州人。寶元中。知建安縣。

題陳相別業

喬松翠竹絕纖埃。門對寒山盡日開。應是主人貪報國。功成名遂不歸來。

墨客揮犀。宗永嘗以事失鄭州。陳相意陳公有別業在鄂杜間。宗永知公好絕句詩。乘閑詣之于壁。大書二韻。莊督錄以聞。公覽而善之。待之如初。

句

大書文字隄防老。剩買峯巒淮備閑。倦遊雜錄。

雷簡夫

簡夫字太簡。邵陽人。康定中。杜衍薦之。以校書郎簽書秦州觀察判官。累遷尚書職方員外郎。

寄甘露舒公上人

成都多少寺。梵學競推能。到老不破戒。滿城唯此僧。池龍聽夜講。海客施年燈。別後空相憶。塵勞正可憎。  
成都文類

元居中

居中錢唐人。康定中。台州守。至太常少卿。

風水洞上祖龍圖無擇

洞蔽深雲遠俗塵。山中曾未識朱輪。自從白傅來遊後。五百年間又一人。咸淳臨安志

蘇頌

頌字子容。南安人。紳之子。徙居丹陽。慶歷二年進士。神宗朝歷集賢院學士。知開封府。哲宗卽位。累遷翰林學士。拜右僕射。兼中書門下侍郎。罷爲集禧觀使。徽宗立。進太子太保。累爵趙郡公。卒贈司空魏國公。有集。

送朱郎中壽昌通判河中

邸風詠凱風。以成孝子志。鄭人復君母。傳稱能錫類。中郎常有懷。生不識所恃。登朝雖厚祿。當食每忘饋。念昔鞠育勞。嗟今出處異。倚門豈不待。兩求終莫致。乳鳥思反哺。哀鳴自垂翅。百草搖春暉。寧無謝生意。灑血向穹壤。解組出臺寺。馳驅咸雍郊。歷訪經行地。至行感神明。精誠通夢寐。悠悠大道傍。親息忽相值。紫綬拜北堂。白頭歸長嗣。悲忻敍契闊。悅如隔生事。四紀世路殊。一朝版輿侍。茲事昔未有。聞者共驚喟。帥守爲之言。詔趣還官次。當年二千石。寵名非所利。仕或便鄉關。安用竹符使。蒲中母家近。自屈爲倅貳。受命慰慈顏。騰裝慨歸思。旣徇報德心。亦安效官智。觴以萬壽薦。衣成五綵戲。無復興寒泉。何須賦大隧。令人及聖善。孝慈兩不匱。贈言述高風。庶用激忠義。

次韻蔣穎叔同遊南屏見惠長篇

青山橫莽蒼。萬石出南麓。古刹表耆閣。高聲聳羣玉。居惟擇岡巒。近摩數松竹。郡郭路非遙。遊人春不宿。

陟巘極躋攀循崖勞僱伏架筒引流泉跨嶺構重屋講坐據妙峯禪堂對枯木幽尋難屢期將往誰能獨偶逢霜臺客暫駐馳馬足聯步訪叢林終朝走郊牧相期方外遊頓忘河上曲夷路喜君騰高閣暫予束更聽名理言俯愜心中欲况已證真常詎止齊寵辱願言挹清風可用警浮俗

贈同事閣使以下二首使北時作

山路盡陂陼行人涉險多風頭沙磧暗日上雪霜和草淺鷹飛地冰流馬飲河平生畫圖見不料此經過

奚山路出奚山路入中京界道旁店舍頗多人物亦衆

行盡奚山路更賒路旁時見百餘家風煙不改盧龍俗唐盧龍節度兼押契丹使塵土猶兼瀚海沙朱板刻旗村肆食邸門挂木刻朱旗青氈通轄貴人車貴族之家車屋通以青氈覆之皇恩百歲加荒憬物俗依稀亦慕華

暮春與諸同僚登鍾山望牛首

清明天氣和江南春色濃風物正繁富邦人競遊從官曹幸多暇交朋偶相逢并驅出東郊乘興遊北鍾陟險不蠟屐扶危靡揩筇上登道林祠俯觀辟支峯亂山次阡陌長江遶提封蕭條舊井邑茂盛新杉松攬物思浩然懷古心顚顚念昔全盛時茲山衆所宗天都對雙闕霸業基盤龍六朝遞興廢百祀居要衝人情屢改易世事紛交攻當時佳麗地一旦空遺蹤唯有出岫雲古今無變容

和題李公麟陽關圖

三尺冰紝一絕詩翩翩車馬送行時尊前懷古閑開卷看盡關山遠別離以上魏公集

和右僕射劉公莘老夜直中書省見寄之什

五年班綴望夔龍。曾託帡幪庇雨風。末路自憐黃髮老。早時曾識黑頭公。升沈不改交情見。出處雖殊趣舍同。謾叩蕪音答高唱。終慚下管應清宮。卻埽編

卽席獻文潞公

高燕初陪聽拊鼙。清談仍許奉揮犀。自知伯起難逋峭。不及淳于善滑稽。舞奏未終花十八。酒行先困玉東西。荷公德度容狂簡。故敢忘懷去町畦。

卻埽編熙寧間蘇丞相奉使契丹道過北京時文潞公爲留守燕會款洽文公因問魏收有逋峭難爲之語何謂蘇公曰聞之宋元憲公蓋梁上小柱名取有曲折之義耳蘇公以文人多用近語而未及此乃用爲一詩紀席上事獻文公云

春帖

璇霄一夕斗杓東。激<sup>去聲</sup>晨曦照九重。和氣薰風摩蓋壤。競銷金甲事春農。宋藝圃集

王安石

安石字介甫臨川人慶歷二年進士神宗朝累除知制誥翰林學士拜同中書門下平章事加尚書左僕射兼門下侍郎封荆國公卒謚曰文崇寧間追封舒王有臨川集

蒙齋筆談荆公初生家人見有獾入其產室故小字獾郎

後山詩話辱直謂荆公之詩莫年方妙然格高而體下如似聞青秧底復作龜兆坼乃前人所未道又云扶輿度陽焰窈窕一川花雖前人亦未易道也然學三謝失於巧耳

石林詩話。蔡天啓言。荊公每稱老杜鉤簾宿鶯起。丸藥流鶯囀之句。以爲用意高峻。五字之模楷。他日公作詩。青山捫蟲坐。黃鳥挾書眠。自謂不減杜詩。以爲得意。然不能舉全篇。余頃嘗以語薛肇明。肇明時被旨編公集。徧求之。終莫之得。或云。公但得此一聯。未嘗成章也。

西清詩話。仁廟嘉祐中。開賞花釣魚宴。介甫以知制誥預末坐。帝出詩示羣臣。次第屬和。未至介甫。日將夕矣。亟欲奏御。得披香殿字。未有對。時鄭毅夫辭接席。顧介甫曰。宜對太液池。故其詩有云。披香殿上留朱輦。太液池邊送玉盃。翌日都下盛傳。王舍人竊柳詞。太液波翻。

披香簾卷介甫頤銜之

優古堂詩話。韓退之喜雪獻裴尚書詩云。喜深將策試。驚密仰簷窺。又云。氣嚴

當酒緩灑密聽窗。知荆公全用一聯云。借問火城將策試。何如雲屋聽窗知。

雞肋編。王介甫作韓魏公。挽詩云。木稼嘗因達官怕。山摧今見哲人萎。時華山崩。京師木冰極爲中的人。多不見木稼出處。按舊唐書五行志。開元二十九年十一月二十二日。雨木冰凝寒冽。而數日不解。寧王見而嘆曰。諺云。樹稼達官怕。必有大臣當之。其月王薨。

澠水燕談。王荊公之時。學者得出其門。自以爲榮。一被稱與。往往名重天下。公之治經。尤尙解字。末流務爲新奇。寢成穿鑿。朝廷患之。詔學者兼用舊傳注。不專治新經。禁援引字解。於是學者皆變所學。至有著書以詆公之學者。又諱稱公門人。故張芸叟爲挽詞曰。今日江湖從學者。人人謹道是門生。及後詔公配享神廟。贈官賜謚。俾學者復治新經。用字解。昔之學者。稍稍復稱公門人。有無名字。改芸叟卒章云。人人卻道是門生。

高齋詩話。荆公題金陵此君亭詩云。誰憐直節生來瘦。自許高才老更剛。賓客每對公稱頌此句。公輒顰蹙不樂。晚年與平甫坐亭上觀詩牌曰。少時作此題榜。一傳不可追改。大抵少年題詩可以爲戒。平甫曰。此揚子雲悔其少作也。

敖陶孫詩評。王荆公如鄧艾  
綽兵入蜀。要以險絕爲功。

團扇

玉斧修成寶月團。月中仍有女乘鸞。青冥風露非人世。鬢亂敍橫特地寒。

天府禁臙云。讀之令人一唱三歎。譬如朱弦疏越有遺音者也。

和女詩

青燈一點暝窗紗。好讀楞嚴莫憶家。能了諸緣如幻夢。世間唯有妙蓮花。

冷齋夜話。舒王女吳安持妻蓬萊縣君。工詩多佳句。有詩寄舒王。王以楞嚴經新釋付之。并和云云。

寒穴泉

神泉冽冰霜。高穴與雲平。空山渟千秋。不出嗚咽聲。山風吹更寒。山月相與清。北客不到此。如何洗煩醒。

墨莊漫錄。華亭有寒穴泉。與無錫惠山泉味相同。荆公嘗有詩云。

寄蔡氏女

建業東郭望城西堠千嶂承宇百泉遶畧青遙遙兮纏屬綠宛宛兮橫逗積李兮縞夜崇桃兮炫晝蘭馥兮衆植竹娟兮常茂柳蕪綿兮含姿松偃蹇兮獻秀鳥跂兮下上魚躍兮左右顧我兮適我有班兮伏獸感時物兮念汝遲歸兮攜幼

我營兮北渚有懷兮歸女石梁兮以苦蓋綠陰陰兮承宇仰有桂兮俯有蘭嗟女歸兮路豈難望超然之白雲臨清流而長嘆

朱文公楚詞後語云寄蔡氏女者王文公之所作也公以文章節行高一世而尤以道德經濟爲己任被遇神宗致位宰相世方仰其有爲庶幾復見二帝三王之盛而公乃汲汲以財利兵革爲先務引用凶邪排擯忠直躁迫強戾使天下之人囂然喪其樂生之心卒之羣姦嗣虐流毒四海至於崇寧之際而禍亂極矣公又以女妻蔡下此其所予之詞也然其言平淡簡遠翛然有出塵之趣視其平生行事心術略無毫髮肖似此夫子所以有予予改是之歎也歟

絕句

穰侯老擅關中事嘗恐諸侯客子來我亦暮年專一壑每聞車馬便驚猜

侯鷗錄元豐末有以王介甫罷相歸金陵後資用不足達裕陵睿聽者上卽遣使以黃金二百兩就賜之介甫初喜意召已既知賜金不悅卽不受舉送蔣山修寺爲朝廷祈福此詩未能忘情在丘壑者也

與外弟飲

一自君家把酒杯六年波浪與塵埃不知烏石岡頭路到老相尋得幾回

冷齋夜話山谷言詩意無窮而人才有限以有限之才追無窮之意雖淵明少陵不得工不易其意而造其語謂之換骨法規摹其意形容之謂之奪胎法如顧況詩曰一別二十年人堪幾回別其詞簡緩而意精確荆公與故人詩云云所謂奪胎法也

賞心亭

霸氣消磨不復存舊朝臺殿只空村孤城倚薄青天近細草侵尋白日昏稍覺野雲成晚霽却疑山月是朝暾此時江海無窮興醒客無言醉客喧

自金陵至丹陽道中有感

數百年來王氣消難將往事問漁樵苑方秦地皆蕪沒山借揚州更寂寥荒埭暗雞催月曉空場老雉挾春驕豪華只有諸陵在往往黃金出市朝

藝苑雌黃予與鄉人翁行可同舟泝汴因談及詩行可云介甫善下字如空場老雉挾春驕下得挾字最好卽孟子挾長挾貴之挾予謂介甫又有紫覓凌風怯蒼苔挾雨驕後山有寒氣挾霜侵敗絮賓鴻將子度微明其用挾字亦與前一聯同末言陵墓遭發金玉出於人間矣

初夏絕句

石梁茅屋有灣磈流水濺濺度兩陂晴日煖風生麥氣綠陰幽草勝花時

娛書堂詩話范石湖云嘗蒙恩獨引觴詠壽皇與行苑中親誦後句以爲佳

試院中作

少年操筆坐中庭。子墨文章頗自輕。聖世選才終用賦。白頭來此試諸生。

詳定官作

童子常誇作賦工。暮年羞悔有揚雄。當年賜帛倡優等。今日論才將相中。細甚客卿因筆墨。卑於爾雅注魚蟲。漢家故事真當改。新詠知君勝弱翁。

韻語陽秋。荆公以詩賦決科。而深不樂詩賦。試院中五絕。其一云云。後作詳定官復有詩云云。熙寧四年預政遂罷詩賦。專以經義取士。蓋平日之志也。

歲晚

月暝林塘靜。風涵笑語涼。俯窺憐淨滌。小立佇幽香。攜幼尋新菂。扶衰上野航。延緣久未已。歲晚惜流光。

漫叟詩話。荆公定林後詩精深華妙。非少作。之比。嘗作歲晚詩。自此謝靈運識者以爲然。

示公佐

殘生傷性老耽書。年少東來復起予。各據槁梧同不寐。偶然聞雨落階除。壬辰寒食

客思似楊柳。春風千萬條。更傾寒食淚。欲漲冶城潮。巾髮雪爭出。鏡顏朱早凋。未知軒冕樂。但欲老漁樵。

自白土村入北寺

雨過百泉出秋聲連衆山獨尋飛鳥外時度亂流間坐石偶成歇看雲相與還會須營一晦長此聽潺潺。

泊船瓜洲

京口瓜洲一水閒鍾山祇隔數重山春風又綠江南岸明月何時照我還。

容齋續筆吳中士人家藏其草初云又到江南岸圈去到字注曰不好改爲過復圈去而改爲入旋改爲滿凡如是十許字始定爲綠

送和甫寄女子

荒煙涼雨助人悲淚染衣襟不自知除卻春風沙際綠一如送汝過江時以上臨川集

釋普聞詩論拂去豪逸之氣屏蕩老健之節其意韻幽遠清癯雅麗爲得也

寄池州夏太初

一水衣巾剪翠綃九華環珮刻青瑤生才故有山川氣卜築兼無市井翻三葉素風門閥在十年塵跡履綦銷歸榮早晚重攜手莫負幽人久見招

能改齋漫錄王荊公有唐律一首寄池州夏太初今集不載序云不到太初郎中兄所居遂已十年以詩攀寄

絕句

白馬津頭驛路邊陰森喬木帶漪漣斜陽一馬恩恩過夢寐如今十五年

能改齋漫錄·荆公題一  
絕于夏畋扇·今集不載·

柳瑾

瑾字子玉·慶歷二年進士。

句

過盡金湯知帝策·見求貂虎識軍儀·男兒本有四方志·祇在蓬瀛自不知·王荊文公詩·自注·

陳洙

洙字師道·建陽人·慶歷二年進士·歷殿中侍御史·嘉祐中·上疏助司馬光論建儲·且飲藥而卒·以明無所覬望·奏下大計·遂定仁宗·聞洙死·賜錢百萬元·祐初用光言官其一子·

吳耿先生還北山舊居

蒼浪兩鬢斑·盡意六經閒·有術佐明主·無官歸故山·釣臺春水碧·吟榭暮雲閑·見說還家後·重將舊史刪·  
前賢小集拾遺·

遊雲際寺·在邵武軍光澤縣

清曉捫蘿踏嶺雲·寒風飛溜溼衣巾·上攀霄漢無多地·直衣城闕幾點塵·古木半陰藏宿霧·山禽相語厭遊人·明年更補閩中吏·來看桃花爛漫春·瀛奎律髓

靖安寺五代時建寧詩人江爲故宅

處士亡來二百年，故居牢落變祇園。  
詩名長共江山在，冤氣尙磨星斗昏。  
臺榭幾人留好句，漁樵何處問曾孫。  
昔時泉石生涯地，日暮寒雲遶寺門。建寧府志

毛維瞻

維瞻，開封人居三衢。慶歷二年進士，累遷參知政事。

筠州山房

樓上青山繞四陲，畫樓百步引朱扉。  
落成當與公同上，一看長江白練飛。江西通志

王珪

珪，字禹玉，華陽人。徙舒琪之從弟。慶歷二年進士。官翰林學士、知開封府、兼侍讀學士。神宗朝拜尚書左僕射，門下侍郎。哲宗卽位，封岐國公。卒贈太師。謚曰文。有華陽集。

王文正公日錄：神廟時，每夕有赤氣見西北隅，如火，至人定後乃滅。人以爲皇子生之祥。故禹玉作大燕樂詞云：未曉清風生殿閣，經旬赤氣照乾坤。未幾皇子生，大燕羣臣于集英殿。

文潞公丞相出鎮西京奉詔於瓊林苑燕餞，從列皆賦詩送行。

都門秋色滿旌旗，祖帳容陪醉御卮。  
功業特高嘉祐末，精神如破貝州時。  
匣中寶劍騰霜锷，海上仙桃壓露枝。  
昨日更聞褒詔下，別刊名姓入周彝。墨莊漫錄

東臯筆錄：嘉祐中文潞公彥博，富鄭公弼爲相。劉沆、王堯臣爲參政。始議立皇嗣，而事祕不傳。雖英宗亦莫知也。元豐中，王公之子同光上書言先帝之立，乃先臣在政府始議也。其始終事並藏臣家，乃宣取上驚歎久之。是時富、劉、王三公皆已薨，獨潞

公留守西京，遲召至，關慰藉，恩禮隆厚。冊拜太尉，及還西都，上作詩送行，有報在不言功之句。兩府並出餞，皆有詩。王禹玉詩云：功業特高嘉祐末，精神如破貝州時。蓋謂是也。

### 上元應制

雪消華月滿仙臺。萬燭當樓寶扇開。雙鳳雲中扶輦下。六鼇海上駕山來。鎬京春酒霑周燕。汾水秋風陋漢才。一曲昇平人共樂。君王又進紫霞杯。

韻語陽秋。元豐中，令從臣和元夕觀燈詩。蔡持正密叩王公云：應制上元詩如何使事。禹玉曰：鼇山鳳輦外，不可使章子厚面笑之。十七日登對，神宗獨賞禹玉詩，妙於使事。

### 史院席上和首相吳公原韻

曉下金門路。君筵聽召餘簪纓。三壽客筆削兩朝書。身老雖逢此。恩深盡醉歟。傳聞訪餘事。應走使臣車。  
揮麈後錄

### 在翰苑作

晨光未動曉驂催。又向壇頭飲社杯。自笑治聲終不是。明年強健更重來。  
姁真子錄

### 和梅公儀琴高魚

三月江南花亂開。青溪曲曲水如苔。琴高一去無蹤迹。枉是漁人尙見猜。  
賓退錄

### 溫成皇后閣立春帖子曰鑒按曲洧舊聞作歐公詩

昔聞海上有仙山。煙鎖樓臺日月閑。花下玉容長不老。只應春色勝人間。

隱居詩話溫成皇后初薨會立春進帖子是時歐陽修王珪同在翰苑以其虛閣故不進俄有旨令進王珪遽口占一首歐公歎其美麗

端午帖子

紫閣曈曨隱曉霞，瑤墀九御薦菖華。  
何人又進江心鑑，試與君王卻衆邪。容齋五筆。

夫人閣端午帖子

後苑尋青趁午前，歸來競鬪玉闌邊。  
袖中獨有香芸草，留與君王辟蠹編。後村詩話。

挽老蘇先生

岷峨地僻少人行，一日西來譽滿京。  
白首只知聞道勝，青衫不及到家榮。  
元猿夜哭銘旌過，紫燕朝飛挽鐸迎。  
天祿校書多分薄，子雲那得葬鄉城。蘇集附錄

大饗明堂慶成

皇祐更秋律，明堂奉帝禋。  
粢盛雖薦德，霜露本懷親。  
於赫朝三后，無文秩百神。  
九筵交玉幣，重屋近星辰。  
邃幄留廳御，清壇墮月津。  
衣冠漢儀舊，金石舜韶新。  
受祚開宣室，鳴鐘降紫宸。  
羣陰光復旦，叶氣斗回春。  
靈貺叢千祝，豐恩滲四垠。  
慙非老辭筆，徒學煥堯文。

瀛奎律髓禹玉爲詞臣則摛藻細潤典雅勁健未有後來全句長句之病時號爲至寶丹以多用金玉珠璣錦繡之類然亦有不全然者此詩豈不謂之細潤典雅

再登賞心亭

六朝遺迹此空存。城壓滄波到海門。萬里江山來醉眼。九秋天地入吟魂。於今玉樹悲歌起。當日黃旗王氣昏。人事不同風物在。悵然猶得對芳樽。

宮詞

花裏宮鶯曉未啼。千牛仗下報班齊。銀袍五百趨龍尾。天子臨軒賜御題。  
侍輦歸來步玉階。試穿金縷鳳頭鞶。堦前摘得宜男草。笑插黃金十二釵。  
內苑宮人學打毬。青絲飛控紫驃騮。朝朝結束防宣喚。一樣真珠絡鬢頭。  
黃昏鎖院聽宣除。翰長平明趁起居。撰就白麻先進草。金泥降出內中書。  
紗幔薄垂金麥穗。簾鉤纖挂玉葱條。樓西別起長春殿。香壁紅泥透蜀椒。  
內人稀見水鞦韆。爭擘珠簾帳殿前。第一錦標誰奪得。右軍輸卻小龍船。  
盤龍新織翠雲裘。簡點黃封玉匣收。防備秋來供御著。金箱捧入曝衣樓。  
盡日閑窗賭選仙。小娃爭覓倒盆錢。上籌爭占蓬萊島。一擲乘鸞出洞天。十家宮詞。

呈永叔書事嘉祐二年禮部倡和

誥書初捧下西箱。重棘連催暮鑰忙。綠繡珥貂留帝詔。元注元夕有綠衣中使傳宣。  
雨收聲急筆似飛泉。落勢長十五年前出門下。最榮今日預東堂。

紫衣鋪案拜宸香。卷如驛

歐陽修歸田錄。嘉祐二年余與端明韓子華翰長王禹玉侍郎范景仁龍圖梅公儀同知禮部貢舉辟梅聖俞爲小試官。凡鎮院五十日六人者相與倡和爲古律歌詩一百七十餘篇爲三卷禹玉余爲校理時武成王廟所解進士也至此新入翰林與

余同院又同知貢舉故禹玉贈余云十五年前出門下最榮今日預東堂余答云旨時叨入武成宮曾看揮毫氣吐虹夢寐閑思十年事笑談今日一尊同喜君新賜黃金帶顧我今爲白髮翁

依韻恭和聖製龍圖天章閣觀三聖御書

半夜傳君召西清閱帝文筆迴丹穴鳳歌起沛鄉雲御幄金虯轉仙墀羽仗分君王自天縱況復睿心勤  
以上曹氏歷代詩選

句

披褐曾陳定羌策汗青猶著立儲書春風澤國吟箋落夜雨溪堂宴豆疎

許彥周詩話外祖父邵安簡公布衣時上平元吳策又嘗勸仁廟早立太子晚年

自樞府出知越州又移鄆州其薨也岐公作挽詞云云不獨語句精練且是著題

金縷黃龍扇蘭芽翠釜湯夫人閣端午帖子繞臂雙條達紅紗畫夢驚同上震邸陪經席辰階總化鈞晏元獻挽詩未染仙人杏先柔帝女桑皇后閣帖子靈宮千福墮清廟一誠專南郊舊蠶繙書檣羣訛正銳鈴校理東觀曉日破紅浮鬪栱夕雲凝紫護周垣祠太乙宮官職聲名君自有何妨更絕郢中吟和石昌言雪灼灼海棠誰復折差差燕子又還飛以上海錄碎事

舞急錦腰迎十八酒酣玉瑣照東西

墨莊漫錄樂府六么曲有花十八古有玉東西杯對甚新

石象之

象之，字簡夫。新昌人。慶歷二年進士官太常丞。

詠愁

來何容易去何遲。半在心頭半在眉。門掩落花春去後。窗涵殘月酒醒時。柔如萬頃連天草。亂似千尋市  
地絲。除却五侯歌舞地。人間何處不相隨。新昌縣志

石聲之

聲之、新昌人。

遊南明山

祇應尋勝到林泉。四抱危峰萬朵蓮。僧過不知山隱寺。客來方見洞開天。浮圖照水光相映。古木依崖影  
倒懸。風露了非人世界。濯纓秋後玉壺仙。越咏

黃

庶向宗道

庶、字亞夫。分寧人。慶歷二年進士。歷州郡從事。攝康州。有伐檀集。山谷其子也。

宿趙屯

蘆花一股水。弭棹日已暮。山間聞雞犬。無人見煙樹。行逐羊豕跡。始識入市路。菱芡與魚蟹。居人足來去。  
漁家無鄉縣。湖船載稚乳。鞭笞公私急。醉眠聽秋雨。

怪石

山鬼水怪著薜荔。天祿辟邪眠莓苔。鉤簾坐對心語口。曾見漢唐池館來。

班石枕聯句同向宗道

斷得西山骨磨礪露斑駁凝結一何怪。宗道形模萬難學直疑彩雲根。庶又訝紫珉礎中瘦敲蛟腹。宗道外文灼龜殼冷剖清泉肝。庶穗楮老鼈腳堅方君子性。宗道清純聖人璞有氣當補天。庶無瑕應並鑿定瀆盤古苔。宗道想漏神農藥堪作夢寐寶。庶尤是炎蒸託眠月病頭愈。宗道橫風醒肺灌珊瑚侈可唾。庶陶甄胞堪撲夜深魘鬼驚。宗道晝冷詩魔愕首愴無俗夢。庶心清去煩惡斬蠶方敢友。宗道蜀筠良可櫻何必檄愈風。庶何必文驅瘞質任兒女嗤。宗道頑宜童僕謔枕流固迂誕。庶藉糟徒落魄潤生審將雨。宗道輝發疑有珏觸體莊生狂。庶虎魄宋武薄欲鑄中郎銘文章體猶弱欲祕淮南書神仙志非樂。宗道我疑混沌鑛誰與翦竅鑿可作甘寢輿華胥詣冥冥。庶子道足施爲我拙困嬰縛已謀具巾屨行當老嵩霍子其乞我歸終焉臥雲壑。宗道嗜好我已癖須求子惟憇。旣舊王固惜瓢陋顏不博異時一經子便當千金橐客退獨摩拂臥送山月落。庶以上伐檀集

韓欽聖

欽聖慶歷二年進士

句

迎鋒畫幡轉交鍛采文繁。省試勳門賜載古今詩話。

句龍緯

緯蜀人慶歷進士太學博士。

題惠泉寄知軍郎中

在荊門

崎嶇荆門山。叢起爲東阨。陽岡盤氣勢。陰竇融液脈。源濯雲根移。流噴石罅拆。呀呀兩岸間。平澗纔數席。  
環岸貯清泚。古鏡照秋色。恬風不生紋。至底無隱物。澄輝泛嵐翠。淨影浴天碧。潛花深回回。蔭樹高峯峯。  
清光照毛髮。爽氣灑肌骨。如入冰壺中。亭宇何鮮飾。併罌日往來。舉汲易爲力。短绠何勞人。輕舠恰容客。  
當時竟陵翁。老死卻不歷。品第十九泉。遺此良可惜。此泉惠此土。唯日流不息。作詩頌惠泉。勉哉君子德。  
荊州府志

賈宗諒

宗諒官內園洛苑如京崇儀使。

上元日駕幸太乙宮燒香

金鑾晨動暖風微。比屋歡呼望帝暉。天喜宴開新福館。雲深香滿侍臣衣。九韶鳳舞當雙闕。萬燭龍趨讓六飛。爲與吾民同樂事。月輪猶未下端闈。古今歲時雜詠



# 宋詩紀事卷十六

錢唐 厲 鶻 緝

祁門 馬曰璐 同緝

蘇

宋

宋字公佐磁州滏陽人舉進士神宗朝累官給事中知河南府

和趙閱道游海雲山

笙歌揭虛閣帷幕布春池且與民同樂都忘天一涯舊遊嗟倏忽故步喜追隨陌上人如堵歸鞍莫載馳

成都文類

呂夏卿

夏卿字縉叔晉江人慶歷二年進士調江寧尉用薦爲編修唐書官書成遷直祕閣同知禮院熙寧初遷兵部員外郎知制誥出知潁州卒

泉州府志初歐宋二公典領唐史十七年書始成凡預裁筆者皆一時高選前後十餘人遷徙不常唯夏卿與范鎮自發凡訖于絕筆夏卿又纂新書紀志傳義例摘二公繁文闕誤目爲唐書直筆新例一卷唐兵志三卷又集天下碑刻爲唐文獻考歷

代氏族譜志爲

古今世系表

春陰

海棠陰淺日黃昏。畫閣輕寒繡被溫。春夢醒來能記否。賣花聲過忽開門。後村千家詩

陳襄

襄字述古。候官人。慶歷二年進士。歷官知制誥。直學士院。知陳州。徙杭州。以樞密直學士。知通進銀臺司。兼侍讀判尚書都省。卒贈給事中。有古靈集。

送關都官致仕

鴻雁于飛。送關公也。公能以禮致仕。惜其有老成德。不衰不養于朝。天子不用古禮畱之。故作是詩也。鴻雁于飛。歸戾于澤。君子于田。亦適維則。旅力不愆。曷云其極。庶民之羣職。自爲愚。君子之羣。其德有濡。旅力不愆。曷云其劬。有堅松柏。君子斧之。有實稷穀。農夫有之。天子有老。曷其與。歸野有白駒。來食我麌。君子之往。胡爲不留。我心悠悠。爲天子之憂。

幽齋

幽境絕塵蹤。莓苔上粉塘。秋聲連夜雨。寒色一溪松。學有書千卷。歡無酒萬鍾。雲屏孤夢斷。寂寞掩巫峯。

和子瞻沿牒京口憶西湖出遊見寄

春陰漠漠燕飛飛。可惜春風與子違。半嶺烟霞紅旆入。滿湖風月畫船歸。綠笙一闋人何在。遼鶴重來事已非。猶憶去年離別處。烏啼花落客霑衣。

寄遠

飛鵠翩翩暮欲棲楚天新月射璇題袖中已減三年字心曲惟通一點犀步障影迷金谷路桃花香隔武陵溪瑤華好折無人寄腸斷江樓百尺梯

夜意

熏爐香燼蕙烟沈凜冽寒生翡翠衾月國音塵千里絕仙山樓閣五雲深離懷暗耿金壺漏獨夢多驚玉女砧騎省中郎才調逸擬將文筆賦秋心

使還咸熙館道中作

土曠人稀使驛賒山中殊不類中華白沙有路鴛鴦泊芳草無情妯娌花氈館夜燈眠漢節石梁秋吹動胡笳歸來覽照看顏色斗覺霜毛兩鬢加

韋羌山在天台山西上有石壁字如科斗

去年曾覽韋羌圖云有仙人古篆書千尺石巖無路到不知科斗是何書

中和堂木芙蓉盛開戲贈子瞻

千林寒葉正疎黃占得珍叢第一芳容易便開三百朵此心應不畏秋霜

題寶嚴院垂雲亭在杭州七寶山

小亭嶮絕出雲閒萬象升沈不得閑莫怪詩翁頭白早時來向此寫湖山以上古靈先生集

連

庠

庠字元禮應山人慶歷二年進士爲宜城令至都官郎中

宋史隱逸傳連庶字君錫舉進士監陳州稅罷歸始與弟庠在鄉里時宋郊兄弟皆依之及二宋貴達不可其志退居二十年守道好修非其義秋毫不可污也庠亦登科敏于政事號良吏終都官郎中

襄州守王侯洙復峴山羊公祠

大江西來遶重城猶如叢花疋練繁左山右阜若開避曾是峴首當頭橫江湍衝山山不動滔滔雪浪東南傾隕然巨勢壓漢境萬楚不得專雄名四時美景千百狀登臨可以攄襟靈近麓接藍秋水綠幽巖團纈春葩明寒林蕭疎四面合夏木延袤長川青危巔碑墊龜螭蟄陰崖檜老蛟龍形俯瞰洲崿相向背風恬江面羅紋生漁舠數百集其下營然來往一葉輕波底崕嶧沈翠影槎頭鳬雁斂霜翎天然佳致信可尚直是丹青寫不成叔子當年樂山水每來置酒空壘罌賢達勝士共愛此謂此風景魁南荆荆人被化思不已立祠山椒共牲爾來綿亘幾千載瓦飛棟撓誰經營守臣罕肯著脚到遂至完固屬兼并非憚鳩工繕完葺誠知仁政難繼聲帝眷襄陽曰重鎮宜從館閣擇名卿明公之來百城悅壺漿竹馬相歡迎政成公休屢登覽山前車騎長晶熒僚空寓目看不足詩豪佚發輸精誠乃敕寮屬復祠宇仍從嶺上新虛亭歲時遊憩備言詠荆人愛之猶鉅平羊公之化異時一致當同評兩賢繼美何以況山之永兮水之清襄陽府志

李觀

觀字夢符自號玉谿叟袁州人慶歷二年試南宮賦偶落韻有司愛其策爲取特旨由是登第以著作佐郎知臨江軍清江縣嘗爲太學官出判處州

宜春傳信錄，朝議大夫李觀夢符史傳諸書，過目成誦。文章如元次山登第，歷官知處州，不就，請監南嶽廟以歸。建玉溪洞，中有抱一堂水仙亭，有梅所曰香雪塢，有衆花處曰錦繡塢，貯書史處曰文藪。終日醉吟溪上，於世味淡如也。

### 題處州直廳壁

十謁朱門九不開，利名淵藪且徘徊。  
自知不是公侯骨，夜夜江山入夢來。  
能改齋漫錄

許

當

當字當時慶歷初爲古田令。

### 桃溪

桃溪一何清，想像武陵水。  
所愛春風時，灼灼花數里。  
漁艇日來去，無人識歸止。  
安知歷幽源，不遇神仙子。  
福州府志

### 石蒼舒

蒼舒，字才叔，雍人。善行草，官承事郎，通判保安庫。

### 別韓魏公

□□□□□□簾前二聖擁千官，唯有埽門霜鬢客。  
卻隨社燕入長安。

過庭錄：石蒼舒與韓魏公有舊，韓拜相，石至干祿，畱數月無成。石作詩以別歸，韓覽之惻然，遂注一官而去。

### 胡恢

恢金陵人華州推官。

句

建業江山千里遠。長安風雪一家寒。

夢溪筆談金陵胡恢善篆隸坐法失官困于京師上韓魏公詩魏公深憐之令篆太學石經得復官任華州推官而卒

姚嗣宗

嗣宗關中人韓魏公薦試大理評事。

續湘山野錄嗣宗關中詩豪忽繩檢坦然自任杜祁公帥長安多裁品人物謂尹師魯曰姚生如何人尹曰嗣宗者使白衣入翰林亦不忝減死一等黜流海島亦不屈姚聞之大喜曰所謂善評我者也

書驛壁

南越干戈未息肩五原金鼓又轟天崆峒山叟笑無語飽聽松風春晝眠。

續湘山野錄元昊以河西叛朝廷方羈籠關中豪傑之際嗣宗因題詩二於壁其五言有踢碎賀蘭石埽清西海塵布衣能效死可惜作窮鱗之句韓忠獻公奇之奏稱職官既而一庸生張某亦堂堂人蝟鬚黑面頂青巾縉裘持一詩代刺搖袖以謁杜公有長安有客面如鐵爲報君王早築臺之句杜祁公亦異之奏補乾祐一尉而胸中無一物未幾以臧去任

俞汝尙

汝尙字仁廓號退翁又號溪堂居士歸安人慶歷二年進士王安石當國欲寘汝尙御史驛召詣京力辭得免從趙抃於青州以屯田郎中致仕卒

贈張伯玉倅古睦

新定烟霞外溪山清可依夜風泉溜響春雨藥苗肥野鶴眠花圃晴嵐溼案衣預知公暇日垂釣子陵磯

詩林萬選

題三角亭

奇哉山中人構此亭上宇蕙徑斜映帶林烟盡吞吐春無四面花夜欠一簷雨寄傲足有餘何須存廣廡

前賢小集拾遺

久客

久客西城裏人家似舊鄰衆知趨事嬾僧厭打門頻倦枕費窗燭閑書破硯塵陰晴消白日門巷忽青春

瀛奎律髓

賈黯

黯字直孺南陽人慶歷六年進士第一嘉祐中累擢翰林學士英宗朝遷給事中權御史中丞以疾乞郡除翰林侍讀學士知陳州卒贈禮部侍郎

襄州守王侯洙復峴山羊公祠

古郡襄水陽羣山繞鄂郭其閒峴首者羊公最所樂登臨見洲渚氣象真磅礴公乎旣已沒高碑此鑄鑿

廟食有遺像。當時盛丹牘。到今僅千載。碑廟皆頽落。喬木荒榛閒。廟址存依約。碑倒石屢易。文字免缺錯。我侯至之初。亭廟皆新作。爲詩道其意。風化思所託。侯慕羊公心。仁政及物博。將見襄陽治。與古相侔若。

襄陽府志

季康伯

襄州太守王侯洙復峴山羊公祠

賢哉西晉鉅平侯。刻碑立祠在荊州。州民萬家見之者。揜面汎瀾雙淚流。逮今繇歷幾百祀。峴首巍然臨漢水。碑鈕廢祠榛莽中。蕭蕭只有悲風起。內閣深沈侍從臣。赤帷阜蓋來行春。殷勤拂碑復祠貌。一朝舊迹重如新。山光葱蒨水清冽。天長地久無時別。古人今人空茫茫。惟是功名不能滅。

襄陽府志

張去惑

襄州太守王侯洙復峴山羊公祠

漢江千里清溶溶。惟此南夏奠其中。因山爲城峙險固。一國形勝何高雄。巍然巨首名曰峴。回壓面勢尊且崇。東扼迅流疑引翼。西峙羣阜如盤龍。嶽巒峻拔不可擬。絕岸萬丈凌長空。下闢澄潭迴無際。旁睨比屋幾可封。天意造物豈虛設。控蠻鎮楚舒隆隆。自昔登憩且非一。此山振動惟羊公。有志平吳運祕略。竭心衛晉推元功。綏懷遠邇人所服。開翠田疇時以豐。慨然置酒適清曠。中郎幕府賢而通。語公令望高四海。當與斯山永無窮。自是綿綿歲歷久。閱碑墮淚存遺蹤。亭祠浸壞詎可究。山歸民籍木以童。前知興衰故。有目覽者歎息追無從。龍圖王公守茲土。修舉廢墜詰初終。感物思人但長息。刻章疾置聞四聰。聖宸

動色可其請茲山復興氣象融耽耽大廈揭亭宇肅肅真像嚴祠宮遂使靈光享血食禁樵復祀資恪恭大抵有功及民物盛德期與天地充今之視古皆一致休哉千載懷清風襄陽府志

王介

介字中父衢州人以制舉登第性聰悟絕人所嘗讀書皆成誦而任氣多忤物以故不達終于館職

送張君宰吳江

乍被軒綏寵新辭計省繁三江吳故國百里漢郎官烟水蓴芽紫霜天橘顆丹優游民政外風月卽清歡

明道雜志

句

命也豈終否時乎不暫留勉哉藏素業以待歲之秋贈人下第

明道雜志中父作詩多用助語作句

如贈人落第詩云云此格古未有也

草廬三顧動幽蟄蕙帳一空生曉寒

石林詩話中甫與王荊公游甚款未嘗降意相下熙寧初荊公以翰林學士被召前此屢召不起至是始受命介以詩寄公云云蓋有所諷公得之大笑他日作詩有丈夫出處非無意猿鶴從來自不知之句蓋爲介發也

劉敞

敵，字原父，臨江新喻人。慶歷六年進士第二，累遷知制誥，拜翰林學士，改集賢院學士，判南京御史臺卒門人私謚曰公是先生，有集。

郡齋讀書志：原父出知永興，惑官妓，得驚眩疾，力求便郡。仁宗謂執政曰：如敵者豈易得耶？賜以新橙五十。

劉跋暇日記：劉原父晚年病，不復識字，日月兒女皆不能認。人言永興中多發冢墓求古物致此。

瓊花并序

自淮南遷東平，移后土廟瓊花植于濯纓亭。此花天下只一株耳。永叔爲揚州，作無雙亭以賞之。彼土人別號八仙花，或云李衛公所賦玉藥，即此種。

淮海無雙玉藥花，異時來自八仙家。魯人未覩天中樹，乞與春風賞物華。

鐵漿館并序

稍出盧龍塞，回看萬壑青。曠原開磧口，別道入松亭。此館以南屬奚山，溪深險，以北屬契丹，稍平衍，漸近磧矣。別一道，自松亭闢入幽州，甚徑易處。常祕不欲漢使知。虜馬寒隨草，奚車夕戴星。忽悲田子泰，寂寥向千齡。奚人以車帳爲生，晝夜移徙。

檀州正月二日。

窮谷迴看盡，孤城平望遙。自古北口山至此都盡。市聲衝日集，此州衙日市集。海蓋午時消，每旦海氣如霧，至晚消盡。土

人謂之海蓋。冠帶才通漢，山川更入遼。春風解冰雪，最覺馬蹄驕。

### 春草

春草綿綿不可名，水邊原上亂抽莖。似嫌車馬繁華處，纔入城門便不生。

飲子華家醉翁不來令，藥仙彈醉思仙。

翠眉紅袖拜尊前，撩亂春聲入四弦。坐少車公還不樂，爲君重奏醉思仙。以上公是先生集

李士衡硯劉涇州所得

李侯寶硯劉侯得，上有刺史李元刻。云是天寶八年冬，端州東溪靈卵石。我語二客此不然，天寶稱載不稱年。刺史爲守州爲郡，此獨云爾奚所傳？兩君盧胡爲絕倒，嗟爾於人幾何寶。萬事售僞必眩真，此固區區無足道。硯箋

### 觀永叔五代史

大意晚有屬，先生拔書橐。是非原正始，簡古斥辭費。褒善傷獲麟，疾邪記有蜚。處心必至公，撥亂豈多諱。何必藏名山，端如避羅罝。合璧事類後集

### 聞鶯

醉裏春空盡，江邊客未歸。可憐鳴睍睍，似欲訴芳菲。珍樹移時語，殘花入眼稀。離居亦幽獨，求友莫相違。

鴨脚鴨按：此首又見梅堯臣集。

魏帝昧遠圖，於吳求鴨腳。乃爲吳人料，重玩志已懨。江南有佳木，修聳入天插。葉如闌邊跡，子剝杏中甲。

持之奉漢宮，百果不相壓。

養雞

茅茨一畝宮。生理備委曲。雞豚自古昔。豢養隨世俗。鑿垣安其棲。幼長何碌碌。旦出四散飛。暮還相投宿。頗哀鴻鵠輩。飲啄不充腹。何事萬里遊。羈旅傷局促。衣冠相嫵媚。庭廡更追逐。未悟糞土非。豈知稻粱辱。物理常有此。人情苦不足。安見避世翁。頽然臥空谷。以上合璧事類別集

贈李才元

待詔先生窮巷居。簞瓢屢空方晏如。自探井臼秣羸馬。卻整衣冠迎賜書。王人駐車久歎息。天子聞之動顏色。飽死曾不及侏儒。牧民會肯舒筋力。詔書朝出蓬萊宮。繡衣還鄉由上衷。君今已作二千石。亦將復爲第五公。

徐度却埽編。李才元大臨。仕仁宗朝爲館職。家貧甚。僮僕不具。多躬執賤役。一日自秣馬會例賜御書。使者及門適見之。歎息而去。歸以白上。上大驚異。遂命知廣安軍。熙寧中知制誥。坐封還。李定除御史。詞頭與宋次道蘇子容俱得罪。于是名重桃花。

小樓西望那人家。出屋香梢幾樹花。只恐東風能作惡。亂紅如雨墮窗紗。全芳備祖。

夏夜

涼風響高樹。清露墜明河。雖復夏夜短。已覺秋氣多。豔膚麗華燭。皓齒揚清歌。臨觴不作意。柰此粲者何。

避暑錄話。此詩當是在長安時作。

雜詩效玉川體

毀巢鳳不至，竭澤龍不游。賢者有所歸，得非龍鳳儕。周公下白屋，聖德被九州。趙禹謝賓客，漢朝以爲優。澆淳不相襲，用舍何其繆。苟徇一身利，不爲萬姓謀。哀彼杕杜詩，死生遺道周。宋藝圃集

劉攽

攽字貢父，與兄敞同舉慶歷六年進士。歷祕書少監，出知蔡州。召拜中書舍人，卒。弟子私謚曰公非先生有集。

上書行

仕不至二千石，賈不至五百萬。此事夸者憂，而非志士歎。君不見下邳受書起，幄中運籌制千里。功成不受二萬戶，拂衣歸從赤松子。君不見計倪半策誅強吳，鴟夷扁舟泛五湖。三致千金不自擅，至今籍籍宗陶朱。大賢富貴不爲已，心事邈與常人殊。逢時致身如反手，雲蒸龍變無時無。君勿愛上書獻賦稱賢豪，刺繡倚市相矜高。丈夫昔曾笑徒勞，商賈旦旦稱錐刀。

自校書郎出倅秦州作

璧門金闕倚天開，五見宮花落井槐。明日扁舟滄海去，卻將雲氣望蓬萊。

長蘆寺

越舶吳商倚萬橈，紺園金刹起中宵。魚龍聽法多因雨，江海歸心每上潮。林黑夜深燈影白，川平天闊梵聲遙。心知水怪俱調伏，惜取靈犀不用燒。

送裴二知蘇州

著書元尚白，送客鬼揶揄。  
積水望江海，秋風吹舳艤。  
貴人千騎長紫綬，左魚符道愛明南國。  
歡聲接舊吳，曉霜繁橘柚。  
過雨熟菰蒲，安得如吾子。  
從君飛赤鳧。

賦歐公廳前兩白鶴

明公真愛鶴，愛鶴選仙骨。  
遂令千里姿，爲君軒墀物。  
啄腥豈復辭，雞羣鎔翼欲比鳧。  
驚馴聆音發，舞似矜客避寒孤。  
警將依人歐公云，此禽畏寒每舍屋中。  
吾聞芝田逸翮不如此，世上悠悠誰識真。

詠史

自古邊功緣底事，多因嬖倖欲封侯。  
不如直與黃金印，惜取沙場萬髑髏。

齊東野語 貢父此詩蓋

指當時王韶李憲輩耳。

絕句

青苔滿地初晴後，綠樹無人晝夢餘。  
惟有南風舊相識，徑開門戶又翻書。

以上公非先生集

別茶嬌

畫堂銀燭徹宵明，白玉佳人唱渭城。  
唱盡一杯須起舞，關河風月不勝情。

過庭錄：長安妓有茶嬌者，以色慧稱。貢父惑之，被召造朝。茶嬌遠送，貢父作詩別之。至  
期，永叔去城四十五里迓。貢父適病酒未起，永叔曰：「非獨酒能病人，茶亦能病人矣。」

襄州淳于髡墓

微言動相國，大笑絕冠纓。流轉有餘智，滑稽全姓名。師儒空稷下，衡蓋盡南荆。贅婿不爲辱，旅墳知客卿。

石林詩話。貢父天資滑稽，遇可諱者，雖公卿不避。與王荊公素厚，荊公當國，亦屢譴之。雖每爲絶倒，然意終不能平也。元祐初，知襄州，淳于墓在焉。題詩云：蓋以自解也。

寄韓玉汝

嫖姚不復顧家爲誰謂東山久不歸。卷耳幸容攜婉變，皇華何處有光輝。

石林詩話。元豐初，虔人來議地界，韓丞相玉汝出分畫，將行，與愛妾劉氏劇飲通夕，且作詞畱別。翌日忽中批步軍司遣兵爲搬家追送之，初莫測所由。久之，方知自樂府發也。貢父玉汝姻黨，即作小詩寄之，以戲云：

黛隗石硯

一片蒼山石，遙憐巧匠心。能存辟雍法，宛是馬蹄金。氣奪秋雲溼，光涵墨海深。魚龍隨醉筆，變化出幽深。

硯箋

句

瀉湯奪得茶三昧，覓句還窺詩一斑。

優古堂詩話。錢唐南屏謙師妙于茶事，東坡贈之詩云：道人曉出南屏山，來試點茶三昧手。劉貢父亦贈詩云：

裴煜

煜字如晦。慶歷六年省元。治平中以開封府提刑知蘇州。入判三司都磨勘司。

多景樓

登臨每憶衛公詩。多景唯於此處宜。海岸千艘浮若芥。邦人萬室布如棋。江山氣象回環見。宇宙端倪指點知。禪老莫辭勤迓候。使君官滿有歸期。

墨莊漫錄。多景樓在北固山甘露寺中。李贊皇題臨江亭詩。有多

景懸窗牖之句。以是命名。樓即臨江亭故基。裴煜守潤日賦詩。

錢顥

顥字安道。無錫人。慶歷六年進士。熙寧初爲御史裏行。以論奏王安石。貶監衢州稅。

遊爛柯山

春郊雜還擁紅旌。共訪仙蹤嘯傲行。雲徑直從深崦入。石梁宛在半空橫。巖邊瑤圃新開出。洞裏芝田舊種成。羽客一杯無復見。青山畱得爛柯名。爛柯山洞志

劉彝

彝字執中。福州人。少從胡瑗學。中慶歷六年進士。初爲朐山令。熙寧二年召對除兩浙運判。移知虔州。加直史館。知桂林。除名編隸涪州。召還卒。有居陽集。

夜宿善權寺追懷陳述古

精識世所稀。及道古稀有伊人。雖云亡。遺德不可朽。嘗厭石渠游。是邦爰出守。浚河納湖波。股派活畎畝。

學宮起城隅。塗人或薪槱。旣富而教之。薄俗適忠厚。矧予平生時。昏弱賴磨揉。共攝姬孔微。肯出臯稷後。醇源浩罔涯。實行靡容苟。猶其老巖阿。寂寞待同叩。天乎奪大成。旅茲宜興阜。我來薙荆榛。雨淚滴杯酒。慟哭起秋風。落葉紛林藪。永懷三益恩。語報乏瓊玖。願子生人間。世世爲親友。周必大歸廬陵日記

悼賢詩

良田十頃接晴烟。曾假過侯救旱年。俸麥一車開德濟。流民千里荷生全。人嗟逝水今亡已。俗感遺風尙泫然。獨對老僧談舊事。斜陽春色漫盈川。

棟縣志。前刺史過昇。字彥寧。皇祐三年。以祕書郎來知刺史。連值歲祲。出常平錢糴米。以活流民。復割俸麥七十斛爲種。假超化院十餘頃。役饑民耕種之。明年得麥五百餘斛。民賴以活。熙寧中。昇已亡。葬過故院。與僧追誦歎歎。見民有談及公去無不泣下。因作此詩題之院壁。

胡楚材

楚材。睦州壽昌人。慶歷六年進士。

憶彭頭山

久客倦行役。故山安在哉。松竹讀書室。水石釣魚臺。明月照歸夢。西風吹酒杯。亭亭籬下菊。寂寞爲誰開。  
嚴州府志

楊蟠

宋詩紀事

卷十六

四二三

蟠字公濟，章安人。一作錢唐人。慶歷六年進士。爲密和二州推官。以詩知名。元祐中蘇軾知杭州。蟠爲通判。與軾倡酬爲多。後知溫壽二州。卒有集。

陪潤州裴如晦學士遊金山回作

世上蓬萊第幾洲。長雲漠漠鳥飛愁。海山亂點當軒出。江水中分繞檻流。天遠樓臺橫北固。夜深燈火見揚州。迴船卻望金陵月。獨倚牙旗坐上頭。宋文鑑

蓴菜

休說江東日日寒。到來且覓鑑湖船。鶴生嫩頂浮新紫。龍脫香鬚帶舊涎。玉割鱸魚迎刃滑。香炊稻飯落匙圓。歸期不待秋風起。漉酒調羹似去年。茗溪漁隱叢話

東岡隋真觀法師塔

東岡人不識。野寺在樵漁。落葉年年滿。春風爲埽除。

楊梅塢

夏日紅相照。天晴塢自開。襄陽多稚子。摘贈故人來。

西溪

爲愛西溪好。長憂溪水窮。山源春更落。散入野田中。

錢唐江上

一氣連江色。寥寥萬古清。客心兼浪湧。時事與潮生。路轉青山出。沙空白鳥行。幾年滄海夢。吟罷獨含情。

以上咸淳臨安志。

去郡後作

爲官一十政。宦遊五十秋。平生憶何處。最憶是溫州。思遠城南曲。西岑古渡頭。綠艤春送酒。紅燭夜行舟。不敢言遺愛。唯應念舊遊。憑君將此曲。寫寄謝公樓。溫州府志

時燕堂在高郵州治東衆樂園。蝶爲守時建。

吏隱孟城九十旬。豐年日日是佳辰。賦成席上猶飛雪。歌動梁閒已落塵。此地誰爲愛酒伴。他時儻憶種花人。五壇芍藥齊教放。何處揚州更覓春。高郵縣志

練光亭

寒光萬頃澹高秋。粉壁朱闌佇客愁。晚日蕭蕭聞落葉。晴天歷歷數飛鷗。烟橫絕巒疎難掩。月在平波瑩不流。懷抱未忘知有處。且和風笛醉滄洲。丹陽縣志

孫永

永字曼叔。趙人。舉進士。官吏部尚書。謚康簡。

清明

每年每遇清明節。把酒尋花特地忙。今日江頭衰病起。佛前新火一爐香。古今歲時雜詠。

袁陟

陟字世弼。號遜翁。南昌人。慶歷六年進士。知當塗縣。官止太常博士卒。有遜翁集。

王直方詩話·世弼詩墓章

應物而道麗奇壯過之。

潘子真詩話·世弼宦遊當塗時·郭功甫尙未弱冠·世弼愛其才·薦于梅聖俞·自爾有聲·功甫嘗曰·數載汲引·袁二丈力也·蒿埋三尺·不敢忘其賜·

苦溪漁隱叢話·世弼年十七·題百丈詩云·瓊田收杷種·玉溜注琅玕·讀書最苦·因爾癯瘠·歿時纔三十四歲·自作墓誌·有詩文十卷·號遜翁集·今不復傳·

過金陵謁吳大帝廟·未冠時作

人苦曹瞞虐·天悲漢祿終·山河分鼎峙·氣象發江東·一旦墟京國·彌年豢幼冲·炎精竟灰燼·紫蓋出艨艟·長策資公瑾·雄才得呂蒙·招延師友義·繼述父兄忠·舊府峩雙闕·驚濤涌半空·風雲龍虎勢·日月帝王功·地力因時險·神謀與意通·屈伸思所濟·逆順審于衷·駿足蟲交貨·靈牙耀卽戎·同盟界函谷·獨斷保蠶叢·定霸葵丘劣·推心建武同·長沙兆生識·典午賴餘風·戰守遺蹤在·登臨四望中·陵遷成萬古·世異想羣雄·歌舞居民祀·干戈逐虜功·征帆來浦外·久客悵途窮·精銳銷孤劍·飄零若斷蓬·徘徊靈廡下·暮葉亂江楓·

苦溪漁隱叢話

題劉仁瞻畫像

陣前仙碑生無愧·鼓下蠻奴死合羞·三尺吳縑暗塵土·凜然蒼鶴欲橫秋·

苦溪漁隱叢話·王旛遊金陵昇元寺·見僧房壁上有繪金紫大夫題詩云云·不能解卷·畫歸示其父平甫曰·此劉仁瞻像·袁世弼詩也·此詩俊拔可喜·碑實呼瓊·袁誤呼也·

贈郭功甫二絕

從來多病王僧祐。自小能文謝惠連。  
各厭塵勞思物外。莫辭攜手訪林泉。  
雪後姑溪水更深。冥冥寒雨作連陰。  
旅懷未可頓消遣。思與洛生溪上吟。

苦溪漁隱叢話荆公居金陵爲功甫手寫所賦詩一軸有此兩篇世彌贈功甫詩也

贈功父

方山憶共汎金船。屈指于今五六年。  
風送梨花吹醉面。月和溪水上歸轎。  
浮生聚散應難料。末路窮通盡偶然。  
欲問故人牢落事。鹿裘深入白雲眠。

王直方詩話王介

甫嘗手書此詩

臨終作

詩人玉屑  
青靄千峯暝。悲風萬古呼。  
其誰挂寶劍。應有奠生芻。  
皎月東方隕。長松半壑枯。  
山泉吾所愛。聲到夜臺無。

謝景初

景初字師厚。絳子。慶歷六年進士。官大理評事。出知餘姚縣。多惠政。屢遷益州路提點刑獄。以屯田郎致仕。黃山谷其壻也。有宛陵集。

王直方詩話。謝師厚方爲其女擇對。見黃山谷詩曰。吾得壻如此足矣。山谷之詩卒從謝公得句法。有詩曰。自往見謝公。論詩得藻梁。

天中記。紙以人得名者。有謝公。有薛濤。所云謝公者。富春謝司封景初。創箋樣以便尺書。因以爲名。謝公有十色箋。深紅。粉白。杏紅。明黃。深青。淺青。深綠。淺綠。銅綠。淺雲。十色也。

觀餘姚海氛

海上風與雨。未朕先氣升。澤鹵雜山雲。蔚鬱相熏蒸。交語面已障。安辨丘與陵。衣濡帶革緩。臭腥殊可憎。自非昌其陽。疾癘得以乘。君子卻陰邪。何必醫師能。

法喜堂

虛堂庇風雨。結構不務壯。外飾無髹彤。置物況容長。開篋藥劑靈。拈葵白黑抗。階花淡亦天。庭石碧交向。出門鳥雀喧。燕處物我喪。吳俗夸有素。佛徒侈相尚。獨能守質靜。坐以矯流宕。棲之果自喜。何須山海上。  
以上宋文鑑

石谷亭飛瀑

落泉下峭壁。陡絕千萬丈。濺急雪片飛。望若匹練廣。曲嶺隔青林。三里已聞響。其傍有巨石。平潤可俯仰。愚俗所不道。我輩數來賞。須期秋色清。攀蘿將爾上。會稽志

句

倒著衣裳迎戶外。盡呼兒女拜燈前。

後山詩話。謝師厚廢居于鄧。王左丞存其妹婿也。  
奉使荆湖。枉道過之。夜至其家。師厚有詩云。云。



# 宋詩紀事卷十七

錢唐厲鶚緝  
祁門馬曰璐同緝

強至

至字幾聖錢唐人慶歷六年進士刻苦攻詩韓魏公甚重之官祠部員外郎有集

墨蟹

瑣瑣江湖中忽在幽人壁短螯利雙鉞長跪生六戟骨眼驚自然熟視審精墨初疑蟾穴束猶帶浮泥黑橫行竟何從躁心固已息終朝牆壁閒頗有肥霜色我來空持杯左手莫汝食誰奪造化功生成歸筆力  
蟹略

賈麟自睦來杭復將如蘇戲贈短句

春風那復繫狂游朝醉桐江暮柳洲大手千篇隨地埽一身四海逐雲浮榮名不落閑消夢退築聊爲晚歲謀老橘殘鱸猶有興片心還起洞庭舟瀛奎律髓

句士良

士良成都人慶歷六年進士

和吳中復太守春遊海雲寺

佛土依山福遠州。春行繡騎上雲頭。補天彩石盈池在。朝海清江繞寺流。四國仰煩劬伯勞。羣生翹望謝安遊。早知爲礪爲霖意。惟有西民欲暫留。成都文類

陳舜俞

舜俞字令舉烏程人。慶歷六年進士。嘉祐四年登制科。歷都官員外郎。坐詆新法。謫南康酒稅。赦還卒。嘗居秀州之白牛村。自號白牛居士。有集。

棲賢寺

辟蛇行者應開寺。拭眼高僧尚有墳。龍帶雨歸三峽水。鳥銜花出五峯雲。方輿勝覽

騎牛歌

我騎牛君莫笑。人閒萬事從吾好。千金市骨駿馬來。乘肥大躍須年少。蒲爲鞭草爲轡。瀑布山前松徑裏。看山聽水要行遲。輕策緩驅塵不起。布袍葛帶烏接羅。山家裝束不時宜。匏尊注酒就背飲。阜囊貯書當角垂。我狂吟醉欲倒。同醉同吟白雲老。此老不可天下人。一住廬山三十春。聲如洪鐘目如電。七十神光射人面上。上牛下牛不要扶。合與山中作畫圖。汴州馬上顧何如。春泥沒腹仍濺帽。夜半歸來人亦痛。天真喪盡百憂集。衣食毛髮歸妻孥。爭如來騎牛。水光山色俱悠悠。

梅磾詩話。陳舜俞令舉嘉禾人。慶歷中登進士乙科。嘉祐四年中制科。宰越之山陰。秩滿當召試館職。會朝廷行青苗法。上書力諍。時政謫監南康軍。酒稅到官。與劉太博凝之日跨雙犧。以窮康廬泉石之勝。此歌世爭傳之後。遇赦還鄉。絕意仕進。元豐中卒。葬於吾鄉南門外之蘇灣。距城僅三里。許過者必式焉。

淵明醉石

活活飛泉清繞石，悠悠天幕翠鋪空。  
是非分付千鍾裏，日月銷磨一醉中。  
柳絮任飄荒徑畔，菊花仍在舊籬中。  
水聲山色年年好，尙使游人想素風。廬山紀事

和開祖丹陽別子瞻後寄

仙舟繫柳野橋東，會合情多勞謫翁。  
相對一尊浮蟻酒，輕寒二月小桃風。  
羈懷散誕謳歌裏，世事縱橫醉笑中。  
莫恨明朝又離索，人生何處不惄惄。濂至律體

林屋洞

洞天三十六，第九曰林屋。神仙固難名，瓊怪存紀錄。曠歲懷尋賞，茲晨幸臨矚。馳神在真游，豈復儒深谷。  
解韁納芒履，然松命光燭。初行已僵僵，漸入但匍匐。顧瞻避衝磕，濱淖沒手足。如此百餘步，始可立寓目。  
或垂若鐘虀，或植若旌纛。有如案而平，有如几而曲。鐫刻非人工，晶瑩燦黃玉。遙知竅穴外，定有金庭錄。  
凡肥不可往，叩擊安敢黷。鸞鳳無消息，但見白蝙蝠。却還望微明，旣出猶喘促。霑衣憐石髓，孰悔泥塗辱。  
庶幾達微慕，養生相吾福。

毛公壇

古壇疊亂石，草木何參差。黃衣守其傍，陳蹟刊豐碑。曰初劉真人，齒髮不可訾。但見紺綠毛，被體鬢鬢垂。  
雲輶一日去，空山畱庭壇。弟子散巖谷，荆榛蔽荒基。晚有周息元，探訪親斬披。白鹿忽跪前，靈符見葳蕤。  
地勝人旣偶，凝嚴起寶祠。束帛下幽聘，良馬維素絲。前朝揖高風，有美皮陸詩。殆今三百年，事去物亦隳。

喬松委樵蘇。野蔓號狐狸。惟有鍊丹井。甘冽無等夷。一酌匪消渴。飲慕尚神禧。以上震澤編。

王存

存字正仲。丹陽人。慶歷六年進士。神宗朝歷龍圖閣直學士。知開封府。拜兵部尚書。哲宗朝累官

尚書左丞。以端明殿學士知蔡州。紹聖初提舉崇禧觀致仕。卒贈左銀青光祿大夫。與黨籍。

史院席上奉和首相吳公元韻

上聖論思著。前言撫緒餘。瓊筵初賜醴。石室載紬書。徽範貽來者。功成念昔歟。欲知開局盛。門擁相君車。

揮麈後錄

遊焦山

連山擁滄江。峭絕視茲鮮。由來一氣結。殊不麗衆巘。林深鳥聲悅。境靜人自遠。方吾抱幽介。對此萬慮遣。

京口三山志

登北固山

晚登北固頂。俛視南徐城。廢壘何茫茫。山川迴縱橫。千載競誰有。六朝空戰爭。豪氣不可問。古墳人正耕。過丹陽舊居

漂泊經故國。繫舟款柴扉。破屋他人居。昔鄰今或非。父老迎我飲。祝我畫錦衣。我謝父老言。朴拙非所祈。一官走塵土。實迫寒與飢。去鄉未幾載。頗覺儔侶稀。人事已可嗟。況當白首歸。泚泚練塘水。綠楊蔭漁磯。有田尚可耕。誓將父老依。以上鎮江府志。

句

珠蘞錫御恩猶在玉輦親扶事已空。

孔平仲談苑光獻曹太皇嘗作珠子鞍轡上施紅羅銷金坐子賜神宗神宗駕幸金明池遂乘此輶太皇太后病稍閒神宗親製一小輶極爲輕巧以珠玉黃金飾之進於太皇遂載而之涼殿太后扶其左神宗扶其右太皇下輶曰官家太后親自扶輶當時在曹家作女時安知有今日之盛喜見顏色王正仲進光獻挽詞云云蓋用此兩事也。

韓

絳

絳字子華靈壽人徙雍丘忠獻公億子慶歷中進士歷翰林學士御史中丞神宗朝拜同中書門下平章事封康國公卒贈太傅謚獻肅

韓元吉桐陰舊話獻肅公諱絳字子華發解過省殿試皆第三以元祐三年三月薨皆三數亦異事也故蘇魏公挽詩云三登慶歷三人第四入熙寧四輔尊蓋公自樞副遷參政宣撫陝右卽軍中拜昭文相再入史館相也

復齋漫錄子華兄弟皆爲宰相其家呼爲三相公呼持國爲五相公云父京師人呼爲桐木韓家蓋公家門有梧桐木取爲稱以別魏公子華沒陸農師爲挽章以記之所謂棠棣行中爲宰相梧桐名上識韓家是也子華以辰年辰月辰日辰時薨農師又詩云非關庚子曾占鶴自是辰年併值龍

游鴻慶院

宋詩紀事 卷十七

四三五

久旱雨初足。樂游春正深。喧闐觀士女。清曠入山林。佛界雲成寶。僧園地布金。方塘探子石。高閣盍朋簪。  
沙水通溪白。松筠逐徑陰。紛華從滿目。幽寂自虛心。印組端爲累。巖局得暫尋。晚風吹綠野。歸騎已駸駸。

成都文類

和范蜀公題蜀中花圖

徑尺千餘朵。矜誇古復今。錦城春物異。粉面瑞雲深。賞愛難忘酒。珍奇不廢金。應知色空理。夢幻卽懽心。

謁仙翁祠書山蓀亭

玉井不可到。玉泉聊可尋。馬行穿亂石。人語入深林。川迴沙明色。溪喧谷響音。我來方六月。雲榭一披襟。  
華嶽全集

韓維

維字持國。絳弟。以廕入仕。英宗朝。累除知制誥。神宗卽位。爲翰林學士。加承旨。元祐初。拜門下侍郎。以太子少傅致仕。紹聖中。坐元祐黨。謫均州安置。元符初。復官。卒。有南陽集。

寄孔寧極

雨滴菴上茅。風亂窗前竹。繁聲互入耳。欲寐不得熟。緬懷田舍翁。石徑滑馬足。連山暗秋燈。一路何處宿。

過庭錄。持國守許。孔居郊。常具車馬。邀致郡治之養真菴。同衾促膝。快論人間事。久而後歸。一夕大雨。孔告還。持國獨寢菴中。寄詩云云。

下橫嶺望寧極舍

驅車下橫嶺。西走龍陽道。青煙幾人家。綠野四山抱。

烏啼春意闌。林變夏陰早。應近先生廬。民風故醇好。

王直方詩話。韓持國嘗有詩云。青煙  
幾人家。綠野山四抱。當時無不傳之。

同曼叔游菩提寺

高城如破崖。寺帶喬木古。禪房掩清晝。佛畫剝寒雨。荒池野蔓合。濁水佳蓮吐。蕭條聯騎游。淡薄對僧語。秋風日夕好。勝事從此數。

盧溪盧攜讀書處

伊人沒已久。溪溜亦如綫。淳氣揖老僧。清陰坐春院。始悟入山深。幽林鳥聲變。

西溪

我從南嶺來。引轡下雲木。不知溪流處。但見翠滿谷。涼葉覆山泉。修篁翳茅屋。

奉同原父賦澄心堂紙

江南國土未破前。澄心名紙世已傳。高堂久傾不復見。誰謂此物猶依然。當時萬杵擣雲葉。鋪出几案滑且堅。剝溪藤骨不足數。蜀江玉屑誰復憐。君臣嬉燕盛文采。駢章麗句鬪巧儂。一朝零落隨散地。中原篋笥生光鮮。君安得此尙百幅。題以大句先羣賢。羣賢落筆富精麗。瓊琚寶玦相鉤聯。嗟予材力豈當敵。雖欲強賦何能妍。獨耽玩物古所戒。崇尙浮藻政豈先。江南可哀紙可惜。後有觀者存吾篇。

王直方詩話。澄心堂紙乃江南李後主所製。國初亦不甚以爲貴。自劉貢甫首爲題之。又邀諸公賦之。然後世以爲貴重。貢甫詩云。當時百金售一幅。澄心堂中千萬軸。後人聞名寧復得。就令得之亦不識。文忠公詩云。君不見曼卿子美真奇材。久已零落埋黃埃。君家雖有澄心紙。有敢下筆知誰哉。梅聖俞云。寒溪浸紙春夜月。敲冰舉簾勻割指。乾堅滑若鋪玉。一幅百金曾不礙。東坡云。詩老囊空一不留。一番曾作百金收。又從宋肇求此紙云。知君也厭雕肝腎。分我江南數斛愁。

同化光陪寧極之濱陽城

不踏南溪路。于今又幾春。能來共聯轡。還是舊游人。載酒真乘興。談經或入神。歡餘不無媿。林壑可還身。

杜君章家賦海棠

濯錦江頭千萬枝。當年未解惜芳菲。而今得向君家見。不怕春寒雨溼衣。

石林詩話。韓持國雖剛果特立。風節凜然。而情致風流。絕出時輩。許昌崔象之舊第。今爲杜君章所有。廳後小亭僅丈餘。舊有海棠兩株。每花開時。持國輒載酒日飲其下。歲以爲常。至今故老猶能言之。韓忠獻公嘗帥蜀。持國兄弟皆侍行。尙少。故前兩

云句

酴醿

平生爲愛此香濃。仰面常迎落架風。每恐春歸有遺恨。典刑猶在酒杯中。以上南陽集

程伯淳自洛過訪時范純禮亦居潁昌作詩示之

閉門讀易程夫子。清坐焚香范使君。顧我未能忘世味。綠尊紅妓對斜曛。苦溪漁隱叢話

句

數畝家園荒杞菊。一池秋水沸龜魚。

雪浪齋日記。韓持國句。

前人評云。拂字直錢。

一笛西風吹落日。滿帆行客背孤城。合璧事類後集。

韓 緝

緝字玉汝。維之弟。第進士。英宗朝歷淮南轉運使。神宗朝累知樞密院事。哲宗朝拜尚書右僕射。兼中書侍郎。出知潁昌府。以太子太保致仕。卒贈司空崇國公。謚莊敏。

桐陰舊話。莊敏公緝初求字於歐陽文忠公。公以小合幅紙書玉女二字送來。莊敏大不樂。明日相見。猶有慍容。文忠公曰。出處無點水。君何怪邪。取筆添女字三點。相與一笑。蓋詩中王欲玉女。但音發作汝也。前輩亦雅戲如此。

苦溪漁隱叢話。東坡云。韓緝爲秦州。酷暴少恩。以賊殺不幸去官。秦人語云。寧逢乳虎。莫逢韓玉汝。孫臨最善滑稽尤善對。或曰。莫逢韓玉汝。當以何對。臨應聲曰。可怕李金吾。天下以爲口實。可怕李金吾。乃杜子美詩也。

### 東山寺

久有東林約。因乘暇日游。眼明初出郭。神王欲凌秋。野曠騫孤隼。江清颺遠鷗。近山青嶂合。多稼綠雲浮。雞犬聲相接。溝塍水亂流。度橋喧從騎。環樹轉鳴驂。問俗驚堯壤。尋僧到沃洲。深沈開寶闥。磅礴輶華輶。像設嚴珠殿。經聲隱絳幢。仰看香刹直。徐步畫廊脩。遇物皆周覽。逢軒卽少留。前庭初顯豁。後徑轉深幽。野嶺蒼筠麗。霜楓赤葉稠。隔牆聞好鳥。循沼玩游魚。儻翠榦櫻纔剝。紅芒稻半收。凌虛登陞道。市境對岑樓。

暗谷藏危棧。平沙際別州。川原同聚沫。身世劇浮鷗。回首飄鄉思。臨尊浣客愁。清閑資善奕。決勝在冥搜。

影動穰苴表。風生曲逆籌。歸鞍不敢緩。斜日照文楸。四朝詩

邵亢

亢字興宗。丹陽人。舉茂才入等。神宗朝歷樞密直學士。知開封府。拜樞密副使。以資政殿學士。知外郡。卒贈吏部尚書。謚安簡。

寄吳處厚

流年真似隙中駒。後情懷嬾更踈。天上又頒新歷日。牀頭未答故人書。殷勤羔雁工曹檄。狼藉杯盤上客魚。好在仲宣家萬里。從軍苦樂定何如。

青箱雜記。樞密邵公亢謂余詩似樂天。熙寧中余

辟定武帥幕。公自鄆附所作詩一軸。并寄余詩。

張掞

掞字文裕。齊州歷城人。舉進士。累遷龍圖閣知成都軍。英宗朝爲戶部侍郎致仕。熙寧中卒。

賀執政入東西府。熙寧中始建東西府。宣執政遷入借官車輦。仍賜御筵。

五仙同日集蓬萊。玉宇珠簾次第開。乍向壺中窺日月。猶疑海上見樓臺。光生金鉉調元地。榮極璿樞命世才。共荷聖賢天地寵。定知霖雨及時來。李壁王荊文公詩注。

丁假

偃蘇州人。仁宗朝進士。

句

白虎前芳掩。金華舊事輕。天心非不寤。垂意在蒼生。

省試邇英延講藝

溫公詩話

鄭修輔

修輔慶歷中。以大理寺丞爲豐城令。至和元年。爲奉化令。

隱潭

在奉化縣西北

在昔知何人。鑿破青山骨。飛泉直下來。千尺瀉倏忽。兩壁蒼翠閒。一陣風雷突。傍無塵埃蹤。中有蛟龍窟。寒氣不可嚮。猛勢豈能屈。安得當旱年。爲霖濟羣物。

四明龍窟

張師錫

師錫。開封襄邑人。工部侍郎去華子。仁宗朝。仕至殿中丞。

老兒詩五十韻

鬢髮盡皤然。眉分白雪鮮。週遮延客話。傴僂抱孫憐。無病常供粥。非寒亦衣錦。假溫衾擁背。借力杖搭肩。貌比三峯老。年過四皓仙。喚方離枕上。扶始到門前。每愛烹山茗。常嫌釘石蓮。耳聾如塞續。眼暗似籠煙。宴坐羸凭几。乘騎困鞬鞭。頭搖如轉旋。脣動若抽牽。骨冷愁離火。牙疼怯漱泉。形骸將就木。囊橐尙貪錢。膠睫乾眵綴。黏髭冷涕懸。披裘腰嫋繫。濯手袖慵撆。揷舉衣頻換。扶持藥屢煎。坐多茵易破。行少履難穿。喜婢裁帑布。嗔妻買粉鉏。房教深下幕。牀遣厚鋪氈。琴聽憐三樂。圖張笑七賢。看經嫌字小。敲磬喜聲圓。

食罷羹流袂。杯餘酒帶涎。樂來須遣罷。醫到久相延。裏帽縱橫掠。梳頭取次纏。長吁思往事。多感聽哀弦。  
氣注腰還重。風牽口更偏。墓松先遺種。誌石預教鐫。客到唯求藥。僧來忽問禪。養茶懸竈壁。曬艾曝簷椽。  
怒僕空睜眼。噴兒謾握拳。心驚嫌蹴踴。腳軟怕秋千。局縮同寒狹。摧脰似餓鳶。觀瞻多目眩。舉動卽頭旋。  
女嫁求紅燭。男婚乞綵錢。已聞捐几杖。寧更佩韋弦。賓客身非與。去聲兒孫事已傳。養和屏作伴。如意拂  
相連。久棄登山屐。惟存負郭田。呻吟朝不樂。展轉夜無眠。呼稚臨牀畔。看書就枕邊。冷疑懷貯水。虛訝耳  
聞蟬。束帛非無分。安車信有緣。伏生甘坐末絳老。讓行先拘急。將風夜昏沈。欲雨天雞皮塵漸漬。覲齒食  
頻填。每憶居郎署。常思釣渭川。喜逢迎佛會。羞赴賞花筵。徑狹容移檻。堦危索減輒。好生焚鳥網。惡殺拆  
漁船。旣感桑榆日。常嗟蒲柳年。長思當弱冠。悔不贋狂顛。賓退錄

喜子登第

御榜今朝至。見名心始安。爾能俱中第。吾可遂休官。賀客畱連飲。家書反覆看。世科誰不繼。得慰二親難。  
詩話總龜

楊備

備字修之。建平人。億之弟。慶歷中爲尙書虞部員外郎。分司南京。上輕車都尉。有姑蘇百題。金陵

覽古詩。

鶚按景定建康志載作金陵詩者。楊備字修之。張敦頤六朝事蹟作楊修。今據文獻通考。當與中吳紀聞所載姑蘇

百題俱屬楊備。六朝事蹟作楊修者筆誤也。

夢中作

月俸蚨錢數甚微。不知從宦幾時歸。東吳一片煙波在。欲問何人賣釣磯。

中吳紀聞。楊郎中天聖中爲長溪令。夢中忽作詩云云。及寤心潛異之。明道初。宰華亭。俄丁內艱。遂家于吳中。樂其風土之美。安而弗遷。因悟夢中所作。幾于前定。嘗效白體作我愛姑蘇好十章。又作姑蘇百題詩。每題讐釋其事。

蠡口

霸越勳名閒世才。五湖煙浪一帆開。猶防烏喙傷同輩。此地復招文種來。

華山精舍

巖屏晚樹噪寒鴉。嵐翠樓臺釋子家。池面鑑光功德水。金波影裏石蓮花。

汎太湖

漁舟載酒日相隨。一笛蘆花深處吹。湖面風收雲影散。水天反照碧琉璃。

姑蘇臺

山花野草一荒丘。雲裏驕奢舊蹟留。珠翠管弦人不見。上頭麋鹿至今遊。

響屢廊

步步香翻羅韞塵。粉紅花豔滿宮春。傾城一笑無遺迹。不見長廊響屢人。

洗馬池在蘇州郡學南

一一牽來種是龍。臨波深下更嘶風。金鞍玉勒拋何處。騰踏渥洼寒影中。以上吳郡志。

新亭

滿目江山異洛陽。北人懷土淚千行。不知亡國中書令。歸老新亭是故鄉。  
晉新宮

玉案金爐對御牀。巋然應似魯靈光。螭頭直下雙魚尾。不讓西京舊栢梁。  
蠶堂

摘繭抽絲女在機。茅簷草箔舊堂屏。年年桑柘如雲綠。翻織誰家錦地衣。

臺城

六朝遺蹟好山川。宮闕灰寒草樹煙。江令白頭歸故國。多情合賦黍離篇。

層城觀亦名穿針樓

秋星如彈月如梳。宮妓香添乞巧爐。萬縷千針同一意。眼穿腸斷得知無。

秦淮

一氣東南王斗牛。祖龍潛爲子孫憂。金陵地脈何曾斷。不覺真人已姓劉。

獨足臺

鳥跡分明在帝臺。管弦聲裏戰書來。回頭一覺風流夢。猶得朱門傍水開。

胭脂井

擒虎戈矛滿六宮。春花無樹不秋風。蒼黃益見多情處。同穴甘心赴井中。以上六朝事蹟

張俞

俞少愚益州郫人屢舉不第用薦除祕書省校書郎願以授父顯忠而自隱於家文彥博治蜀爲築室青城山白雲溪以處之號白雲先生有白雲集

宋史隱逸傳俞六召不應其卒也妻蒲氏名芝質而有文爲之誄曰高視往古哲士實殷施及秦漢餘烈氣風挺生英傑卓爾逸羣孰爲今世亦有其人其人伊何白雲隱君嘗曰丈夫超世不偶仕非其志祿不可苟營營未遂非吾所守吾生有涯少實多艱窮亦自固困亦不顛不貴人爵知命樂天脫簪散髮眠雲聽泉有峯千仞有溪數曲廣成遺趾吳興高躅疏石通徑依林架屋棲鹿同羣晝游夜息嶺月破雲秋霖灑竹清意何窮真心自得放言遺論何榮何辱孟春感疾閉戶不出豈期遂往英標永隔抒詞哽噎揮涕汎瀾人誰無死惜乎材賢已矣吾人嗚呼哀哉

### 遊驪山

玉帝樓前鎖碧霞終年培養牡丹芽不妨野鹿踰垣入銜出宮中第一花青瑣高議

### 題漢州妓項幡羅

蜀國佳人號細腰東臺御史惜妖嬈從今喚作楊臺柳舞盡春風萬萬條

邵伯溫聞見前錄慶歷間文潞公知成都府年未四十多謙集有飛語至京師御史何鄭聖從因謁告歸上遣伺察之聖從將至潞公亦爲之動少愚謂公曰聖從之來無足念因迎見於漢州會有營妓善舞聖從喜之間其姓妓曰楊聖從曰所謂楊臺柳者少愚卽取妓之項幡羅題詩云云命其妓作柳枝詞歌之聖從爲之醉後數日聖從至成都頗嚴重一日潞公大作樂迎其妓雜府妓中歌少愚之詩以酌聖從每爲之醉聖從還朝潞公之謗乃息

### 楚中作

渺渺洞庭野。蕭蕭黃鶴樓。水通雲夢浦。人渡沔陽舟。廣澤侵吳壤。孤城接郢丘。山分三楚斷。溪入九江流。寂寞休兵月。紛紜戰國秋。吳生來赤壁。魏武定荊州。六代憑形勢。羣雄死寇讐。淒涼帝子宅。浩蕩禰衡洲。萬里浮雲暮。千年故國愁。武昌宮不見。麋鹿自羣游。潘子真詩話

蠶婦

昨日入城市。歸來淚滿巾。徧身羅綺者。不是養蠶人。宋文鑑

謁白帝廟

孤山扞江口。上有白帝祠。橫視天下險。萬流皆俯窺。古殿鎖神物。悲風出陰帷。天昏瓦棟折。狐鼠亦生威。優巫日鼓舞。鬼怪生奔馳。雷霆卷蛟窟。霆火燒松枝。入戶精魄動。有如陰兵隨。吁哉漢盜亂。海內遂崩離。赤龍始潛躍。逐鹿過秦時。公孫奮神劍。定蜀圖安危。隴坻開北戶。荆門啓東陲。長驅百萬衆。日闢天下師。羣豪插羽翼。與漢爭雄雌。兩帝不並立。興亡良可悲。天運雖有在。聖賢豈無爲。昭皇攬英傑。襲軌奄重基。  
自注：先主武侯，風雲共浩蕩，千古餘寒碑。威神竟不沒，萬里震南夷。  
方輿勝覽

翠微寺

翠微寺本翠微宮。樓閣亭臺數十重。天子不來僧又死。樵夫時倒一株松。清波別志

蘇麟

句

近水樓臺先得月。向陽花木易爲春。

翰府名談。蘇麟爲杭州屬縣巡檢。范文正鎮錢唐。兵官皆獲薦。書獨麟在外邑。未見收錄。麟入府獻詩云。云文正薦之。

### 王 沖

次韻范公遊雲門

仲淹

高躡五雲堆。平看萬象開。樵風溪路遠。華雨梵天來。刹倚三峯直。鐘傳萬壑迴。叨陪上方燕。依約近中台。

### 霍 交

和趙閱道遊海雲山

山深藏古寺。旁枕舊方池。鼓響揭雲外。石探從天涯。使旌遊不倦。瑞麥獻相隨。事簡民同樂。歸心莫競馳。  
成都文類

### 任大中

大中。字子固。三衢人。老于儒學。作詩寒苦。趙清獻喜之。

從清逸老人遊西山夜宿翠巖聯句

蒼龍天矯西北來。鑿破明珠成碧岫。任何人駕空起樓閣。地靈不敢藏餘秀。  
潘 鎮窗雲重衣巾潤。梳木風  
清肌骨透。任客來。一夜與僧談。氣覺浩然充宇宙。  
潘

### 絕句

莫管流年一擲梭。花前對酒且高歌。命中若有終須有。到底無時不奈何。以上潘子真詩話。

送永倅周茂叔還濂溪

君去何人最淚流。老翁身獨宿南州。隨君不及秋來鴈。直到瀟湘水盡頭。廬山志。

邢夢臣

和趙閱道游海雲山

使旌驅近郭。民宴列芳池。洩洩春臺上。沈沈暮海涯。鴻驚人宛轉。電激騎追隨。此會經年至。須防日似馳。  
成都文類。

白贊

和趙閱道題新繁周表權如詔亭

亭名詔語密相沿。須信從來教義全。肯構嘗探詩禮業。出綸特表父師賢。早安素履知文富。晚服朱衣稱賞延。不是韋家專講學。豈聞旛戟到門前。成都文類。

石景立

景立、溫州郡守。

迎趙清獻公遊雁蕩

鴈蕩天台路險艱。多應特地隔塵寰。不辭登陟來千里。爲是東南第一山。爭望台星從海上。方知蓬島在。

劉孝孫

和趙閱道題新繁周表權如詔亭

義方曾榜舊亭名。子已爲郎典要城。身服上恩今日顯。詔符前語是人驚。正如伯起鱣堂兆。兼勝于公駟。閥榮試問繁江諸父老。詩書何似寶金籤。成都文類

張球

上呂許公

近日廚中乏短供。孩兒啼哭飯籮空。母因低語告兒道。爺有新詩謁相公。青瑣高議

郭從周

從周、西川人。

贈何中正

三字來時月正圓。一麾從此出秦川。錢唐春色濃如酒。貪醉花閒臥不還。

翠屏筆談。何龍圖。中正初登第。聞西川郭從周精于卜。乃以縑素求筮。從

周作一絕贈之云。云後自秦川移杭州而捐館舍。從周之筮何其驗歟。

鄭僑

僑字子高。賣子。晚年自號凝和子。鄉人謂之鄭長官。

登翠微作崑山上方。有僧屋曰翠微。

行客倦奔馳。尋師到翠微。相看無俗語。一笑任天機。曲沼淡寒玉。橫山鎖落暉。情根枯未得。愛此幾忘歸。

訪凌峯賢上人

步入凌峯閣。尋師師未歸。凭闌寂無語。唯見白雲飛。

爲簡公約賦素琴堂

素琴之堂虛且清。素琴之韻淪杳冥。神閑意定默自鳴。宮商不動誰與聽。堂中道人骨不俗。貌龐形端顏瑩玉。我嘗見之醒心目。寧必絲桐弦斷續。嗚呼靖節已死不復聞。成虧相半疑昭文。阮手鍾耳相吞吐。素琴之道詎可論。道人道人聽我語。紛紛世俗誰師古。金徽玉軫方步武。虛堂榜名無自苦。以上中吳紀聞

陳翥

翥字子翔。號咸聲子。又號銅陵逸民。慶歷間布衣。好植桐竹。又號桐竹君。作桐譜。

桐竹君詠

高桐凌紫霞。修篁拂碧雲。吾常居其閒。自號桐竹君。不解放俗利。所希脫世紛。會友但文學。啓談皆典墳。吁嗟機巧徒。反道胡足云。桐譜